

ზესკიონ ჟენეში



ღავით
კლდიაევილი

ც მ ვ ჯ ე ჯ
უ ე მ ე ე ღ ე ჯ
ე მ ჯ ე ე მ ე



სპეკულაციონ სსრ
საბავშვო და ახალგაზრდობის ლიტერატურის
სახელმწიფო გამომცემლობა
„ნაკადული“
19 თბილისი 62

ქართველი ხალხი საზეიმოდ აღნიშნავს თავისი დიდი მწერლის, ქართული კლასიკური მხატვრული პროზის ერთ-ერთი უდიდესი ოსტატის დავით კლდიაშვილის დაბადების 100 წლისთავს. უეჭველია, რომ ეს იუბილე ცხოველ გამოაჩინოს ჰპოვებს ჩვენი თვალუწვდენი საბჭოთა სამშობლოს ყოველ კუთხეში, რადგან ხალხთა ურღვევი ძმობისა და მეგობრობის უწყინდესი გრძნობით შედუღებულ ჩვენს დიად ქვეყანაში ყოველი ეროვნული კულტურის ყველა უძვირფასესი მონაპოვარი მთელი მრავალეროვანი საბჭოთა ხალხის საერთო კუთვნილებას, მისი სულიერი ცხოვრების განუყოფელ ნაწილს წარმოადგენს. დავით კლდიაშვილის შემოქმედებითი შემკვიდრება ჩვენი ეროვნული კულტურის სწორედ ისეთ ძვირფას მიღწევათა რიცხვს მიეკუთვნება, რომლებიც ქართველ ხალხს კანონიერი სიამაყის გრძნობით შეაქვს გარდაუვალ სულიერ ღირებულებათა საკაცობრიო საგანძურში. †

დავით კლდიაშვილის დაბადების 100 წლისთავი უშუალოდ მოჰყვა ვაჟა-ფშაველას იუბილეს, რომელიც დიდი ზეიმით აღინიშნა გასულ წელს არა მარტო საქართველოში, არამედ მთელს დიად საბჭოეთშიც და მისი საზღვრების მიღმაც. მხატვრული სიტყვის ეს ორი დიდი ხელოვანი არა მარტო ერთმანეთის თანამედროვენი იყვნენ, არამედ თანამებრძოლნი და თანამოღვაწენიც, რომელთაც არა მარტო პირადად

მეგობრობა და ურთიერთ სიყვარული აკავშირებდათ, არამედ საზოგადოებრივ მისწრაფებათა, სოციალური და ესთეტიკური იდეალების ერთიანობაც. როგორც ყოველი დიდი ხელოვანი, ვაჟა-ფშაველა და დავით კლდიაშვილიც უაღრესად თვითმყოფი, დამოუკიდებელი და ორიგინალური იყვნენ თავიანთი შემოქმედებითი ბუნებით. ისინი არავის ბაძავდნენ და არავის იმეორებდნენ და, ბუნებრივია, დიდად განსხვავდებოდნენ ერთმანეთისაგან. სრულიად განსხვავებული იყო მათი მსოფლშეგრძნობაც, სამყაროს პოეტური ხილვისა და ათვისების ხასიათიც, შემოქმედების თემატიკური სამყაროც, მხატვრული მეტყველების ბუნებაც. მაგრამ ისინი XIX და XX საუკუნეთა მიჯნაზე, თითოეული თავისებურად აგრძელებდა და აწვითებდა ილია ჭავჭავაძისა და აკაკი წერეთლის მიერ დაფუძნებულ დემოკრატიულ, ჰუმანურ და პატრიოტულ ტრადიციებს ქართული კლასიკური რეალიზმისა. ორთავემ განიცადა ხალხოსნური მოძრაობის იდეური ზეგავლენა. შემდეგ მათ თვალწინ განვლო საქართველოში პროლეტარული რევოლუციური ბრძოლის აღმოცენება-აღმავლობის პროცესმა, რუსეთის პირველი რევოლუციის ქარიშხლიანმა დღეებმა. ორივენი გულწრფელად და გაბედულად მიემხრნენ ამ დიდ სახალხო განმათავისუფლებელ მოძრაობას და მხარში ამოუდგნენ ცხოვრების ძირფესვიანად გარდაქმნისა და განახლებისათვის. საბრძოლველად ამხედრებულ პროგრესულ ძალებს ჩვენი საუკუნისა.

უმთავრესი, რაც დავით კლდიაშვილს ანათესავებს ვაჟა-ფშაველასთან, — ქართველი ხალხის ამ განუმეორებელ პოეტურ გენიასთან — ეს არის განსაკუთრებულად გამძაფრებული ყოვლისმომცველი ჰუმანიზმი, განსაკუთრებულად გამახვილებული გრძნობა ადამიანურობისა, ადამიანისადმი სიყვარულისა, სიბრალულისა და თანაგრძნობისა. დავით კლდიაშვილს მართლაც სრული უფლება ჰქონდა ეთქვა: „ყველაფერს, რასაც ვწერდი, ადამიანისადმი სიყვარული მაწერიებდა“. ადამიანისადმი სიყვარულისა და სიკეთის კეთილშობილური გრძნობით არის გამსჭვალული და შთაგონებული მისი მთელი შემოქმედება. თავისი სამწერლო და საზოგადოებრივი მოღ-

ვაწეობის მრისხანე და სუსხიან ხანაში, როცა ჩვენს ქვეყანაში თვითმპყრობელური ტირანია, ბურჟუაზიულ-მემამულური მჩაგვრელობა და ძალმომრეობა მძვინვარებდა, მწერალი გულმხურვალედ გამოექომაგა უკულმართი საზოგადოებრივი და სახელმწიფოებრივი წყობილების მიერ უღმობლად გათელილსა და აბუჩად აგდებულ ადამიანობას, გულის სიღრმემდე შემძვრელი ძალით ამხილა ადამიანის ბუნების დამამახინჯებელი, ადამიანის უკიდურესად გამაუბედურებელი მანკიერებანი იმდროინდელი სინამდვილისა. ძღელვარე გულშემატკივრობით შესცქეროდა დავით კლდიაშვილი სიდატაკის, უმეცრების, ათასგვარი ბოროტებისა და უსამართლობის წყვილიადით მოცულ იმდროინდელ ცხოვრებას ჩვენი ქვეყნისა და ხატავდა აძგვარი სინამდვილის მსხვერპლთა სახეებს, მოგვითხრობდა შათი მძიმე და გაუხარელი ცხოვრების ისტორიას. მწერლის ბიოგრაფი, მისი შვილი, გამოჩენილი ქართველი საბჭოთა მწერალი სერგო კლდიაშვილი გვიამბობს, რომ, როდესაც დავით კლდიაშვილს სთხოვეს დაეწერა თავისი შემოქმედებითი გამოცდილების შესახებ, იმის შესახებ, თუ როგორ ქმნიდა იგი თავის ბელეტრისტულ და დრამატურგიულ ნაწარმოებებს, მას უპასუხნია: „რა ვიცი მე, როგორ ვწერდი, გული მტკიოდა და ვწერდი, ეს იყო და ეს“. ეს გულისტკივილი, სოციალური და ეროვნული მონობით გაწამებული თავისი ქვეყნის იმდროინდელი დუხჭირი ცხოვრებით აღძრული გულისტკივილი, რომლითაც აღბეჭდილია XIX საუკუნის დიდი ქართული ლიტერატურა, განუყოფელად თან ახლავს დავით კლდიაშვილის შემოქმედებას, მაშინაც კი, როდესაც იგი მახვილი ჰუმორის, ზოგჯერ სატირულ სიმწვავემდე მისული ჰუმორის საშუალებას მიმართავს.

ლიტერატურის ისტორიაში იშვიათია მწერალი, რომელსაც ასე ებრალებოდეს თავისი ნაწარმოების ყველა პერსონაჟი, მის მიერ დახატული ყოველი ადამიანი; თავის უქცნობ მხატვრულ ქმნილებებში დავით კლდიაშვილმა დახატა მრავალფეროვანი გალერეა ისეთი პერსონაჟებისა, რომლებიც უადრესად მახინჯსა და დასაგმობ ადამიანურ თვისებებს განასახიერებენ. ზოგი მათგანი საზარელი უმეცრების, ცრუმორ-

წმუნეობის, ჩამორჩენილობის, პირუტყვეული ეგოიზმის მანკიერებით არის შეპყრობილი, ზოგნი ცბიერების, თვალთმაქცობის, მატყუარობის, უქნარობის, ფუქსავატი ამპარტავნობის ცოცხალ განსახიერებას წარმოადგენენ. მაგრამ მწერლის გულისწყრომა ამ ადამიანებისადმი როდია მიმართული. პირიქით, ყოველ მათგანს მწერალი გვიხასიათებს, როგორც უბედურ მსხვერპლს იმ უკუღმართი საზოგადოებრივი სინამდვილისა, რომელსაც ასე დაუზოგავად დაუმახინჯებია ამ ადამიანთა ბუნება, ასე უიმედოდ გაუმწარებია მათი ცხოვრება, ასე სასაცილოდ და საბრალოდ გაუხდია ისინი. არა ამ მანკიერ თვისებათა მატარებელი ადამიანებისადმი მიმართული დავით კლდიაშვილის ქმნილებათა მამხილებელი მახვილი, არა მათდამი ზიზღსა და მძულვარებას აღძრავს მწერალი მკითხველთა ცნობიერებაში, არამედ იმ უსამართლო და უგუნური საზოგადოებრივ-სახელმწიფოებრივი წყობილებისადმი, რომელსაც ასე დამღუპველად აბოროტებდა, ამახინჯებდა ადამიანს, გონებას უბნელებდა მას, გზას უხშობდა ნათელი, ბედნიერ, ადამიანური ცხოვრებისაკენ. ამაში მდგომარეობს დავით კლდიაშვილის შემოქმედების ღრმა ჰუმანისტური ელერა, მისი მაღალი სოციალური აზრი და მნიშვნელობა.

დავით კლდიაშვილის უაღრესად თვითმყოფი, ორიგინალური შემოქმედებითი ინდივიდუალობის ერთ-ერთი დამახასიათებელი თვისებურება ისიცაა, რომ მწვავე ცხოვრებისეული კონფლიქტებისა და წინააღმდეგობათა გამოსახატავად იგი არ მიჰყვება ლიტერატურაში ფართოდ გავრცელებულ ხერხს დადებით და უარყოფით გმირთა ურთიერთ დაპირისპირებისა და შეჯახებისა. მისი მოთხრობებისა და პიესების გმირები, — თითქმის ყველანი ამა თუ იმ დასაგმობი და სასაცილო უარყოფითი თვისებებით ხასიათდებიან. მაგრამ ყოველი მათგანის ხასიათის ეს მანკიერებანი წარმოშობილია და განპირობებული მათი გარემომცველი სოციალური სინამდვილის ბუნებით, გაბატონებული საზოგადოებრივი და სახელმწიფოებრივი წყობილების უკუღმართობით. ამიტომ მწერალთან ერთად მკითხველიც გულისტკივილით და სიბრაღულით ეპყრობა კერძომესაკუთრულ ინსტიქტებით დაბრმავებულ

მოხუცს კაცია საგუნაშვილს, თუ დრომოკმული პატრიარქალური ცრურწმენით გაბოროტებულ დედაბერს ფეფენას, მატყუარა და ცბიერ მაჭანკალს სოლომონ მორბელაძეს, თუ ღვიძლი ძმის მოსალოდნელი დაბადებით მომაკვდინებლად შეშინებულ პლატონ სამანიშვილს. ყველა ესენი, როგორც დავით კლდიაშვილის თითქმის ყველა ნაწარმოებთა სხვა პერსონაჟები, ცხოვრების უკუღმართი პირობების მიერ დამახინჯებული და გაუბედურებული ადამიანები არიან. «სწორედ ამ ადამიანთა სავალალო ხვედრის, მათი სასაცილო თუ საბრალო მდგომარეობის გამოხატვით ახასიათებს და ამხელს მწერალი იმ საძულველ საზოგადოებრივ წყობილებას, რომლისადმი შეურიგებლობის გრძნობაც ასაზრდოებს დავით კლდიაშვილის შემოქმედების იდეურ პათოსს. ✕

ღდავით კლდიაშვილი გასული საუკუნის ოთხმოცდაათიანი წლების დამდეგს გამოვიდა ქართული მწერლობის სარბიელზე და სწორედ ამ წლებში შექმნა მან თავის უმნიშვნელოვანეს ნაწარმოებთა დიდი ნაწილი. ამ წლების მძაფრ, გართულებულ სოციალურ ვითარებაში ჩამოყალიბდა და გამომუშავდა მწერლის მსოფლმხედველობა, მისი საზოგადოებრივი იდეალები და მხატვრული ინდივიდუალობა. ეს წლები — გასული საუკუნის მიწურული ჩვენი სამშობლოს ისტორიის უაღრესად მნიშვნელოვან პერიოდს წარმოადგენს. სამრეწველო კაპიტალიზმის მძლავრმა აღმავლობამ და პროლეტარული რევოლუციური მოძრაობის წარმოშობა-განვითარებამ ამ წლებში ძირფესვიანად შესცვალა ჩვენი ქვეყნის სოციალური ვითარება, გააღრმავა და გაამძაფრა კლასობრივი წინააღმდეგობანი ქალაქად და სოფლად, და, ბუნებრივია, ღრმა ცვლილებანი და სიახლენი გამოიწვია საზოგადოებრივი აზრის განვითარებაში, ხალხის მთელს იდეოლოგიურ ცხოვრებაში. ✕

სწორედ ამ წლებში დაიწყო მარქსისტული მოძღვრების ინტენსიური გავრცელება საქართველოში, აღმოცენდა პირველი სოციალ-დემოკრატიული ორგანიზაციები, რომლებიც ისტორიულად მოწოდებული აღმოჩნდნენ სათავეში ჩადგომოდნენ ქართველი ხალხის განმათავისუფლებელ ბრძოლას ახალ ისტორიულ ვითარებაში.

ყოველივე ამას, ცხადია, არ შეეძლო გამოხატულება არ ეპოვნა მახტვრულ ლიტერატურაში, ახალი გზებით არ წარმართა მისი შემდგომი განვითარება. თავისი მრავალსაუკუნოვანი ისტორიის მთელს მანძილზე ქართული მწერლობა თავისი მოწინავე წარმომადგენლების სახით ყოველთვის განუყოფელად იყო დაკავშირებული ხალხის ბრძოლასთან სოციალური პროგრესისა და ეროვნული თავისუფლებისათვის, ასახავდა ამ ბრძოლას, უმღეროდა მას, გამოდიოდა ამ ბრძოლის იდეურ მესვეურად და სულისჩამდგმელად. არც ამ შემთხვევაში გადაუხვევია ქართულ მწერლობას მისი იმ სახელოვანი ტრადიციისაგან. გასული საუკუნის მიწურულის გართულებულ საზოგადოებრივ ვითარებაში ქართული მწერლობის სარბიელზე გამოვიდა ბელეტრისტთა მთელი პლეადა, რომელმაც ახალ საფეხურზე აიყვანა ქართული კრიტიკული რეალიზმი, მეტი სიმძაფრე და ბრძოლისუნარიანობა შესძინა მას.

ქართული კრიტიკული რეალიზმის ამ ახალ სკოლას მწერლობის სარბიელზე შემოუძღვა ეგნატე ნინოშვილი, რომლის შემოქმედებაშიც მძლავრად დაჰბერა ჩვენი სამშობლოს ისტორიის ამ ახალი პერიოდისათვის დამახასიათებელი მძაფრი სოციალური კონფლიქტების, კლასობრივი ბრძოლების სულმა. დავით კლდიაშვილთან ერთად, თითქმის ერთდროულად, შემოქმედებითი მოღვაწეობა დაიწყეს ვასილ ბარნოვმა, შიო არაგვისპირელმა, ანასტასია ერისთავ-ხოშტარიამ და სხვებმა. უკვე მაშინ ქართულ ლიტერატურულ კრიტიკაში აზრთა მწვავე წინააღმდეგობამ იჩინა თავი ამ ახალი ლიტერატურული სკოლის შეფასებაში, იმ საკითხის გარკვევაში, თუ რა ადგილი მიეკუთვნება მწერალთა ამ ახალ თაობას ჩვენი ეროვნული ლიტერატურის ისტორიაში. როგორც ცნობილია, გამოთქმული იყო აზრი, თითქოს ამ მწერალთა შემოქმედებას ერთგვარად დაექვეითებინოს და გაედარიბებინოს ილია ჭავჭავაძის და მისი სახელოვანი თანამებრძოლების მიერ შექმნილი დიდი ლიტერატურული ტრადიციები. ამ აზრს პრინციპულად წინააღმდეგ ქართული მარქსისტული ლიტერატურული კრიტიკის ერთ-ერთი ფუძემდებელი, საქართველოს კომუნისტური ორგანიზაციების ერთ-ერთი დამაარსებელი ალექსანდრე წულუკიძე.

მან ქართულ მწერლობაში მოსული ამ ახალი პლედის დიდი ღირსება და ღვაწლი იმაში დაინახა, რომ ამ თაობის მწერალთა შემოქმედებაში სიმართლით აისახა ახალი სოციალური ვითარების დამახასიათებელი პროცესები, გამოიხატა ახალი დროების მიერ ისტორიის სარბიელზე გამოყვანილი სოციალურ ძალთა განმასახიერებელი ტიპური ადამიანური სახეები. იმ მხატვრულ ნაწარმოებთა შორის, რომლებითაც ალექსანდრე წულუკიძე თავის ამ დებულებას ასაბუთებდა, თვალსაჩინო ადგილი ეჭირა დავით კლდიაშვილის მოთხრობებს. უკვე მაშინ, მწერლის შემოქმედებითი ცხოვრების დაწყებისთანავე აშკარა იყო, რომ დავით კლდიაშვილი ახალი ლიტერატურული ეპოქის ერთ-ერთ მთავარ ფიგურას, მის ნამდვილ მშვენიერებას და სიამაყეს წარმოადგენდა. მწერლის შემდგომმა შემოქმედებითმა მოღვაწეობამ და ქართული მწერლობის ისტორიის შემდგომმა მსვლელობამ კიდევ მეტი სიკნაღით დაადასტურა ეს ქეშმარიტება.

სხვადასხვა ასპექტით აშუქებდნენ დასახელებული ბელეტრისტები თავის თანამედროვე სინამდვილეს, სხვადასხვაგვარი იყო მათი თემატიკაც, მოქალაქეობრივი ტემპერამენტიც, მხატვრული ნიჭიერების ხასიათიც და ძალაც. ეგნატე ნინოშვილმა, რომლის შემოქმედებასაც უფრო მეტი სოციალური სიმძაფრე, უფრო მკაფიოდ გამოვლენილი პოლიტიკური ტენდენციები ახასიათებდა, თავის მთავარ გმირად აირჩია უკიდურესად გადატაკებული გურული გლეხკაცობა, რომელიც უკვე გაშქვალული იყო გაბატონებული წყობილებისადმი მრისხანე პროტესტისა და მღელვარე უკმაყოფილების გრძნობით, რევოლუციური სულისკვეთებით. ასეთი სოციალური ტიპი იდგა ნინოშვილის შემოქმედების ცენტრში და ამ ტიპისადმი მიმართების თვალსაზრისით აშუქებდა იგი ქართული სოფლის სარბიელზე იმ დროს მოქმედი ყველა სოციალური ფენის ხასიათსა და მდგომარეობას. ვასილ ბარნოვმა, რომელმაც თავისი შემოქმედებითი პოტენციის უდიდესი ნაწილი საქართველოს ისტორიული წარსულის მხატვრულად გაცოცხლებას და წარმოსახვას მოანდომა, თავისი თანამედროვე სინამდვილე დაახასიათა, როგორ „გველის ზეიმი“ და ამ სინამდვილის გა-

ბატონებულ ძალას, კაპიტალისტთა კლასს ამავე სახელწოდების მოთხოვნაში გარდაუვალი დაღუპვა, აუცილებელი კატასტროფა უწინასწარმეტყველა. ამ მწერლის მხატვრული ხილვა თანაბარი მამხილებელი ძალით წვდებოდა იმდროინდელ სოფლის ვითარებასაც და ბურჟუაზიული ქალაქის ცხოვრებასაც, ქალაქისა, სადაც მას უპირატესად წვრილ ხელოსანთა სამყარო იზიდავდა და აინტერესებდა. შიო არაგვისპირელმა თავის ფსიქოლოგიურ ნოველებსა და ეტიუდებში პირველმა ქართველ მწერალთა შორის მზის სინათლეზე გამოიტანა ბურჟუაზიული საზოგადოების ზნეობრივი გახრწნილება, მისი შემზარავი ამორალიზმი, ხოლო ანასტასია ერისთავ-ხოშტარიამ თავის პოპულარულ რომანებში „მოლიბულ გზაზე“ და „ბეჭდის ტრიალი“ წარმოსახა ქართული სოფლის ძველი, პატრიარქალური ცხოვრების უღმობელი რღვევა ახალ სოციალურ ვითარებაში და გამოავლინა ის მწვავე წყლულები და ტკივილები, რომლებიც ამ ახალმა ვითარებამ განუმზადა ადამიანს, კერძოდ კი — ქალს.

დავით კლდიაშვილის ყურადღება კი ამ ახალი სოციალური ვითარების ერთ-ერთმა ძირითადმა პროცესმა მიიპყრო. ეს იყო ფეოდალური საზოგადოების დაუნდობელი რღვევისა და საბოლოო დაკნინების პროცესი, რამაც თავის უკიდურესობას სწორედ გასული საუკუნის მიწურულში მიაღწია, ჩვენს ქვეყანაში კაპიტალისტური მეურნეობის მძლავრი აღმავლობისა და განვითარების ხანაში გალატაკებული იმერელი აზნაურობის ყოფა-ცხოვრება აირჩია დავით კლდიაშვილმა თავისი შემოქმედების ძირითად თემატიკურ მასალად და ეს გალატაკებული, ისტორიის მიერ უღმობლად განწირული აზნაური გახდა მან თავის საუკეთესო ქმნილებათა მთავარ პერსონაჟად. მწერალი თვითონ იყო წარმომოხილი და აღზრდილი იმერეთის გაღარიბებულ აზნაურობის წრეში და ამიტომაც ზედმიწევნით იცნობდა ამ წრის ადამიანებს, მათს სულისკვეთებას, მათს სოციალურსა და ყოფაცხოვრებითს ვითარებას. ✓

როგორც მისი უფროსი თანამედროვენი და უშუალო წინამორბედნი — ილია ჭავჭავაძე, აკაკი წერეთელი და გიორგი წერეთელი, — დავით კლდიაშვილიც ოდნავაც არ განსაზღ-

ვრულა თავისი წარმომშობი კლასის მსოფლმხედველობით და ინტერესებით. პირიქით, თავის მხატვრულ ქმნილებებში მან უღრმესი სიმართლით ამხილა ფეოდალური სამყაროს სასიკვდილო განწირულება და დაუნდობლად გამოამხეურა თავადაზნაურული წოდების უკანასკნელი მოდგმის მთელი სულიერი სიწვრილმანე და სიცარიელე, მისი აზრებისა და მიზნების უბადრუკი უფერულობა, მისი სულისკვეთების თან საბრალო და თან სასაცილო უმწეობა.

სინამდვილის ამ ერთი პროცესის მასალაზე, ამ ერთი კუთხიდან გააშუქა უპირატესად დავით კლდიაშვილმა თავისი თანამედროვეობის უაღრესად გართულებული სოციალური შინაარსი. მან დახატა თავადაზნაურული სამყაროს მწუხრის ამსახველი ცხოველი და წარუშლელი მხატვრული ძალის სურათები, რომლებიც ღირსეულად შეგვიძლია გვერდით დავუყენოთ ამ თემაზე დაწერილ შედეგებს მსოფლიო ლიტერატურისა — სერკანტესის „დონ-კიხოტიდან“ გოგოლის „მკვდარ სულებამდე“.

როგორც ვხედავთ, სხვადასხვაგვარი იყო ქართული კრიტიკული რეალიზმის ამ ახალი სკოლის შემადგენელ მწერალთა შემოქმედების თემატიკური საფუძველი, მით უფრო განსხვავდებოდნენ ისინი ერთმანეთისაგან მხატვრული გამოსახულების საშუალებათა სფეროში, სამწერლო სტილის, ნიჭიერების ხასიათის, მხატვრული ინდივიდუალობის თვალსაზრისით. მაგრამ მათ ერთმანეთთან ანათესავებდა მძაფრად კრიტიკული, უარყოფელი, მამხილებელი მიმართება იმდროინდელი საზოგადოებრივი სინამდვილისადმი. ყოველი მათგანის შემოქმედება წარმოადგენს სხვადასხვაგვარ მხატვრულ დასაბუთებას და გამოსახვას ადამიანის უკიდურესა ჩაგვრისა და შევიწროებისა, მისი ყველა კეთილშობილური მისწრაფებისა და ოცნების დასალუპავად განწირულების იმ ბნელ და უხეშ სინამდვილესთან შეჯახებაში, რომელიც მაშინ ჩვენს ქვეყანაში სუფევდა. ასეთი პოზიციიდან აღიქვამდნენ და აშუქებდნენ ეს მწერლები ცხოვრებას და მათი ეს მწვავე მამხილებელი პათოსი ანარეკლი იყო ხალხის მზარდი პროტესტისა და უკმაყოფილებისა, მისი შეუპოვებელი სიძულვილისა თვით-

მპყრობელური, ბურჟუაზიულ-მემამულური ტირანიისადმი. მართალია, ამ მწერლების ნაწარმოებებში უშუალოდ არ გამოხატულა მათთვის ესოდენ საძულველი სინამდვილის დამხობისა და ცხოვრების გარდაქმნისათვის ისტორიულად მოწოდებული ერთადერთი სოციალური ძალა — მუშათა კლასი და მისი საბრძოლო შემართება, მაგრამ ამ პერიოდის ქართული მწერლობის მგზნებარედ მამხილებელი სული დიდად ხელს უწყობდა ხალხის საბრძოლოდ შეიარაღებისა და აღფროვანების საქმეს.

სწორედ ამიტომ იმსახურებდა მალალ შეფასებას და იხვეჭდა ფართო პოპულარობას საზოგადოების მოწინავე ფენებში ამ ლიტერატურული მოძრაობის გამოჩენილი წარმომადგენლის დავით კლდიაშვილის შემოქმედება მისი სამწერლო ბიოგრაფიის პირველი დღეებიდანვე:

ცნობილია, რომ დავით კლდიაშვილის სიჭაბუკის წლებმა, მისი სწავლა-აღზრდის ხანამ სამშობლოსაგან დაშორებით, ჯერ კიევსა და შემდეგ მოსკოვში განვლო, სადაც იგი საშუალო და უმაღლეს სამხედრო სასწავლებლებში სწავლობდა. ამ წლების განმავლობაში იგი კარგად დაეუფლა რუსულ ენას, შეისწავლა და შეისისხლხორცა პროგრესული რუსული კულტურის, კერძოდ, დიდი რუსული ლიტერატურის მთელი სიმდიდრე. აღრინდელი ლიტერატურული წრთობის წლებში მომავალმა მწერალმა თავისი პირველი ცდები მხატვრული შემოქმედების დარგში რუსულ ენაზე განახორციელა, შემდეგ მოსკოვის სამხედრო სასწავლებელში გატარებულ წლებში იგი ხელნაწერ ჟურნალს სცემდა რუსულ ენაზე და ამ ჟურნალის მასალის დიდ ნაწილს თვითონ წერდა. ამ წლებში მან რუსულად თარგმნა ნიკო ლომოურის მოთხრობა „ალი“.

თავისი დიდი შემოქმედებითი მოღვაწეობისათვის სამზადისის ხანაში დავით კლდიაშვილი ქართულად თარგმნიდა და აქვეყნებდა გერმანული და ფრანგული ლიტერატურის ნიმუშებს. ამრიგად აღრეული სიჭაბუკის წლებშივე იგი გაეცნო და ეზიარა რუსულ და ევროპულ კულტურას. ამ გარემოებას, რასაკვირველია, არ შეეძლო კეთილმყოფელი გავლენა არ მოეხდინა მომავალი მწერლის ერუდიციაზე, არ გაეფართოე-

ბინა მისი ინტერესების სფერო, ინტელექტუალური პორიზონტი. მაგრამ მისი აზროვნებისა და მხატვრული ინდივიდუალობის განმაპირობებელ უპირველეს ფაქტორს, მთავარ მასაზრდობებელ წყაროს ქართველი ხალხის ცხოვრება და ქართული კლასიკური მწერლობის სახელოვანი დემოკრატიული და რეალისტური ტრადიციები შეადგენდა. მწერლის ბიოგრაფია ნათლად მოწმობს, თუ როგორ სისხლხორცეულად იყო დაკავშირებული იგი თავისი ქვეყნის, თავისი ხალხის ცხოვრებასთან, როგორ აქტიურად მონაწილეობდა საზოგადოებრივი ცხოვრების პროცესში და თავის შემოქმედებასა და მოღვაწეობაში ცხოვლად ეხმაურებოდა ცხოვრების ყველაზე აქტუალურ მოთხოვნებს, ცოცხალი სინამდვილის მოვლენებს. დავით კლდიაშვილის ავტობიოგრაფიული ნაწარმოები მთლიანად გამსჭვალულია უღრმესი სიყვარულის გრძნობით ქართული კლასიკური მწერლობის კორიფეებისადმი, როგორც თავისი დიდი მასწავლებლების ილია ჭავჭავაძისა და აკაკი წერეთლისადმი, აგრეთვე უფროსი თანამედროვეებისა და თანამოკალმეების ვაჟა-ფშაველას, გიორგი წერეთლის, ალექსანდრე ყაზბეგის, ეგნატე ნინოშვილისადმი. ამრიგად, დავით კლდიაშვილის რეალიზმი და ჰუმანიზმი, მისი შემოქმედების ღრმად დემოკრატიული მიზანსწრაფვა და მოქალაქეობრივი პათოსი ორგანიულად არის ამოზრდილი ქართული საზოგადოებრივი სინამდვილიდან, გასული საუკუნის ქართული კლასიკური მწერლობის სახელოვანი ტრადიციებიდან. დავით კლდიაშვილმა განაწილათარა და აამაღლა ეს ტრადიცია, მან გაამდიდრა და გააფართოვა ქართული კრიტიკული რეალიზმის ცხოვრებისეული სიმართლე, მის გამომსახველობით საშუალებათა არსენალი, მისი ძალა და შესაძლებლობა სინამდვილის მოვლენათა ცოცხლად და შთამაგონებლად წარმოსახვისა. -

თავისი ავტობიოგრაფიული ნაწარმოების მოკლე წინასიტყვაობაში დავით კლდიაშვილი წერს: „მოკლე მოგონებებში არაფერი შეფერადებული არ იქნება. იქნება მხოლოდ სინამდვილე, სინამდვილე, რომელსაც გადაუხრელად ვემსახურებოდი მთელი ჩემი მწერლობის განმავლობაში“. ამ სიტყვებში პირუთენელი სიმართლით არის დახასიათებული მწერლის მთელი

შემოქმედებითი ბუნება. სინამდვილე, მწერლის მიერ უშუალოდ გაცნობილი და ღრმად განცდილი სინამდვილე წარმოადგენს მისი შთაგონების წყაროს.

დადგენილია, რომ დავით კლდიაშვილის მიერ დახატული ტიპები წარმოდგენენ სინთეტურ სახეებს იმ ადამიანებისა, რომელთაც მწერალი პირადად იცნობდა. თითქმის ყოველ მათგანს ჰყავდა ცოცხალი პროტოტიპი მწერლის გარემომცველ ადამიანურ სამყაროში. ზოგ ასეთ პროტოტიპს მწერალი პირდაპირ გვისახელებს კიდევ თავის მემუარულ თხზულებაში. ცნობილია აგრეთვე, რომ დავით კლდიაშვილის ნაწარმოებთა სიუჟეტი უშუალოდ დამყარებულია ნამდვილად მომხდარ ამბებზე, რომელთაც მწერალი გარდაქმნიდა ხოლმე თავისი მხატვრული შემეცნებისა და გარკვეული შემოქმედებითი მიზანდასახულების მიხედვით.

გამჭრიახი და დაკვირვებული თვალი, რომელიც თანაბარი სიღრმით წვდება როგორც ყოფაცხოვრებით დეტალებს, ისე პერსონაჟთა სულიერი ცხოვრების ყოველ კუთხეს, იშვიათი უნარი ადამიანთა ყოველდღიური ურთიერთობის ამათუიბ წვრილმანში მთელი სოციალური ფენისათვის დამახასიათებელ ტიპიურ თვისებათა აღმოჩენისა და წარმოსახვისა, ცოცხალ, ღრმად ინდივიდუალურ ადამიანურ ხასიათთა გამოხატვის უბადლო ნიჭიერება და თხრობის უკიდურესი სიცხადე და ბუნებრიობა შეადგენს დავით კლდიაშვილის, როგორც დიდი რეალისტი მხატვრის, როგორც სიტყვის პირველხარისხოვანი ხელოვანის უმთავრეს ღირსებას. დავით კლდიაშვილი დიალოგის ბრწყინვალე ოსტატია. გმირის მეტყველებას უპირველესი ადგილი უჭირავს მხატვრულ გამომსახველობით საშუალებათა შორის, რომელთა მეოხებით მწერალი ასე ცოცხლად ხატავს თავის პერსონაჟთა მრავალფეროვან გალერეას. მისი მოთხრობების გმირთა ყოველი ფრაზა ზუსტად არის გამიზნული ხასიათის თავისებურებათა დასრულებულად გადმოცემისათვის. არა მარტო ლექსიკური და სინტაქსური სიზუსტით აღწევს დავით კლდიაშვილი უდიდეს გამომსახველობითს ძალას. მწერალს ესმის ყოველი მოქმედი პირის სპეციფიკური ინტონაცია, გამოთქმის კილო, ხმის ელფერიც კი და ყოველი-

ვე ამას გადმოსცემს საოცარი სიცხადით, საგრძნობლად. გასაგონად.

დავით კლდიაშვილის ნაწარმოებთა პერსონაჟები წარუშლელი ძალით ცოცხლობენ მკითხველის მეხსიერებაში, რადგან ისინი განზოგადებულ ტიპიურ სახეებსაც წარმოადგენენ და მკაფიოდ გამოძერწილ ღრმად თავისებურ ადამიანურ ხასიათებსაც. თითქმის არასოდეს მწერალი საგანგებოდ არ მიმართავს პერსონაჟის დახასიათებას, მისი გარეგანი პორტრეტის თუ სულიერი სამყაროს თავისებურებათა გაცნობას მკითხველისათვის. მწერალი მხოლოდ ალაპარაკებს და ამოქმედებს თავის გმირებს და ამ მოქმედებასა და მეტყველებაში თანდათანობით იშლება გმირის სულიერი ცხოვრების სურათიც, მისი გარეგნული გამომეტყველებაც ისეთი ფსიქოლოგიური სიმართლით, რომ სამუდამოდ აღიბეჭდება მკითხველის ცნობიერებაში. მწერალი ფლობს ადამიანურ ხასიათთა ხატვის საოცარ საიდუმლოებას. ასევე განუმეორებლად თავისებურია მისი ხელწვნიება ყოფაცხოვრებითი მასალის ცოცხლად და კოლორიტულად წარმოსახვისა. აქაც დავით კლდიაშვილი დეტალების, ნიუანსების უბადლო მხატვრად გვევლინება და სწორედ ამ გზით აღწევს აღწერილობის აბსოლუტურ სიზუსტეს და შთამბეჭდავ ძალას. მის მოთხრობებში ჩვენ ვერ შევხვდებით განვრცობილ პეიზაჟებს და მოქმედების განზრახ შენელებას გარემოცვის გამოყოფილად, საგანგებოდ დახასიათებისათვის. მაგრამ თხრობის მსვლელობაში, გმირთა მოქმედებისა და მეტყველების ბუნებრივ განვითარებაში წარმოსახება იმდენად ხელსაღები, კოლორიტული და დასრულებული სურათი ამ გარემოცვისა, რომ ჩვენ თითქოს თვითონ ვცხოვრობთ ამ გარემოცვაში; მწერალს შეუმჩნევლად, ბუნებრივად გადაყავს მკითხველი აღწერილ ურთიერთობათა გარემოში, მის ატმოსფეროში და ემოციურად შეყავს იგი თხრობის მდინარეებაში. მხატვრული აღწერილობის ხელოვნების სფეროშიც დავით კლდიაშვილი ფლობს იშვიათ ოსტატობას, მხოლოდ მისთვის დამახასიათებელ და მისაწვდომ საიდუმლოებას. ყოფაცხოვრებითი დეტალების ზღწერა დავით კლდიაშვილის ნაწარმოებებში არასოდეს არ არის თვითმიზანი. ყო-

ველ აღწერილობას გარკვეული აზრობრივი დანიშნულება აქვს — გვისურათებს ტიპიურ გარემოცვას, პერსონაჟთა სოციალურ ვითარებას, მათს ქონებრივ მდგომარეობას, ხასიათის თავისებურებას.

დავით კლდიაშვილის შემოქმედების მკვლევარები რატომღაც ნაკლებ ყურადღებას უთმობენ მწერლის მომთხრობლობით ხელოვნებას, მის იშვიათს ოსტატობას გონებამახვილურად ჩაფიქრებული ფაბულის ჩამოყალიბებისა და სიუჟეტური კომპოზიციის სფეროში. დავით კლდიაშვილის ნაწარმოებთა სიუჟეტებს არ მოეპოება ანალოგიები არც მშობლიურსა და არც მსოფლიო ლიტერატურაში. მის საუკეთესო ქმნილებებში მოთხრობილი ამბავი უაღრესად ორიგინალურია, დამოუკიდებელი და თვითმყოფი. მათში არაფერია განზრახ შეთხზული მკითხველის დაინტერესებისა და გართობისათვის. ყოველი სიუჟეტური მოტივი მის მხატვრულ ქმნილებებში ღრმა აზრით არის გამსჭვალული და ორგანულად დაკავშირებული ნაწარმოების მთელ იდეურ-ესთეტიკურ შინაარსთან.

ერთი და იმავე სოციალური ვითარების ამსახველი, ერთი და იმავე იდეური ჩანაფიქრის განმასახიერებელი ნაწარმოებნი დავით კლდიაშვილისა აგებულია სრულიად სხვადასხვაგვარ ფაბულურ საფუძვლებზე და ერთმანეთისაგან ღრმად განსხვავებულ სიუჟეტურ სიტუაციებზე, როგორც სრულიად სხვადასხვაგვარი ხასიათისაა ერთდამავე სოციალური ფენის წარმომადგენელთა სახეები მწერლის მიერ დახატულ მდიდარ გალერეაში.

მხატვრული სიმართლის მხრივ, ცხოვრებისეულ მოვლენათა ცოცხლად და დამარწმუნებლად წარმოსახვის, ტიპიურ ადამიანურ ხასიათთა მკაფიოდ გამოკვეთის, აღწერილობათა სიზუსტის, თხრობისა და ნახატის ბუნებრიობის მხრივ დავით კლდიაშვილმა დიდად წინ წასწია და აამალა ქართული კლასიკური რეალიზმი. მრავალსაუკუნოვანი ტრადიციებით მდიდარ ქართულ მხატვრულ პროზას არ ჰყოლია და არა ჰყავს ოსტატი, რომელიც ამ მხრივ დავით კლდიაშვილზე შორს წასულიყოს. სწორედ ამიტომ დაიმკვიდრა დავით კლდიაშვილმა ღირსეული ადგილი ჩვენი ეროვნული მხატვრული

პროზის უპირველეს ოსტატთა, მის კლასიკოსთა შორის. მაღალი საზოგადოებრივი იდეალებით შთაგონებული მწერლისათვის თანაბრად უცხოა სინამდვილის ემპირიულ-ნატურალისტური წარმოსახვა და ცრუ-რომანტიკული პათეტიკაც, მის მხატვრულ ქმნილებებში არაფერია ხელოვნური, მანერული, განზრახ თავზე მოხვეული. მათში ყველაფერი სუნთქავს თანამედროვეობის გრძნობით, ცხოვრებისეული სიმართლით და ბუნებრივობით, მაღალი მოქალაქეობრივი იდეალებით.

დავით კლდიაშვილის შემოქმედებითი მემკვიდრეობა ორ ძირითად თემატიურ რკალად იყოფა. პირველ მათგანს ის ნაწარმოებნი შეადგენენ, რომლებშიც მწერალმა რეფორმის-შემდგომი დროის ქართული სოფლის, კერძოდ, გლეხობის დუხჭირი ცხოვრება წარმოსახა. მეორე და უმნიშვნელოვანესი ციკლი დავით კლდიაშვილის ქმნილებებისა შეიცავს თავდაზნაურული სამყაროს კვდომის, მისი სულიერი დაკნინების, უკიდურესი ნიჭთიერი და სულიერი გადატაკების ამსახველ: მოთხრობებსა და პიესებს.

თავის პირველ მხატვრულ ნაწარმოებში — მოთხრობაში „შერისხვა“ მწერალმა დიდი მხატვრული დამაჯერებლობით გამოხატა ის დამღუპველი ზეგავლენა, რასაც ახდენს ადამიანის ხასიათზე. მის ცხოვრებაზე კერძომესაკუთრული შეგნება და მისგან წარმომდგარი ცხოველური ეგოიზმი. ამ მოთხრობის გმირმა მოხუცმა გლეხმა კაცია საგუნაშვილმა ორი მტკაველი საყანე მიწისთვის ბრძოლა გამოუცხადა მთელ სოფელს, გადაიმტერა მეზობლები და ბოლოს აუჯანყდა ღმერთსაც, რომლისადმი რწმენით, შიშითა და ძრწოლით იყო მოცული მთელი მისი არსება. ამ უთანასწორო ბრძოლაში კაციამ დაკარგა სულიერი სიმშვიდე და წონასწორობა, იგი დაუძლურდა, დასნეულდა და მოკვდა ყველასაგან მოძულეებული და განკიცხული, მთელი სოფლისაგან გარიყული და განმარტოებული. თავისი გმირის ასეთი უბედური თავგადასავლის მოთხრობით მწერალმა ამხილა ბურჟუაზიულ-მემამულური წყობილების უმთავრესი საყრდენი—კერძომესაკუთრული შეგნება და, მაშასადამე, თვით ის წყობილებაც რომელიც ადამიანის ასე გამაბოროტებელ და დამღუპველ ძალას ემყარება

კიდევ უფრო მეტად გაღრმავდა და გამძაფრდა დავით კლდია-
შვილის შემოქმედების მამხილებელი პათოსი მომდევნო მოთ-
ხრობაში „მსხვერპლი“. აქ მწერალმა დახატა შემზარავი სურა-
თი რევოლუციამდელი ქართული სოფლის, მშრომელი გლე-
ხობის ბნელი და გაუხარელი ცხოვრებისა, სადაც უმეცრების,
სიღატაკის, ათასგვარი ცრუმორწმუნეობისა და პატრიარქალუ-
რი ენგის ძალა უღმობლად თელავს და ანადგურებს ადამიანის
ყოველ კეთილშობილურ მისწრაფებას; მის ადამიანურ ღირსე-
ბას, სიცოცხლისა და ბედნიერების უფლებას. მართალია, მოთ-
ხრობაში გამოხატული ჯოჯოხეთური წყევლიადის მსხვერპლად
სრულიად უდანაშაულოდ დაღუპული ახალგაზრდა გლეხი
ქალი — მშვენებითა და კეთილშობილებით აღსავსე მარინეა
გამოყვანილი, მაგრამ არსებითად სოფლად გამეფებული სიბ-
ნელისა და ბოროტების ამგვარსავე უნუგეშო მსხვერპლს წარ-
მოადგენენ მოთხრობის სხვა პერსონაჟებიც; ამ ორი მხატვრუ-
ლი ნაწარმოებით მწერალმა ისეთი ამაღელვებელი ძალით
გამოხატა იმდროინდელი საზოგადოებრივი სინამდვილის წყლუ-
ლები და მანკიერებანი, რომ შეუძლებელი იყო ამ შემზარავ
სურათს გამოძახილი არ ეპოვნა ხალხის გულში, ცხოვრების
გარდაქმნისა და განახლების დაუცხრომელი მისწრაფება არ
აღეძრა მკითხველთა შეგნებაში.

სიღატაკით და უმეცრებით გონებადაბნელებული, სასოწარ-
კვეთილი გლეხის უნუგეშო ცხოვრების შესახებ მოგვითხრო
მწერალმა ღრმა დრამატიზმით გამსჭვალულ მოთხრობაში
„მიქელა“. ამ ნაწარმოების გმირმა, მის ოჯახში დატრიალებუ-
ლი უბედურებით დამფრთხალმა და გაბოროტებულმა ღარიბმა
გლეხმა მიქელამ ცრუმორწმუნეობრივი ადათის მიხედვით
სასიკვდილოდ გასწირა, გამძვინვარებული ბუნების სტიქიის
მსხვერპლად აქცია თავისი ავადმყოფი ვაჟი. შეუძლებელია
აუღელვებლად წაკითხვა ამ ნაწარმოებისა, რომლის იდეურ
პათოსს იმის ჩვენება წარმოადგენს, თუ როგორ სპობს ადა-
მიანის ბუნებაში ყოველგვარ ჰუმანიზმს და კეთილშობილურ
საწყისს, თვით მშობლიურ გრძნობასაც კი, ის ყოველისდამთრ-
გუნველი წყევლიადი, რომელიც სუფევდა სოფლად ბურჟუა-
ზიულ-მემამულური წყობილების პირობებში. გლეხობის აუწე-

რელ სიღარიბეს და ამ ნიადაგზე ყოველგვარ კეთილშობილურ ადამიანურ გრძნობათა დაჩლუნგებას ასახავს ავრეთვე მოთხრობა „მრეელი“.

დავით კლდიაშვილის შემოქმედების ამ ციკლის უძლიერეს ნაწარმოებს წარმოადგენს პიესა „უბედურება“, რომელიც მწერალმა პირველი იმპერიალისტური ომის წლებში დაწერა. მძაფრი ტრაგედიული ელერის ამ ნაწარმოებში ძლიერად არის წარმოსახული ის განუზომელი მწუხარება და უბედურება, რაც ხალხს თავს დაატეხა ბარბაროსულმა რევოლუციონარმა ომმა.

ეს ნაწარმოებნი ქართული კრიტიკული რეალბზმის საუკეთესო მიღწევებია რიცხვს მიეკუთვნება. მათი იდეურ-ესთეტიკური ღირებულება და მნიშვნელობა შორს სცილდება იმ კონკრეტულ-ისტორიული ვითარების ფარგლებს, რომლებმაც ისინი წარმოშვა და განაპირობა. ეს ნაწარმოებნი ახლაც ამღელვარებენ ჩვენს აზრსა და გრძნობას, წარმართავენ ჩვენს ცნობიერებას ყოველივე ბნელის, ბოროტის, მანკიერისა და დრომოკმულის წინააღმდეგ, მაღალი, კეთილი, ჰუმანური იდეალების დამკვიდრებისათვის საბრძოლველად.

მაგრამ დავით კლდიაშვილის შემოქმედებითი მემკვიდრეობის უძვირფასეს საგანძურს ის მხატვრული ქმნილებები შეადგენენ, რომლებშიც მწერალმა იმერეთის ვადატაკებული აზნაურობის ყოფა-ცხოვრების მასალაზე შექმნა დიდი გახჯოგადებითი მნიშვნელობის ფართო მხატვრული პანორამა, გამომსახველი არა მარტო ფეოდალური სამყაროს მწუხრისა. და დაკნინებისა, არამედ საერთოდ ყოველი დრომოკმული, წარმატებისა, რეაქციული სოციალური ძალის აუცილებელი სასიკვდილო განწირულებისა. „სოლომან მორბელაძე“, „სამანიშვილის დედინაცვალი“, „ქამუშაძის გაჭირება“, „ირინეს ბედნიერება“, „დარისპანის გასაჭირი“ — ეს ის უჩუქნობი მხატვრული შედეგებია, რომლებითაც დავით კლდიაშვილმა გაამდიდრა და დაამშვენა ჩვენი ეროვნული ლიტერატურის მრავალსაუკუნოვანი ისტორია. სწორედ ამ ნაწარმოებებში გამობრწყინდა მთელი სისრულით და ძალით ამ დიდი რეალისტის მხატვრული ნიჭიერების ის ძვირფასი თავისებურებანი, რომელთა მეოხე-

ბითაც დავით კლდიაშვილმა სამუდამოდ დაიმკვიდრა საპატიო ადგილი ქართული მწერლობის კლასიკოსთა შორის. სწორედ ამ უქკნობ მხატვრულ ქმნილებებში ზეიმობს დავით კლდიაშვილის ჰუმანიზმი და რეალიზმი თავის ქემმარიტ გამარჯვებას.

თვითეული ეს ნაწარმოები დიდი მხატვრული სიმართლით და სიღრმით გადაგვიშლის თავადაზნაურული წოდების არამართო უკიდურეს ნივთიერ გადატაკებას, არამედ, რაც განსაკუთრებით მნიშვნელოვანია, იმ სულიერ დაძაბუნებას, დაწვრილმანებას, გაცოფებას და სასოწარკვეთილებასაც. რაც დამახასიათებელია ისტორიის მიერ დასაღუპავად განწირული ყოველი რეაქციული კლასისათვის. მწარედ მოტყუებული და იმედგაცრუებული, უბედური მაჰანკლის სოლომან მორბელაძის, ღვიძლი ძმის დაბადებით უკიდურესად გაცოფებული პლატონ სამანიშვილის, გამოუვალი გაჭირვების შედეგად სოფლიდან გაქცეული და უნუგეშოდ ქალაქში შენიხსული ოტია ქამუშაძის თავგადასავალი უღმობელი სიმართლით გვიჩვენებს, თუ როგორ დაუზოგავად არღვევდა და აცამტკერებდა სინამდვილე დეგრადირებული აზნაურობის შვილთა ყველა იმედს, მოლოდინს, ოცნებასა და მისწრაფებას, რადგან მათი იმედები და მისწრაფებანი მეტად წვრილმანი და უბადრუკი იყო, ხოლო იმედები და მოლოდინი -- უსათუძვლო და უნიადაგო. ასეთია ბედი ყოველი სოციალური ძალისა, რომელსაც საბოლოოდ ამოუწურავს თავისი განვითარების ყველა შესაძლებლობა და გაჯიუტებით ხავსს ჩასჭიდებია საკუთარი სავალალო არსებობის რამდენადმე გახანგრძლივებისათვის. ასეთია ძირითადი დასკვნა, რაც ბუნებრივად გამომდინარეობს დავით კლდიაშვილის საუკეთესო მხატვრული ქმნილებებიდან და სწორედ ამაში მდგომარეობს ამ ქმნილებათა მნიშვნელობა და აქტუალობა ჩვენი დროისათვის.

✓ რა სასაცილო და თანაც საბრალონი არიან დავით კლდიაშვილის ჯადოსნური კალმით დახატული ის „კუდაბზიკა“ აზნაურები, რომლებიც უკიდურესი ნივთიერი სილატაკით გამწარებულნი, გააფთრებით ებლაუჭებიან თავიანთ წოდებრივსა და გვაროვნულ უპირატესობას, ყოველგვარი რეალური შინაარ-

სისაგან დაკლილს, უაზრო რუტინად ქცეულ აზნაურულ ტრადიციებს.✓

მსოფლიო ლიტერატურის ისტორიაში იშვიათია მაგალითი სასაცილოსა და საბრალოს, კომიკურისა და დრამატულის ისეთი ორგანული შეზავებისა, როგორც მიღწეულია დავით კლდიაშვილის საუკეთესო ქმნილებებში.

დიდი რეალისტი მხატვრის უკომპრომისო პირუთენელობით მოგვითხრო დავით კლდიაშვილმა თავის გმირთა გამწვარებული ცხოვრების ისტორია, მაგრამ მის მიერ დახატული პირქუში სურათი იმდროინდელი სინამდვილისა მოკლებული როდი იყო ნათელ მომავალზე ოცნებას, ცხოვრების გარდაქმნისა და ვანახლების წინათგრძნობას. პიესაში „უბედურება“, რომელიც დავით კლდიაშვილმა ნაწარმოებთაგან ყველაზე მუქი საღებავებით არის შესრულებული და განსაკუთრებული ტრაგიკული კლერით გამოირჩევა, მწერალი ერთ-ერთ მოქმედ პირს მაიას ათქმევინებს: „მწუხარება და გაჭირვება არავის გვაკლია, მაგრამ გულმაგრად უნდა ვიყვეთ მაინც!.. თუ ვიმწუხარეთ, თუ ვიჯავრეთ, მაშინ სულ წავხდებით. ვინ იცის საწინაოდ რა მოგველის! დღეს ვწუხვართ, ხვალ ეგებ მხიარული დღე გვითენდება... ვინ იცის, ყველაფერი მოსალოდნელია... გულს ნუ გავიტეხთ, იმედს ნუ დავკარგავთ“. ასეთს გამამხნეველებს, მომავლის რწმენითა და იმედით აღმაფრთოვანებულ სიტყვას ეუბნებოდა დავით კლდიაშვილი სოციალური და ეროვნული მონობით გაწამებულ თავის ქვეყანას.

მცირე მოცულობის მოთხრობაში „მშობლის ნუგეში“ ხალხის ბედნიერებისათვის ბრძოლაში გამირულად დაღუპული ერთადერთი შვილის დაკარგვით თავზარდაცემული უბედური დედა თავის გლოვასა და მწუხარებაში ასეთი რწმენით აღსავსე სიტყვებსაც წარმოთქვამს: „მალე, მალე გათენაცება ნათელი ბრწყინვალე დღე... ბედნიერება მოვა ქვეყნად, მოვა! ბნელ ღამეს შესცვლის ნათელი დღე“... ასეთი შთაგონებული რწმენით და იმედით შეჰყურებდა მაშინ მწერალი ჩვენი ქვეყნის მომავალს. და როცა მისი ეს მგზნებარე ოცნება სინამდვილედ იქცა, მხცოვანმა მწერალმა მთელი გულით გაიხარა და ჭაბუკური გატაცებით მხარში ამოუდგა ახალი ცხოვრების მშენებელ

ხალხს. ხანდაზმელობისა და ფიზიკური დაუძლურების მიუხედავად იგი ღრმა ინტერესით თვალყურს ადევნებდა ჩვენი აღორძინებული სამშობლოს, საბჭოთა საქართველოს ზრდა-განვითარებას და აქტიურადაც მონაწილეობდა მისი წინსვლისათვის გაჩაღებულ საყოველთაო-სახალხო ბრძოლასა და შრომაში.

საბჭოთა წყობილების წლებში დასწერა დავით კლდიაშვილმა რამდენიმე მოთხრობა და ვრცელი ავტობიოგრაფიული თხზულება „ჩემი ცხოვრების გზაზე“. ეს უკანასკნელი ქართული მემუარული ლიტერატურის ერთ-ერთი საუკეთესო ნაწარმოებია. აკაკი წერეთლის „ჩემი თავგადასავლის“ გარდა ქართულ მწერლობაში არ შექმნილა ამ ჟანრის სხვა თხზულება, რომელიც თავისი ფართო შემეცნებითი მნიშვნელობით და თხრობის მხატვრული ძალით დავით კლდიაშვილის მემუარებს შეედრებოდეს.

✕ ქართველი ხალხი, ქართული პრესა და ლიტერატურული კრიტიკა დიდი ინტერესით და მოწონებით ეგებებოდა დავით კლდიაშვილის ყოველ ახალ ნაწარმოებს მწერლის შემოქმედებითი ბიოგრაფიის მთელ გზაზე. ამიტომაც თვით მწერალს თავისი შემოქმედებითი ვსა ბედნიერად განვილილ გზად მიაჩნდა. საბჭოთა საქართველომ 1930 წელს დიდი ზემოთ აღნიშნა დავით კლდიაშვილის სამწერლო მოღვაწეობის 40 წლისთავის იუბილე. მას პირველს მიეკუთვნა საქართველოს რესპუბლიკის სახალხო მწერლის მაღალი სახელწოდება. ხოლო როცა დავით კლდიაშვილი გარდაიცვალა, ქართველმა ხალხმა მეოცე საუკუნის მწერალთაგან იგი პირველი მიაბარა მთაწმინდის მიწას სამუდამოდ განსასვენებლად ჩვენი ერთგული კულტურის უდიდეს მოღვაწეთა გვერდით.

✓ რაც დრო გადის, მით უფრო მეტის დიდებით ამოსება დავით კლდიაშვილის უკვდავი სახელი, მით უფრო ფართო ადგილს იკავებს მისი შემოქმედებითი მემკვიდრეობა საბჭოთა ხალხებისა და მთელი მოწინავე კაცობრიობის სულიერ ცხოვრებაში. ✓

ქართული საბჭოთა მწერლობა სწავლობს და ყოველთვის ისწავლის ამ დიდი კლასიკოსისაგან მხატვრული შემოქმედების

მაღალ იდეურობას, კემმარიტ ხალხურობას და ცხოვრებისეულ სიმართლეს. √

*

დავით კლდიაშვილი დაიბადა 1862 წლის 11 სექტემბერს, იმერეთში, ახლანდელი თერჯოლის რაიონის სოფელ სიმონეთში, ხელმოკლე აზნაურის, სამსონ კლდიაშვილის ოჯახში. ბავშვობის წლები თავის სოფელში და აგრეთვე „დედულში“ — ქუთაისიდან წყალტუბოსაკენ მიმავალ გზაზე მდებარე პატარა სოფელში — ხომულში გაატარა.

დავითის დედის -- კესარია ღოღობერიძის მშობლების ოჯახი წარმოადგენდა შექლებული იმერელი აზნაურის ტიპიურ ოჯახს, რომელმაც დავითის ბავშვობისა და ყრმობის წლებში განიცადა ის რღვევა და ნივთიერი დაქვეითება, რაც დამახასიათებელი იყო მთელი იმდროინდელი აზნაურული წოდებისათვის. ამრიგად, როგორც კლდიაშვილების, ისე ღოღობერიძეების ოჯახში მომავალ მწერალს ბავშვობიდანვე ორგანულად უნდა შეეგრძნო და განეცადა თავადაზნაურული კლასის დაკნინება-გადაგვარების ის დრამა, რომელიც შემდეგ მისი მხატვრული შემოქმედების ძირითად თემად იქცა. მაგრამ თავისი ორივე ბაბუის ოჯახში დავითმა ბავშვობიდანვე გაიცნო და შეისისხლხორცა აგრეთვე გლეხკაცობის ყოფა-ცხოვრებაც, მისი მაშინდელი ღუხჭირი ხვედრიც.

აღწერს რა თავის ავტობიოგრაფიულ თხზულებაში მისი ერთი ბაბუის — ნიკო ღოღობერიძის მდიდრულ სახლ-კარსა და ეზო-მიდამოს, დავით კლდიაშვილი წერს: „ყოველ ამას, აქ მოთავსებულ ქონებას, რასაკვირველია, ბევრი მომვლელი ხელი ეპირვებოდა და ასედაც იყო, — სამზარეულოში აუარებელი მოსამსახურე ხალხი ფუსფუსებდა და ტრიალებდა“. სწორედ ამ „მოსამსახურე ხალხის“ საზოგადოება იზიდავდა განსაკუთრებით დავითის ყურადღებას. მწერალი მოგვითხრობს: „საყვარელი სამყოფი ჩემთვისაც და სხვა ბავშვებისათვის იყო სამზარეულო სახლი, სადაც, როგორც ვთქვი, აუარებელი ხალხი ფუსფუსებდა. მიყვარდა აქ ყოფნა, აქ შუაეცეხლის პირას მოყაყანე ხალხში გარევა. რა ზღაპარს, რა არაკს, რა ამბავს, ხუმრობას არ გავიგონებდი ხოლმე! ვუჯექი მუხ-

ლებზე ხან ერთს, ხან მეორეს და ვუსმენდი ამათ გაუთავებელ ლაპარაკს“.

კიდევ მეტად იყო დაახლოებული გლეხობასთან დავითის მეორე ბაბუის — კლდიაშვილის ოჯახი. დავით კლდიაშვილის მემუარებში ვკითხულობთ: „მეორე ბაბუა ჩემი, სოფელ სიმონეთში მცხოვრები, ღარიბი აზნაური იყო. ღარიბმა მაინც მოახერხა თავისი მრავალრიცხოვანი ოჯახის შენახვა. დაათხოვა ყველა ქალიშვილი და ორ უფროს ვაჟს ერთგვარი სწავლაც მიაღებინა ქუთაისში. მოხუცებულს ურჩებოდა უმცროსი ვაჟი სამსონი, მამა ჩემი, და რომ მისი სიკვდილის შემდეგ პატარას ყოლებოდა. გულითადი მომვლელ-მზრუნველი, მან მოიწვია მეზობელი გლეხი დათიკა გიორგაძე თავისი ცოლით. მამობილად მოჰკიდა შვილს და მისი ბედ-იღბალი იმათ ჩააბარა. ამათაც სავესებით გაამართლეს მოხუცებულის იმედი და ნამდვილი დედ-მამობა გაუწიეს შვილობილს. ყოველნაირად უწყობდნენ ხელს ადრე ობლად დარჩენილს“.

ცხადია, რომ ასეთ გარემოებას დავითის დედ-მამის ოჯახი განუყოფლად უნდა დაეახლოებინა მეზობელ გლეხობასთან და ასეც იყო. მწერალი მოგვითხრობს: „საზოგადოდ მეზობლები ძალიან შემოკრებილი ჰყავდა დედაჩემს. ჩვენი სახლის უკანა აივანზე ხშირად იცოდნენ მეზობლის ქალებმა თავის მოყრა. მოდიოდნენ თავიანთ ხელსაქნარით და საღამომდი იყვნენ ხელსაქნარში და მუსაიფში გაბმულნი. ზაფხულობით. კვირა უქმე დღეს თითქმის ყველა მეზობელი გლეხები ჩვენს ეზოში იყვნენ თავშეყრილნი და სხდებოდნენ ან ნიგვზის ჩრდილში, ან კვინცხის ქვეშ და იყვნენ ერთ სიცილში, ოხუნჯობაში და ხან საქმიან ლაპარაკში“.

დავითის ბავშვობის მოგონებანი აღსავსეა თავისი ორივე ბაბუის ოჯახებში გაზრდილი, თუ ამ ოჯახებთან დაახლოებული გლეხების სახეებით. რომელთაც მწერალი წრფელი სიყვარულით აგვიწერს და გვაცნობს.

ასეთმა გარემოცვამ. ხალხთან ასეთმა სიახლოვემ, უეჭველია, ღრმა ზეგავლენა მოახდინა მომავალი მწერლის შეგნებაზე, მისი ცხოვრებისა და შემოქმედების ხასიათზე. თვით მწერალი დიდად აფასებს თავისი ბავშვობის ასეთ გარემოც-

ვას. იგი წერს: „ამან შეაყვარა ჩემი თავი ჩვენს მეზობლებს და ტკბილ სიყვარულში გამატარებინა ჩემი ბავშვობა. მე რომ ეზოდან ფეხს გადავდგამდი — სახლში პირდაპირ დატვირთული მივდიოდი ხოლმე, მე და ჩვენსა გოგოთ მდგომი ელისაბედი — არ იქნებოდა, რომ ჩემს დამნახველს ან ქოჩორა ვარიკა არ ეჩუქნა, ან ვაშლი, ბია, ჩურჩხელა, ტკბილიკვერი და ამგვარები. ამ სიყვარულიანობის წყალობით ჩემი გულიც ადამიანის სიყვარულს ეჩვეოდა და სწავლობდა“.

წერა-კითხვა დავითს თავისმა დედამ შეასწავლა. შემდეგ შვიდი წლისა იგი მამამ ქუთაისს წაიყვანა და სასწავლებელში მიიბარა. ძნელი იყო სოფლად აღზრდილი ბავშვისათვის ქუთაისში იმდროინდელ სკოლაში გაბატონებულ ატმოსფეროსთან შეგუება და უცხო ოჯახში ცხოვრება (რუსულის შესწავლის მიზნით, დავითი რუსი „ლეკარის“ — ექიმის ოჯახში დააბინავეს), მაგრამ უშედეგო „გაბრძოლების“ შემდეგ იგი იძულებული გახდა ბედს დამორჩილებოდა და ახალ გარემოცვას შეეგუებოდა. იგი მალე დაუახლოვდა მოსწავლეებს და თავისი დიასახლისის დახმარებით წიგნების კითხვასაც შეუდგა. პირველი ქართული წიგნი, რომელიც ბავშვმა წაიკითხა, იყო ილია ჭავჭავაძის „კაკო ყაჩაღი“. ნაწარმოებმა უღიღესი შთაბეჭდილება მოახდინა დავითზე. ალბათ აქ აღმოცენდა საფუძველი იმ ღრმა იდეური სიახლოვისა და ნათესაობისა, რომლითაც შემდეგ დავით კლდიაშვილი დაუკავშირდა ილია ჭავჭავაძის დიდ ლიტერატურულ სკოლას; ქართული კლასიკური რეალიზმის სახელოვან ტრადიციებს.

დიდხანს როდი დარჩენილა დავითი ქუთაისში, მრევლოვის სკოლაში. იმ ხანებში მთავრობა ყოველწლიურად საქართველოდან თავადაზნაურთა ოჯახებიდან შერჩეულ 80 ბავშვს აგზავნიდა რუსეთის სამხედრო სასწავლებლებში აღსაზრდელად. თვითმპყრობელური ხელისუფლება მიზნად ისახავდა ამ ბავშვებისაგან შეექმნა ნაძალადევად გადაგვარებული, მშობლიურ ნიადაგს და კულტურას მოწყვეტილი „ადგილობრივი“ სამხედრო არისტოკრატია, როგორც თავისი საიმედო საყრდენი ხალხის დამორჩილებისა და გადაგვარების საქმეში.

ვინაიდან შერჩეულთა სწავლა-აღზრდა მთავრობის ხარჯ-

ზე ხდებოდა, მშობლები, განსაკუთრებით ნაკლები შეძლების თავადები და აზნაურები სიამოვნებით თანხმდებოდნენ თავიანთი შვილების გაგზავნაზე სამხედრო გიმნაზიებსა და კორპუსებში.

ასეთ ბავშვთა შორის მოხვდა დავით კლდიაშვილიც და 1872 წლის ზაფხულში სამხედრო სასწავლებლებისათვის შერჩეულ სხვა ბავშვებთან ერთად იგი ზღვით წაიყვანა ვილაც მაიორმა, რომელმაც ბავშვი დანიშნულებისამებრ ჩააბარა კიევის სამხედრო გიმნაზიას. დავითმა ჩინებულად ჩააბარა გამოცდა და ჩაირიცხა ხსენებულ გიმნაზიაში. ცხრა წლის ბავშვი მოექცა ახალ, უცხო გარემოცვაში. მოწყვეტილი და დაშორებული თავის სამშობლოს, მშობლებსა და ნაცნობ-მეგობრებს.

ბავშვი მთლიანად მოექცა სასწავლებლის მესვეურთა ხელში, რომლებიც უპირველეს მიზნად სწორედ იმას ისახავდნენ, რომ აღმოეთხვრათ ბავშვის შეგნებიდან ყველაფერი მშობლიური, დაევიწყებინათ მისთვის. საკუთარი ენა, აღეზარდათ იგი თვითმპყრობელური წყობილების ერთგულ ოფიცრად.

სამი წლის განმავლობაში არ დაბრუნებულა დავითი სამშობლოში. და ამდენი ხნის უცხოობაში ყოფნამ ისეთი ზეგავლენა მოახდინა ბავშვზე, მან იმდენად გადაივიწყა ქართული ენა, რომ როდესაც სამი წლის შემდეგ საზაფხულო არდადეგებზე იგი საქართველოში ჩამოვიდა, თარჯიმანის დახმარება დასჭირდა, რომ დედას და მეზობელ-ნათესაებს დალაპარაკებოდა.

თავის ავტობიოგრაფიულ თხზულებაში დავით კლდიაშვილი ამგვარად აღწერს მშობლიურ სოფელში თავის ამ დაბრუნების სურათს: „ორი კვირა ქუთაისში დავრჩი და რადგან დედაჩემმა რუსული არ იცოდა და მე ქართული — ამიტომ წავიყვანე თარჯიმნად ჩემი თანატოლი ბიძაშვილი და წავედი სოფელში დედასთან.

სალამო იყო ჩვენ რომ მივედით. მთლად ეზო და აივანი სავსე იყო თავშეყრილი მეზობლებით. სიხარულის ტირილით შემხვდა დედა, რომელიც მეტად დაავადმყოფებულიყო ჯავრისაგან ამ სამი წლის განმავლობაში. სათითაოდ გულში მი-

ხუტებდნენ ქალები და დედაჩემი მახსენებდა: ეს ბებია მელანოა, შენ გენაცვალე, ეს მიაა, ეს ელენე, ეს მარია. ეს დაჯიყველა თვალცრემლიანი სიყვარულით მეხვეოდა და მეალერსებოდა. დიდი გასაჭირი ადგა საწყალს ჩემს ბიძაშვილს — მრავლად თავშეყრილი კაცები იძლეოდნენ ათას კითხვას და ყველასთვის პასუხი იყო საჭირო. ერთმა იოხუნჯა: ბავშვს დასამუნჯებლად ბარემ აქვე დავამწყვდევდი ოთახში, რაღა რუსეთში აგზავნიდით, თქვე დალოცვილებო“. ეს სტრიქონები ცხოვლად გვიხატავენ იმ დამამახინჯებელ ზეგავლენას, რასაც ახდენდა ახალგაზრდობაზე ბიუროკრატიული სულისკვეთებით გამსჭვალული იმდროინდელი სკოლა.

სოფლად გატარებული ზაფხულის განმავლობაში დავითმა გაიხსენა მშობლიური ენა, შემდეგ კიევში მან თან წაიღო ქართული წიგნები, მალე იგი გაეცნო და დაუახლოვდა კიევის სასულიერო აკადემიაში მოსწავლე ქართველებს, რომელთა შორის იყო ჩვენი ცნობილი ხალხოსანი მწერალი ნიკო ლომოურიც. ახლად გაცნობილთა მეოხებით დავითი დაუკავშირდა პროგრესულად განწყობილ ახალგაზრდობის წრეებს, შეითვისა ხალხოსნური იდეები და განიმსჭვალა თვითმპყრობელური წყობილების წინააღმდეგ ბრძოლის, ხალხის თავისუფლებისა და კეთილდღეობისათვის ბრძოლის განწყობილებით.

1880 წელს დავით კლდიაშვილმა წარჩინებულად დაამთავრა კიევის სამხედრო გიმნაზია და სწავლის გასაგრძელებლად გადაყვანილ იქნა მოსკოვის სამხედრო სასწავლებელში. ამ სასწავლებელს სათავეში ედგა თავისი სისასტიკით განთქმული რეაქციონერი გენერალი სამოსვალოვი. თუ როგორ პირობებში გაატარა დავით კლდიაშვილმა მოსკოვის სამხედრო სასწავლებელში ყოფნის ორი წელიწადი, ამის შესახებ ნათელ წარმოდგენას გვაძლევს მისი მემუარების შემდეგი სტრიქონები: „ორი წლის სულთამხუთავი რეჟიმის შემდეგ, 1882 წ. აგვისტოში გავათავე სამხედრო სასწავლებელი და გამოვსწიე სამსახურისათვის ნარჩევ ადგილს — ბათუმში, რომელიც იმ დროს „პორტო-ფრანკო“ იყო“.

აქ მთავრდება დავითის სწავლა-აღზრდის წლები და იწყება მისი ცხოვრების ახალი ხანა — ხანა მეფის არმიაში სამ-

სახურიისა, სადაც დავითმა თავიი შეგნებული ცხოვრების დიდი ნაწილი გაატარა. ცხადია, რომ თავისი სამშობლოს გულმხურვალე პატრიოტს, პროგრესული იდეებით გატაცებულ ახალგაზრდას — დავით კლდიაშვილს არაფერი ჰქონდა საერთო თვითმპყრობელურ სამხედრო არისტოკრატიათან. მეფის არმიისაში სამსახურის მთელი ხნის განმავლობაში დავითს განუწყვეტლივ ბრძოლის წარმოება უხდებოდა — თავის შავრაზმელ უფროსებთან, თუ თანამოსამსახურე ოფიცრებთან, რომელთა უმრავლესობაც დიდმპყრობელური სულით იყო გამსჭვალული და ხალხისადმი უნდობლობისა და ზიზღის სულისკვეთებით აღზრდილთ თავიანთ პირდაპირ მოწოდებად მიაჩნდათ ჯარისკაცის დამონება, მისი პიროვნების ფეხქვეშ გათელვა.

ასეთი იყო მეფის ოფიცრობის დამოკიდებულება ჯარისკაცებისადმი, ხალხისადმი. ასეთი იყო დავითის პირდაპირი უფროსებისა და თანამოსამსახურეების უმრავლესობა და ამიტომაც გასაგებია, თუ რამდენად ძნელი და აუტანელი უნდა ყოფილიყო დავით კლდიაშვილისათვის ასეთ ატმოსფეროში. ასეთ ადამიანთა გარემოცვაში ცხოვრება და მუშაობა.

დავითს განზრახული ჰქონდა, რომ პირველსავე მოსახერხებელ შემთხვევაში თავი დაენებებინა სამხედრო სამსახურისათვის, მაგრამ თუ შემდეგ ეს განზრახვა აღარ განუხორციელებია, ეს იმიტომ, რომ მეფის ჯარის ოფიცრის მდგომარეობა საიმედო საფარად გადაიქცა მისთვის, რათა უფრო ექვემდებარებულად და გაბედულად ეწარმოებია თავისი საზოგადოებრივი საქმიანობა, ხალხის საკეთილდღეოდ მიმართული მოღვაწეობა.

იმ დროს, როდესაც დავითმა სამხედრო სამსახური დაიწყო, ბათუმი ერთ პატარა, უსიცოცხლო, პრიმიტიულად აგებულ დაბას წარმოადგენდა ოთხი ათასი მცხოვრებით, რომელთა რიცხვში იქ მდგომი გარნიზონის ნაწილებიც შედიოდა. მაგრამ სწორედ ამ დროს იწყებოდა ბათუმის ახალი ისტორია, მისი სწრაფი ზრდისა და განვითარების ხანა. 1883 წელს დამთავრდა თბილის—ბათუმის რკინიგზის მშენებლობა და ამ გარემოებამ ერთბაშად სახე შეუცვალა ქალაქს. მისი მიდამოები-

საკენ დაიძრნენ შეძლებული ვაჟრები და მსხვილი მოხელები. ისინი მუქთად ყიდულობდნენ მიწებს — ჩაისა და მანდარინის პლანტაციების გასაშენებლად, ზღვისპირა კურორტების ასაშენებლად. და ეს უცხო ელემენტები თავიანთი შეძლებისა და გავლენის მეოხებით ხელში იგდებდნენ მზარდ ქალაქსა და მის მიდამოებს, ჩაგრავდნენ და ავიწროებდნენ ადგილობრივ მცხოვრებთ, მშობლიური მიწა-წყლიდან ერეკებოდნენ მათ.

ბათუმის „პორტო-ფრანკოების“ გაუქმებამ და ნავსადგურის მოწყობამ სწრაფად გამოაცოცხლა ქალაქი, გააცხოველა მშენებლობა, ვაჭრობა-მრეწველობა, სხვადასხვა ხასიათის საქმიანობა. ქალაქს ეპატრონებოდნენ უცხოელი კაპიტალისტები და შავრაზმელი მოხელები, რომელთაც ეზიზღებოდათ ყველაფერი ადგილობრივი, ეროვნული, პროგრესული.

საქირო იყო ბრძოლა ამ რეაქციული ელემენტების წინააღმდეგ, ბრძოლა ადგილობრივი მოსახლეობის ეროვნული და პოლიტიკური უფლებების დასაცავად. ხალხის კულტურული დონის ასამაღლებლად, მოწინავე, პროგრესული იდეების დასანერგავად.

და ამ ბრძოლაში მთელი თავისი გატაცებით და ენერჯიით ჩაება ახალგაზრდა დავით კლდიაშვილი. ბათუმში მოღვაწე სხვა მოწინავე ქართველ ინტელიგენტებთან ერთად (რომელთა შორის იყვნენ ცნობილი მწერალი გიორგი წერეთელი, ლიტერატორი და საზოგადო მოღვაწე გრიგოლ ვოლსკი და სხვები) დავითი იყო ერთ-ერთი ინიციატორი ბათუმის მოწინავე ძალების დარაზმებისა. მთელ რიგ კულტურულ-საზოგადოებრივ დაწესებულებათა მოწყობისა და ფართო საზოგადოებრივი საქმიანობის გაშლისა ამ ახლად გამოცოცხლებულ ქალაქში.

დავითის აქტიური ინიციატივით და მონაწილეობით მოეწყო ბათუმში საზოგადო საკრებულო, რომლის დაარსებამაც გამოიწვია იქ ქართველ მსახიობთა საგასტროლოდ ჩასვლა. აქ პირველად გაეცნო დავით კლდიაშვილი ქართული სცენის კორიფეებს: ლადო მესხიშვილს, ვასო აბაშიძეს, მაკო საფაროვას და სხვ. აქ პირველად გაეცნო და დაუმეგობრდა იგი დიდ ქართველ ბელეტრისტს ალექსანდრე ყაზბეგს, რომელიც მაშინ ქართულ თეატრში მოღვაწეობდა და დასახელებულ მსახიო-

ბებთან ერთად მოგზაურობდა საქართველოს დაბა-ქალაქებში წარმოდგენების გასამართავად.

დავით კლდიაშვილის მონაწილეობით მოეწყო ბათუმში უფასო სკოლა ღარიბთა ბავშვებისათვის. საკვირაო სკოლები მუშებისათვის, ურთიერთდამხმარე საკრედიტო ამხანაგობა გაჭირვებაში მყოფ მუშებისათვის ნივთიერი დახმარების გასაწევად და სხვ. დავითი მხურვალე მონაწილეობას იღებდა ქალაქის თვითმმართველობის ირგვლივ გაჩაღებულ ბრძოლაში, რათა ქალაქის ცხოვრების სადავეები ბნელ და რეაქციულ ელემენტებს არ ჩავარდნოდა ხელში. დავით კლდიაშვილი უკვე ოთხმოციანი წლების დასაწყისიდან სისტემატურად ათავსებდა კორესპონდენციებს ქართულ პრესაში და ამ საშუალებასაც იგი მოხერხებულად იყენებდა თავისი პროგრესული საზოგადოებრივი მიზნებისათვის საბრძოლველად.

მთელ ამ საქმიანობას და ბრძოლას დავითი არა ერთხელ ჩაუყენებია მეტად სახიფათო მდგომარეობაში, არა ერთხელ უგემებია მისთვის დევნა და სასტიკი ანგარიშგასწორება მთავრობის მოხელეთა მხრივ, მაგრამ ეს ვერ აშინებდა თავისი ხალხისადმი უანგარო სიყვარულით გატაცებულ ახალგაზრდა საზოგადო მოღვაწეს. სამხედრო სამსახურში დავითი ჯარისკაცთა ნამდვილი მფარველი და ქომაგი იყო, მათი გულისხმიერი მზრუნველი და მოამაგე. ამ ნიადაგზეც მას გამუდმებული შეჯახება უხდებოდა ხოლმე უფროსებთან და თანამოსამსახურეებთან.

ოთხმოცდაათიანი წლების დასაწყისში დავითი გაეცნო და დაუმეგობრდა პავლე მაჭავარიანის ოჯახს. ამ დაახლოვების შედეგად მან ცოლად შეირთო პავლე მაჭავარიანის ასული მარიამი. ამავე წლებში გამოქვეყნდა დავითის პირველი მოთხრობები და გაიშალა მისი დიდი შემოქმედებითი ცხოვრება.

ოთხმოცდაათიან წლებში ბათუმში ფართოდ განვითარდა ნავთის მრეწველობა, რამაც დიდძალი მუშახელი მიიზიდა მრეწველობის ზრდამ, მუშათა დაგროვებამ ბუნებრივად გამოიწვია მუშებსა და კაპიტალისტებს შორის ინტერესთა წინააღმდეგობის გამწვავება და ბათუმში მალე ნამდვილი კლასთა ბრძოლა გაჩაღდა.

დავით კლდიაშვილის თვალწინ გაიარა ბათუმში ქართველი პროლეტარიატის კლასობრივი დარაზმვის, მისი რევოლუციური აღმავლობის პროცესმა და, როგორც მოწინავე ქართველი მწერალი და საზოგადო მოღვაწე, დიდი ჰუმანისტი და პატრიოტი, რა თქმა უნდა, ვერ დარჩებოდა ამ დიდი მოძრაობის მართო მეთვალყურედ, თუმცა მე-60 წლების მოღვაწეთა და ხალხოსანთა იდეების ნიადაგზე აღზრდილი იგი უშუალოდ არ ყოფილა დაკავშირებული პროლეტარიატის კლასობრივი ბრძოლის ხელმძღვანელ ორგანიზაციასთან; ამ ბრძოლის თეორიასთან და სტრატეგიასთან.

დავითს ასლო ნაცნობობა და მეგობრობა ჰქონდა ბათუმის მოწინავე მუშებთან, ყოველმხრივ თანაუგრძნობდა და ეხმარებოდა მათ და დიდი სიყვარულითა და ნდობითაც სარგებლობდა მუშათა შორის.

დავითის მემუარები ღრმად არის აღბეჭდილი იმ წრეელი მღელვარებით, რომლითაც იგი მუშათა რევოლუციური ბრძოლის აღმავლობას განიცდიდა. თავის ამ ავტობიოგრაფიულ ნაწარმოებში დავითი სხვათა შორის აგვიწერს ერთ-ერთ უმნიშვნელოვანეს ეპიზოდს საქართველოს მუშათა კლასის რევოლუციური ბრძოლის ისტორიიდან — 1902 წლის მარტში ბათუმში მომხდარ დიდ შეჯახებას რევოლუციურ მუშებსა და მეფის მთავრობას შორის. ბათუმის პროლეტარიატის ამ დიდი საბრძოლო დემონსტრაციის დღეს ქალაქში სამორიგეოდ გამოყვანილი იყო ჯარისკაცთა ის გუნდი, რომელსაც დავითი მეთაურობდა. ამ შემთხვევის გამო დავითი უშუალო მოწმე და მონაწილე გახდა მთავრობის ჯარებსა და რევოლუციურ მუშებს შორის მომხდარი სისხლიანი შეტაკებისა. რასაკვირველია, დავითის გუნდს ერთი ტყვიაც არ გაუხვრია, დავითი თვით მუშების მოთხოვნით თარჯიმნად იყო მოწვეული გუბერნატორსა და მუშებს შორის წარმოებულ მოლაპარაკებისას.

დავით კლდიაშვილი დიდი გულისწყრომით მოგვითხრობს მეფის მოხელეთა მიერ ჩადენილი მხეცობის, მათი პროვოკატორების მიერ ატეხილი სროლისა და საშინელი სისხლისღვრის შესახებ. ამ ამბავმა თავზარდამცემი გავლენა იქონია ოფიცრის ფორმაში ჩაცმულ ქართველ პატრიოტსა და ჰუმან-

ნისტზე. იგი ვერ შერიგებოდა იმ მდგომარეობას, რომ ასეთ წუთებში, ნებით თუ უნებლიეთ, ის მეფის ჯარის ოფიცერთა რიგებში აღმოჩნდა.

„ღიახ, რა მინდოდა მე ამ რიგებში? რატომ ვხდები მოწმე ამგვარი საშინელებისა, ამ საზიზღროებისა! ო, რა ტანჯვა გამოვიარე!

გარეტებული დავდივდი მთელი საღამო. მიჩლუნგებული გონება აღარ მუშაობდა.

ამ დღეს განცდილმა სულიერმა მღელვარებამ ღრმა კვალი დააჩინა დავითის მთელ ცხოვრებას, გასტეხა მისი ჯანმრთელობა, სამუდამოდ დაასწეულა იგი.

ბათუმის ამბებთან დაკავშირებით მთავრობამ გადაწყვიტა დავით კლდიაშვილი ღროებით მაინც თავიდან მოეშორებინა და ამ განზრახვით იგი პეტერბურგს გაიგზავნა. აქ დავითმა ინახულა სამართალში მიცემული ბათუმელი რევოლუციონერი მუშების დამცველად პეტერბურგიდან მომავალი ვეჭილი — ლუარსაბ ანდრონიკაშვილი და დაწვრილებით გააცნო მას საქმის ნამდვილი ვითარება, რასაც გულმოდგინედ მალავდნენ ოფიციალური წრეები.

ბათუმის 9 მარტის ამბებმა დიდი გამოძახილი კპოჯა იმდროინდელ რუსეთში. ამ ფაქტს გამოეხმაურენ არა მარტო დიდი ლენინი და ბოლშევიკური პრესა, არამედ იმდროინდელი პროგრესული ინტელიგენციის ფართო წრეებიც. ცნობილია, თუ რა დიდი ინტერესი გამოიჩინა ამ ფაქტისადმი ლევ ტოლსტოიმ.

დავით კლდიაშვილი დაესწრო პეტერბურგში საიდუმლოდ შემდგარ გამოჩენილ პოლიტიკურ მოღვაწეთა იმ კრებას, რომელმაც მოიხმინა ბათუმიდან დაბრუნებული ადვოკატის ანდრონიკაშვილის მოხსენება 9 მარტის ამბების შესახებ. კრებამ ოვაცია გაუშარათა დავით კლდიაშვილს, როგორც მოწინავე ქართველ მწერალს და ინტელიგენტს.

პეტერბურგიდან ბათუმში დაბრუნებული დავით კლდიაშვილი მოექცა იმ გამძაფრებულ სოციალურ ვითარებაში,

რომელიც უშუალოდ წინ უძღოდა 1905 წლის რევოლუციას. რუსეთის პირველი რევოლუციის პერიოდში დავითის ბინაზე არა ერთ რევოლუციონერს უპოვია თავშესაფარი. დავითი ფარულად ტყვიებსაც კი აწვდიდა მოძრაობის მონაწილე მუშებს.

დავითმა აშკარა მონაწილეობა მიიღო იმ დიდ პოლიტიკურ ლემონსტრაციაში, როგორცაა გადაიქცა ოდესაში ებრაელთა დარბევის დროს შავრაზმელების მიერ ვერაგულად მოკლული ახალგაზრდა ქართველი მეცნიერის — საბა კლდიაშვილის ნეშტის ჩამოსვენება ბათუმში და მისი დაკრძალვა ქუთაისში.

ამ ნაბიჯის გამო დავითი დააბეზლეს მთავრობის წინაშე. იგი სასტიკი სასჯელის დასადებად თბილისში გაიწვია მძვინვარე შავრაზმელმა გენერალმა გრიაზნოვმა. დავითი გადაარჩინა საბედნიერო შემთხვევამ — სისხლიანი გრიაზნოვის მოკვლამ არსენა ჯორჯიაშვილის მიერ.

რეაქციის გამარჯვების შემდეგ დავით კლდიაშვილს არ დაუვიწყეს. ეს „დანაშაული“ და იგი აიძულეს სამხედრო სამსახური დაეტოვებინა, — ფაქტიურად დაითხოვეს სამსახურიდან. ამ გარემოებას დიდად არ შეუწუხებია დავითი. იგი საცხოვრებლად გადასახლდა ქუთაისში და ჯერ ქალაქის თვითმმართველობაში, შემდეგ შავი ქვის მრეწველთა საბჭოში დაიწყო მუშაობა.

ამ წლებში იგი თავის ძალ-ღონეს უმთავრესად საზოგადოებრივ-ლიტერატურულ მოღვაწეობას ანდომებდა. მწერალი კიდევ უფრო მეტად დაუახლოვდა ქართული კულტურისა და მწერლობის ისეთ დიდებულ მოღვაწეებს, როგორც იყვნენ აკაკი წერეთელი, ვაჟა-ფშაველა და სხვ.

პირველი იმპერიალისტური ომის დაწყებისთანავე, 1914 წელს, დავითი, როგორც ოფიცრად ნამყოფი, კვლავ სამხედრო სამსახურში გაიწვიეს. თავდაპირველად დაბა სენაკში (ახლანდელი ქალაქი ცხაკაია) ცხოვრობდა, სადაც მისთვის მიჩნეული ჯარის ნაწილი იდგა, ხოლო შემდეგ თავის პირდაპირ უფროსთან, გენერალთან შეუთანხმებლობის გამო ტრაპეზუნდისკენ გაგზავნეს. წელიწად-ნახევარი გაატარა დავითმა სამსახურის

ამ ახალ ადგილზე ლაზისტანში. დავითი მალე გაეცნო და დაუახლოვდა ლაზებს. ზოგიერთ ადგილობრივ მკვიდრს დაუმეგობრდა კიდევ და ყოველმხრივ ეხმარებოდა მათ, იფარავდა იმ ძალადობისაგან, აბუჩად. აგდებისა და შეურაცხყოფისაგან, რასაც ხალხი განიცდიდა გათავხედებული მოხელეებისა და სამხედრო პირებისაგან. ამ ნიადაგზე დავითს აქაც მწვავე შეჯახება მოუხდა ერთ-ერთ დიდი თანამდებობის პირთან. ამის გამო დავით კლდიაშვილი ბათუმში გამოიძახეს და სასტიკად დასჯას უპირებდნენ. ალბათ დახვერტა არ ასცდებოდა, რომ თებერვლის რევოლუციას არ მოესწრო და არ გადაერჩინა იგი.

არმიიდან დაბრუნებული დავით კლდიაშვილი მცირე ხნით ქუთაისში ცხოვრების შემდეგ, თავის მშობლიურ სოფელში — სიმონეთში დასახლდა და იქ, თანშეზრდილ და საყვარელ მეზობელ-მეგობართა შორის გაატარა სიცოცხლის უკანასკნელი წლები.

საქართველოში საბჭოთა ხელისუფლების გამარჯვებას მხცოვანი მწერალი აღტაცებით შეეგება. ამ დიდ ისტორიულ მოვლენაში მან თავისი უწმინდესი მისწრაფებების — თავისი სამშობლოს საბოლოო განთავისუფლებისა და აღორძინების, მშობელი ხალხის ჭეშმარიტი კეთილდღეობის განხორციელება დაინახა. მოხუცებულობისა და ფიზიკური დაუძლურების მიუხედავად, იგი დიდი ხალისით მონაწილეობდა საბჭოთა კულტურის მშენებლობისათვის გაშლილ მუშაობაში. თავისი გამოსვლებით მწერალთა კონფერენციებზე, თუ სხვა პოლიტიკურ და საზოგადოებრივ შეკრებებზე იგი მოუწოდებდა ქართველ ინტელიგენციას გამარჯვებული პროლეტარული ხელისუფლების ირგვლივ დარაზმვისაკენ და თვითონ იძლეოდა მისაბამ მაგალითს შემოქმედებითი ძალების გულწრფელი თანამშრომლობისა ახლად აღორძინებული სამშობლოს, საბჭოთა საქართველოს მესვეურებთან.

დავითი ახალი ძალით და ენერგიით აგრძელებდა შემოქმედებით მუშაობას, სისტემატურად თანამშრომლობდა საბჭოთა პერიოდის სალიტერატურო ჟურნალებში „კავკასიონში“, „დროშაში“, „მნათობში“ და სხვ.

საბჭოთა ხელისუფლების წლებში დაწერა და გამოაქვეყნა

მან თავისი ერთ-ერთი საუკეთესო ვრცელი ნაწარმოები „ჩემი ცხოვრების გზაზე“. ეს ჰემმარიტად მაღალმხატვრული მატია-ნეა არა მარტო მწერლის პირადი ბიოგრაფიისა, არამედ ქარ-თული კულტურისა და საზოგადოებრივი ცხოვრების განვითარებისა მთელი ნახევარი საუკუნის მანძილზე.

1930 წელს საბჭოთა საქართველომ დავით კლდიაშვილს სამწერლო მოღვაწეობის ორმოცი წლის იუბილე გადაუხადა. ეს იყო ნამდვილი სახალხო დღესასწაული. მადლიერმა ხალხმა ღირსეულად დააჯილდოვა თავისი ღვაწლმოსილი მწერალი. საბჭოთა ხელისუფლებამ მას რესპუბლიკის სახალხო მწერლის მაღალი წოდება მიანიჭა. ცრემლნარევი სიხარულით აღსავსე მღელვარე სიტყვებით გადაუხადა მადლობა დავით კლდიაშვილმა ღირსეულად დაფასებისათვის თავის სამშობლოს, მშობლიურ ხალხს, მის ხელისუფლებას. იგი ლაპარაკობდა იმ განუზომელი ბედნიერების შესახებ, რომელიც მას განაცდევინა სამშობლო ქვეყნის განთავისუფლებისა და აღორძინების დიადმა ხანამ. ეს იყო დავით კლდიაშვილის უკანასკნელი საჯარო გამოსვლა — მისი სახელოვანი ბიოგრაფიის ღირსეული აპოთეოზი.

დავით კლდიაშვილი გარდაიცვალა 1931 წლის 24 აპრილს თავის საყვარელ მშობლიურ სოფელში — სიმონეთში. მისი ნეშტი თბილისში ჩამოასვენეს და შესაფერი პატივით დაკრძალეს მთაწმინდაზე, დიდ ქართველ მწერალთა და მოღვაწეთა პანთეონში.



მწერლობისადმი მისწრაფება ძლიერ აღრე აღეძრა დავით კლდიაშვილს. მეორე კლასის მოწაფე იყო, როდესაც პირველი მოთხრობა დაწერა. ნაწარმოების გმირი, როგორც თვით მწერალი იგონებს — „სისხლში სცურავდა, მარჯვენე და მარცხენე კელავდა ყოველ შემხდურს“. კლასის დამრიგებელს დაუწუნებია დავითისათვის ეს მოთხრობა, სიცილით უთქვამს მისთვის: „ძალიან გეტყობა აზიელობა, ამდენი სისხლის დაღვრა გაგიკოანია?! დაანებე თავი, სისულელეა!“

დავითსაც დაუჯერებია მასწავლებლისათვის და მიუტოვე-
ბია წერა.

დიდი ხნის შემდეგ, უკვე მოსკოვის სამხედრო სასწავლე-
ბელში ყოფნისას, მან კიდევ ერთხელ სცადა ბედი მწერლობა-
ში და ამჯერადაც უშედეგოდ. მან რუსულად თარგმნა ნიკო-
ლომოურის მოთხრობა „ალი“, მაგრამ თარგმანს დაბეჭდვა არ
ელირსა. ამ წლებში იგი ხელნაწერ ქურნალს სცემდა სასწავლე-
ბელში. ქურნალის მასალის დიდ ნაწილს თვითონ დავითი
წერდა.

სამშობლოში დაბრუნებული დავით კლდიაშვილი გულ-
მოდგინედ მოემზადა სამწერლო მოღვაწეობისათვის, რომლის-
კენაც, როგორც ჩანს, ბავშვობიდანვე დიდი მიდრეკილება
ჰქონდა. ოთხმოციან წლებში მან იწყო კორესპონდენციების
წერა თბილისის გაზეთებში ბათუმის საზოგადოებრივი ცხოვ-
რების აქტუალურ საკითხებზე, ხოლო ამავე დროს თარგმნა
ქართულ ენაზე ფრანგული და გერმანული ლიტერატურის ნი-
მუშები, რომლებსაც ვასო აბაშიძის ქურნალ „თეატრში“ ათავ-
სებდა 1885 წლიდან.

პირველი მისი მხატვრული ნაწარმოები მოთხრობა „შე-
რისხვა“ 1893 წელს დაიბეჭდა ქურნალ „მოამბეში“, ამას
ზედინედ მიჰყვნენ მოთხრობები: „მსხვერპლი“, „სოლომან
მორბელაძე“, „წრფელი გული“, „სამანიშვილის დედინაცვა-
ლი“. ერთბაშად გაიშალა დავით კლდიაშვილის დიდი შემოქ-
მედებითი ცხოვრება. წერდა იგი დიდის გატაცებით და სიყ-
ვარულით. „ეს მუშაობა კი არ იყო, იყო უმაღლესი სიამოვნე-
ბა“, — ამბობს დავით კლდიაშვილი თავისი სამწერლო მუშაო-
ბის შესახებ.

თავისი პირველივე ნაწარმოებებით მიიპყრო დავით კლდია-
შვილმა მკითხველი საზოგადოებისა და მაშინდელ მწერალ-
მოღვაწეთა ყურადღება. სალიტერატურო კრიტიკა გულისხმე-
რად ეხმაურებოდა მის ყოველ შემოქმედებით ნაბიჯს და ღირ-
სეულად აფასებდა მას. იმდროინდელი ქართული თეატრიც
ღირსეულად შეხვდა დავით კლდიაშვილის შესანიშნავ კომე-
დიებს. ქართული თეატრის უდიდესმა მსახიობმა ლადო მესხი-

შვილმა წრფელი სიყვარულითა და შემოქმედებითი გზებით განახორციელა ქუთაისის თეატრის სცენაზე „ირინეს ბედნიერება“, ხოლო „დარისპანის გასაქირი“ თავის საბენეფისო სადამოზე დადგა ცნობილმა და მაღალნიჭიერმა მსახიობმა ვალერიან შალიკაშვილმა.

გულთბილად ეგებებოდა ქართველი ხალხი თავისი საყვარელი მწერლის ყოველ ახალ ქმნილებას და სწორედ ამიტომ თავისი უკანასკნელი ნაწარმოები, ავტობიოგრაფიული თხზულება, მწერალმა ამგვარი კმაყოფილებით აღსავსე სიტყვებით დაამთავრა:

„ეს სიტბო, ეს სიყვარულიანობა თან ახლდა ჩემს ლიტერატურულ შრომას, არასოდეს არ დაკლებია იგი და ამიტომაც ჩემი განვლილი ლიტერატურული გზა ბედნიერად განვილილ გზად მიმაჩნია“.



„შერისხვა“ და „მსხვერპლი“ იმდროინდელი სოფლის ყოფა-ცხოვრების მასალებზეა აგებული და გვისურათებს რმ სიბნელესა და უმწეობას, უმეცრებასა და სიდუხჭირეს, რომლითაც მოცული იყო გლეხობის ცხოვრება ფეოდალურ-ბურჟუაზიული წყობილების პირობებში.

ეს ორი პირველი ნაწარმოები ნაკლებად დამახასიათებელია დავით კლდიაშვილისათვის. როგორც ვარკვეული ექვატიკისა და ღრმად თავისებური მხატვრული სტილის მწერლისათვის. ამ მოთხრობების წერისას მას ჯერ კიდევ არ ჰქონდა მიგნებული ის თავისებური სანქარო, რომელიც შემდეგ ისე ცხოვლად და შთაგონებულად აისახა მის შემოქმედებაში, ჯერ კიდევ არ იყო მონახული ის სპეციფიკური თვალთახედვა და სინამდვილის ხატვის ის ორიგინალური მანერა, რის მეოხებითაც შემდეგ დავით კლდიაშვილმა დიდი და საპატიო ადგილი დაიმკვიდრა ქართულ ლიტერატურაში.

„შერისხვისა“ და „მსხვერპლის“ ავტორი ჯერ კიდევ ჩვენი

ხალხოსანი მწერლების მიერ გაკვალულ გზას, მათ მიერ დადგენილ ლიტერატურულ ტრადიციას აგრძელებდა. იგი წრფელი გულშემატკივრობით თავს დასტრიალებდა პატრიარქალური წყევლიადით მოცული სოფლის ყოფა-ცხოვრებას და ამჟღავნებდა იმ დამღუპველ, ადამიანის გამანადგურებელ ზეგავლენას, რომელსაც ახდენდა გლეხობაზე ბნელი, დრო-მოკმული ადათ-ჩვეულებანი, ცრუმორწმუნეობრივი ტრადიციები, კერძო-მესაკუთრული ინსტინქტით ნაკარნახევი მახინჯი თვისებანი გლეხური სულისკვეთებისა.

მაგრამ ამ მოთხრობებში უკვე იგრძნობოდა დავით კლდიაშვილის მახვილი, სინამდვილისა და გმირის სულსკვეთების სიღრმეში ჩამწვდომი თვალი, მოჩანს ყოფაცხოვრებითი მასალის იშვიათი მხატვარი, რომელსაც შეუძლია ადამიანთა ყოველდღიური ურთიერთობის წვრილმანი მოვლენების, საყოფაცხოვრებო დეტალების საშუალებით თვალწინ დაგვიყენოს ღრმა განზოგადებითი ძალის მხატვრული სახეები. ამ სადებნუტო ნაწარმოებებში იწვრთნება ბუნებრივი თხრობის შესანიშნავი ოსტატი, რომელიც ყოველთვის სადა და თანაც მიმზიდველ სიუჟეტებზე ამყარებდა თავის ყოველ ქმნილებას.

„შერისხვის“ მთავარ გმირს კერძომესაკუთრული სულისკვეთებით გამსჭვალული გლეხი კაცია საგუნაშვილი წარმოადგენს. მწერალი არაფერს გვეუბნება კაცის დასახასიათებლად. მთავარი გმირის მთელი მოქმედება, მისი ყოველი სიტყვა და ნაბიჯი ამომწურავი სისრულით გვიჩვენებს ამ ადამიანის თავისებურ ხასიათს, მის ჯიუტ ბუნებას, უაღრეს სიფიცხესა და მოუთმენლობას, წრეს გადასულ ეინიანობას. მზადყოფნას ყველაფერი გასწიროს თავისი წვრილმანი ნებასურვილის შესრულებისათვის, თავისი ეგოისტური ზრახვისა და უკიდურესად შეზღუდული ინტერესების დასაცავად.

მოქმედებაში, თვით გმირის საქციელში გამოავლენს დავით კლდიაშვილი მოქმედ პირთა ბუნებას, მათი ხასიათის ინდივიდუალობას. თხრობის მანძილზე თანდათანობით, სულ უფრო მეტის ყოველმხრივობით და სისრულით გადაიშლება ჩვენს თვალწინ მისი მოთხრობების მთავარ გმირთა სულიერი სამყარო, იმგვარად, რომ ავტორს აღარ სჭირდება საგანგებოდ

გაგვაცნოს თავისი გმირი, გვითხრას რაიმე მისი პიროვნების შესახებ. ასეთია დავით კლდიაშვილის, როგორც ქვემარტი რეალისტი ხელოვანის მანერა გმირთა ხატვისა და სწორედ ამგვარად არის მოცემული კაცია საგუნაშვილის სახე მის „შერისხვაში“.

„შერისხვაში“ დავით კლდიაშვილი საგანგებოდ ერთ ფრაზასაც არ ხარჯავს კაცია საგუნაშვილის გარეგანი სახის გასაცნობად. მაგრამ, როგორი სიცხადით იხატება ჩვენს თვალწინ კაციას კუშტი და მრისხანე გამომეტყველება მულამ ფიცხელი მოძრაობით, თავისი ბოხობი ქუდით და მსხვილი, გრძელი წინსაბიჯი ჯოხით.

ამ პატარა მოთხრობაში დავით კლდიაშვილმა მოგვცა მესაკუთრული სტიქიით შეპყრობილი, თავის წვრილმან საპირადო ინტერესებზე გაჯიუტებული გლეხის სახე, რომლის მსგავსიც ამ მხრივ არ მოიძებნება მთელ ქართულ კლასიკურ ლიტერატურაში.

კაცია საგუნაშვილმა ერთი თავისი პატარა საყანე მიწა რამდენიმე წლით დასასვენებლად გაუშვა და ღობეც აღარ შემოუვლია მისთვის. ამით ისარგებლეს მეზობლებმა და რაკი ძველი სასოფლო გზა ეამთამსვლელობაში დაქცეულიყო, კაციას დაუმუშავებელ მიწაზე დაიდგეს გზა. როდესაც კაციამ მოისურვა თავისი მიწის კვლავ შემოღობვა და დამუშავება, სოფელმა მოთხოვა მას „ორიოდე მტკაველი“ მიწა სოფლისათვის დაეტოვებინა გზად. ცხადია, კაციას დიდად არ დააზარალებდა ასეთი დათმობა, ხოლო სოფლისათვის ეს აუცილებელ საჭიროებას შეადგენდა.

მაგრამ კერძომესაკუთრულ ინსტინქტზე აღმოცენებული, ადამიანის შეგნების დამაბნელებელი ცხოველური ეგოიზმი საშუალებას არ აძლევდა კაციას ფხიზლად გაეთვალისწინებინა ეს გარემოება და გონების თვალთ გაეზომა პირად და სახალხო ინტერესთა ურთიერთშეთარღება.

კაციამ მტკიცე უარი განაცხადა დაეთმო სოფლისათვის თავისი მიწის მცირე ნაკვეთი და სასტიკად გაჯიუტდა.

თავისი მეზობლის, ანდრია ჭურაშვილის რჩევა-თხოვნაზე—

დაეთმო საზოგადოებისათვის ეს „ორი მტკაველი“ მიწა, კაცია მ გაჯავრებით წამოიძახა:

„საზოგადოებისათვის კი არა, ის კიდევ!.. მითქვამს, — არ დაგიტომობთ... მორჩა, გათავდა... სოფელი ფეხებზე მკილია!“

კაციას გონება დახშულია იმისათვის, რომ გაიგოს საზოგადოებრივი ინტერესი, გაითვალისწინოს ხალხის. მთელი სოფლის ნება-სურვილის უპირატესობა მის წვრილმან საპირადო ინტერესთან შედარებით.

ამ „ორი მტკაველი“ მიწისათვის კაცია წინაღუდგა მთელ სოფელს, გამოეთიშა და დაუპირისპირდა მეზობლობას და მაშინაც კი, როცა ადგილობრივმა სასამართლომ საკითხი სოფლის სასარგებლოდ გადაჭრა, კაციამ გადაწყვიტა არ დაემორჩილოს სასამართლოს და ბოლომდე იბრძოლოს, სანამ თავისას არ გაიტანს.

„გლახა ანთიმოზა გგონივართ მე, რომ თქვენს წინაშე იმისათვის თავს მოვიხრი? — ეუბნება კაცია მოსამართლეს, — დილა!.. მირი სუდში ვიჩივლებ, თუ საჭირო იქნება, ოკრუჟნოი სუდშიაც გაიხლები... იმას ნუ იფიქრებთ, რომ თქვენ ჩემი თავი დაგაჯაბნებით“.

მართლაც, ბევრი იარა კაციამ, არ დაერიდა არც ხარჯს, არც გარჯას, მაგრამ არაფერი გამოუვიდა და რაც უფრო რწმუნდებოდა იგი თავის უძლურებაში—გამკლავებოდა მთელ სოფელს, მით უფრო ბრაზდებოდა და ხელდებოდა. კაცია ახლა შურისძიების ყინმა შეიპყრო.

„აენთო კაცია. ის ჰგავდა მხეცს, რომელიც არა ღონისძიებას არ დაერიდებოდა, ოღონდ კი რითიმე თავისი ჯავრი ამოეყარა განსაკუთრებით იმ გაიძვერა, მოტიკტიკე ანდრიაზე, რომელიც თავი და ბოლო იყო სოფლის. მოსამართლეებს შორის“.

ანდრიაზე შურისძიების ერთადერთი გზა დარჩა კაციას. — მისი ხატზე გადაცემა.

კაციამ „ხატზე გადასცა“ ანდრია ჭურაშვილი სრული რწმენით, რომ წმინდა გიორგი შეისმენდა გამწარებული მოხუცის ვედრებას და სამაგალითოდ დასჯიდა ანდრიას: „დამაცათ, შვილებო, ისევ თქვენვე შემეხვეწებით ადგილი ჩავიბა-

რო, როცა ჩემი გამჩენი შავ ღღეს დაგაყენებთ“, — ემუქრებოდა მეზობლებს გულდამშვიდებული და თავის გამარჯვებაში სავსებით დარწმუნებული კაცია.

მაგრამ დრო გადიოდა და წმინდანის რისხვის არავითარი ნიშანი არა ჩანდა. ანდრიათ, რომელიც ერთ ხანს შემფოთებული და შეშინებული იყო „ხატზე გადაცემით“, ახლა თითქოს გადაივიწყა კიდეც ეს ამბავი და უდარდელად განაგრძობდა ცხოვრება. კაციას მოუთმენლობა იპყრობდა, იგი ღელავდა და ბორგავდა წმინდანის განაჩენის მოლოდინში. ნუთუ ეს უკანასკნელი ცდაც უშედეგო გამოდგა? ნუთუ ღმერთსაც აღარ ჰქონია სამართალი, ნუთუ ხატმაც არ შეისმინა მისი სიტყვა და თხოვნა?

„ვერაფერ საქმეს ხელს ვერ ჰკიდებდა, აღარადეერი აღარ ახსოვდა კაციას იმის მეტი, რომ ის დაეჭადნა ანდრიას, წმინდანის შემწეობით ჯავრს ამოვიყრიო, მაგრამ ვერც ეს აასრულა და თვით წმინდანმაც არავითარი ყურადღება არ მიაქცია მას“.

ახლა კაცია ანდრიასთან ერთად წმინდა გიორგისაც დაემდურა და, რაც დრო გადიოდა, მით უფრო აშკარადა გამოთქვამდა თავის ამ უკმაყოფილებას და გულისწყრომას. საქმე იქამდე მივიდა, რომ ერთხელ, აღდგომის მეორე დღეს, როცა მთელი სოფელი სალოცავად იყო შეკრებილი, კაციამ საჯაროდ ჰგმო ხატი, მთელი ხალხის წინაშე უარჰყო იგი.

შურისძიების ჟინმა სარწმუნოების, თავისი ღმერთის უარყოფამდე მიიყვანა კაცია საგუნაშვილი. ამ ამბავმა შეაშფოთა მთელი სოფელი და თავზარი დასცა კაციას ცოლს — დოდოს. ყველამ გაგოყებულად ჩათვალა კაცია და მეზობლები საბოლოოდ გადაუდგნენ მას.

ახლა სავსებით განმარტოებული კაციას არსებაში შურისძიების ჟინის დაუკმაყოფილებლობით გამოწვეულ სულიერ ტკივილს ღვთის გმობით აღძრული შიშიც დაერთო და მოხუცმა საბოლოოდ დაჰკარგა სიმშვიდე და სულიერი წონასწორობა.

„მოტყდა, უცნაურად მალე მოტყდა, სრულიად დაბერდა და მოიკუმშა ამას წინათ წარმოსადეგი კაცია. ზედვე ეტყობო-

და, რომ იგი სწუხდა, სწუხდა გადამეტებით, მაგრამ ხმას არ იღებდა“.

კაცია მ ვერ გაუძლო ამდენ შფოთვისა და მღელვარებას, იგი დაუძლურდა, დაავადმყოფდა, მოკვდა საშინელ ტანჯვაში, განმარტოებული, მეზობლებისაგან მიტოვებული და უარყოფილი. დასაფლავებაზეც კი არ მიეკარნენ მეზობლები კაციას. „ვერ ვიტირებთ“, — ამბობდნენ ისინი, — „ღმერთს ვაწყენებთ, რომ მისი მგმობელი ვიტიროთ“. ასე იმსხვერპლა კაცია საგუნაშვილი მის არსებაში ღრმად ფესვგადგმულმა კერძომესაკუთრულმა ინსტინქტმა, რომელსაც ჩაეკლა და ჩაეხშო ამ ადამიანში ყოველგვარი საზოგადოებრივი, სოციალური გრძობა და შეგნება.

თუ ამ მოთხრობით დავით კლდიაშვილმა იერიში მიიტანა ძველი სოფლის დუხჭირი ცხოვრების, გლეხობის იმდროინდელი შეგნებისა და სულისკვეთების ამ ერთ-ერთ ძირითად საფუძველზე, ნაწარმოებით — „მსხვერპლი“ მწერალმა მწვავედ ამხილა ოჯახურ-საყოფაცხოვრებო ურთიერთობათა პატრიარქალური ადათ-წესებისა და ცრუმორწმუნეობის დამღუპველი ზეგავლენა გლეხობის ცხოვრებაზე.

უმეცრებისა და სიბნელის, სიღუხჭირისა და განწირულების გულის სიღრმემდე შემზარავი სურათი გადაშალა მწერალმა მკითხველის თვალწინ და მოგვითხრო ამგვარი გარემოცვის მსხვერპლთა — უდანაშაულოდ დაღუპულ ადამიანთა უბედური თავგადასავალი.

მოთხრობის მთავარი გმირები — ახალგაზრდა გლენი ქალი მარინე, მისი მოხუცი მშობლები — მარკოზი და ესმა, მარინეს დედამთილი ფეფენა და ქმარი ნიკა — ყველა ესენი ცხოვრებაგამწარებელი ადამიანები არიან, ისინი მსხვერპლნი არიან სოფლად დაშკვიდრებული წყვილიადისა და ცრუმორწმუნეობისა.

მოთხრობის პირველსავე გვერდზე ნაწარმოების მთავარი გმირების მიერ ერთმანეთისადმი მიმართული რამდენიმე ფრაზით მწერალი გვაძლევს ამ სამი ადამიანის მკაფიოდ გამოკვეთილ ხასიათს. უკვე თავიანთი ამ პირველი გამოჩენით ნაწარმოებში ჩვენს თვალწინ წარმოსდგებიან ახალგაზრდა,

სილამაზითა და სიცოცხლით სავსე გლეხი ქალი — მარინე. რომელიც ეს-ესაა გათხოვილა, ოჯახობას შესდგომია და ხალისიანად, იმედიანად შექყურებს თავის მომავალს, მისი მოხუცი დედამთილი ფეფენა — მკაცრი და სასტიკი ხასიათის ქვრივი დედაბერი, რომელიც თავისი დრომოკმეული შეხედულებებისა და ადათ-წესების საზომით აფასებს ცხოვრების ყოველ მოვლენას, ამიტომაც არაფერი მოსწონს ახალი დროებისა და ახალი ადამიანებისა და მესამე — მარინეს ქმარი ნიკა, ობლობაში და სიღარიბეში აღზრდილი გლეხი, უნებისყოფო და დაძაბუნებული ხასიათის ადამიანი; რომელიც მთლიანად თავის დედის გავლენის ქვეშაა მოქცეული და უსიტყვოდ ემორჩილება მის ყოველ ბრძანებას.

ფეფენასა და მარინეს შორის თავიდანვე მწვავე უთანხმოება იჩენს თავს. დედაბერს არ მოსწონს, რომ მისი ახალგაზრდარძალი კობტაობს, მხიარულობს, ჩაცმა-დახურვაზე და მორთვა-მოკაზმვაზე ფიქრობს, მეზობლებში გარევესა და გართობასაუბარს ეტანება. განსაკუთრებით აბრაზებს ფეფენას ის გარემოება, რომ ამ ბოლო დროს მათ ოჯახში სიარულს მოუხშირა „გაქუცულმა აზნაურიშვილმა“ — დავითმა, რომელსაც ფეფენას აზრით, ალბათ მარინეზე უნდა ექიროს თვალი და, მაშასადამე, შერცხვენას და თავის მოქრას უნდა უპირებდეს მათ ოჯახს.

ადრე დაქვრივებულ ფეფენას დიდი ტანჯვითა და ვაი-ვაგლახით გაუზრდია ერთადერთი ვაჟი — ნიკა, თავი არ დაუბოგავს, რომ ოჯახი ფეხზე დაეყენებინა და ახლა იგი ვერ შეურიგდება, რომ ამდენი წვითა და დაგვიტ შენახული ოჯახის აღირსება ვინმემ გათელოს და შეურაცხოს.

ამიტომ ეპყრობა იგი გადამეტებული სისასტიკით თავის ახალგაზრდარძალს, ეს უკანასკნელი კი ვერ უძლებს ასეთ დაუშსახურებელ მოპყრობას დედამთილის მხრივ, მას გულს ჟუკლავს ეს გაუთავებელი საყვედურები და კიცხვა-გაკილევა. ამდენი ცილისწამება და უსაფუძვლო იქვნეულობა.

რძალ-დედამთილს შორის ამკარა ბრძოლა იმართება, მაგრამ მარინე უძლურია და უმწეო ამ ბრძოლაში. მისი „ქალაჩუნა“ ქმარი — ნიკა ბრმად ემორჩილება დედის ნება-სურვილს.

მეზობელთაგანაც ვერავინ ექომაგება და ეხმარება მარინეს, ფეფენას თავისი ზედმეტი სიმკაცრისა და ხასიათის ახირებულების გამო სოფლად „კუდიანის“ სახელი აქვს შერქმეული და ამიტომაც ყველას ეშინია მისი, ყველას ერიდება აწყენინოს, გადაიკიდოს ეს უცნაური „ჯადო“ — დედაბერი.

რამდენჯერმე თავგანწირულად გაიბრძოლა მარინემ, მაგრამ ამაოდ. მისმა ერთადერთმა გულშემატკივარმაც კი — ნიკას ბიძამ, ონისიმემ ვერ გაბედა მფარველობა გაეწია დაუმსახურებლად დაჩაგრული მარინესათვის და დაეფარა იგი ფეფენას რისხვისაგან. საბრალო მარინე მთლიანად მოიქცა ფეფენას კლანჭებში და იძულებული გახდა ბედს დამორჩილებოდა, ჩაეკლა ყველა თავისი ახალგაზრდული სურვილი და მისწრაფება, სახლში გამომწყვდეულიყო და დედამთილის სურვილისამებრ გამოთიშვოდა სოფელ-ქვეყანას.

გულდაჩაგრული ახალგაზრდა ქალი გარეგნულადაც გამოიცვალა, ჩამოხმა, დასნეულდა. მეზობლებმა მარინეს ამგვარი გამოცვლა მის „გაკუდიანებას“ მიაწერეს. მათ გადაწყვიტეს, რომ დედამთილმა სულიან-ხორციანად დაიმორჩილა რძალი, გახადა იგი თავისი „კუდიანობის“ მოზიარედ.

„— გული ამოსკამა, — ამბობდნენ, — და ყოლისფრის ხალისი დაუკარგა, როგორც თვითონ არის, იმისთანა გახადა“.

ახლა ფეფენასთან ერთად მარინეც „კუდიანად“ მონათლა სოფელმა, მასაც შიშით და რიდებით დაუწყეს ყურება მეზობლებმა.

გაიგეს თუ არა ეს ამბავი მარინეს მშობლებმა, თავზარდაცემულნი გამოემართნენ თავისი გაუბედურებული ქალიშვილის სანახავად და თან წამოიყვანეს „საიქიოს ნამყოფი“ გლეხი ვასილი, რომელსაც გულთმისნობისა და ბოროტისაგან ადამიანის დახსნის შემძლებელი კაცის სახელი ჰქონდა გავარდნილი მთელ იმ კუთხეში.

ვასილმა შეკრებილ მეზობელთა წინაშე დაჰკითხა მარინე. „მეეკითხა, თუ რამდენად მართალია დედამთილის მიერ მისი გაკუდიანების ამბავი. გამოირკვა, რომ თურმე მარინეც დარწმუნებული ყოფილა იმაში, თითქოს მართლაც მოაჯადოვა და თავისი „კუდიანობის“ მონაწილედ გაიხადა ფეფენამ. მარინემ

უამბო შეკრებილთ თავისი მძიმე ხვედრის შესახებ ნიკასა და ფეფენას ოჯახში, მოუთხრო, თუ როგორ დაიმონა და დამორჩილა იგი დედამთილმა, როგორ გამოეცხადა მას ფეფენა სხვადასხვა მოჩვენების სახით და გაიყოლია იგი თავისი ავსულობის ბოროტ გზაზე.

დამსწრეთა აზრით, ამგვარმა აღიარებამ, ამ „გამოტეხამ“ ცოდვებისაგან გასწმინდა, „კუდიანობისაგან“ იხსნა მარინე. თუმცა „გამოტეხილს“ დიდი ხნის სიცოცხლე აღარ უნდა დარჩენოდა. მართლაც, ამ საჯაროდ დაკითხვამ. აქ განცდილმა სულიერმა მღელვარებამ კიდევ უფრო დააუძლურა ისედაც ჯანგატეხილი მარინე, იგი ლოგინად ჩავარდა და მისი მდგომარეობა ყოველდღიურად უარესდებოდა.

მარინეს მამამ, შვილის დალუპვით გამწარებულმა მარკოზმა, სასტიკად იძია შური ფეფენაზე, გახურებული ნალით დადალა მარინეს გამაუბედურებელი დედაბერი. ამ სურათის შემხედავმა მარინემ ველარ გაუძლო განცდილ შიშსა და მღელვარებას და გარდაიცვალა.

ნაწარმოები მთავრდება გაუბედურებული ესმასა და მარკოზის მოთქმა-გოდებით, ნაადრევად დალუპული მარინეს დატირებით.

ასე დაუნდობლად შეიწირა და იმსხვერპლა მარინეს სიცოცხლე პატრიარქალური წყევლიადით მოცული სოფლის დუხჭირმა სინამდვილემ. მარინე ამ შემთხვევაში ღრმა განზოგადებითი ძალის მხატვრულ სახეს წარმოადგენს, რომელშიც გამოხატულია მემამულურ-კაპიტალისტური წყობილების პირობებში ფეხქვეშ გათელილი და დასალუპავად განწირული ადამიანის დრამა.

ზოგი თანამედროვე დავით კლდიაშვილს უსაყვედურებდა ამ მოთხრობაში დახატული სურათის თითქოს ზედმეტად და გადაჭარბებულად დაბნელებას, საღებავთა ზედმეტ სიმუქეს. მწერალი არ იზიარებდა ამგვარ შენიშვნებს. მას სრულ სიმართლედ მიაჩნდა „მსხვერპლში“ მოცემული მხილება იმდროინდელი სოფლის სინამდვილისა და ნანობდა კიდევ, რომ აჩქარების გამო მან კიდევ ვერ თქვა ყველაფერი, რის თქმასა და გამოხატვასაც იგი ამ ნაწარმოებით აპირებდა.

„შერისხვასთან“ შედარებით „მსხვერპლში“ კიდევ უფრო გამძაფრებულია დავით კლდიაშვილის, როგორც კრიტიკული რეალიზმის მეთოდით შეიარაღებული მხატვრის მამხილებელი თვალსაზრისი თავისი თანამედროვეობის სოციალური ვითარების მიმართ. აღსანიშნავია, რომ ამ მოთხრობის ერთ-ერთი გმირის — „საიქიოს ნამყოფი“ ვასილის სახე პირდაპირ გადმოხატულია პროტოტიპისაგან, დავითის პირადი ნაცნობის, მის მეზობლად მცხოვრები პიროვნებისაგან. ამის შესახებ დავით კლდიაშვილი მოგვითხრობს: „ჩვენ ახლოს მეზობლად ცხოვრობდა „საიქიოს ნამყოფი“ გლეხი — ლევანა სირბილაძე, — შესამჩნევი პიროვნება... „საიქიოს ყოფნის“ ამბავი არა ერთხელ მომიყოლინებია ლევანისათვის და მისგან ეს ნაამბობი თითქმის სიტყვა-სიტყვით შეტანილი მაქვს ჩემს მოთხრობა „მსხვერპლში“.

როგორც ვხედავთ, „მსხვერპლი“ გლეხობის ყოფა-ცხოვრების ფონზე გაშლილი ნაწარმოებია და მის მთავარ გმირებსაც გლეხები წარმოადგენენ. მაგრამ ამ ნაწარმოებში ჩვენ უკვე ვხედავთ, თუმცა მკრთალად დახატულს, მოთხრობის მეორე პლანზე დაყენებულ ტიპს გალატაკებული აზნაურისა, — „გახრეკილ აზნაუშვილს“ (როგორც ამას ფედენა ეძახის) დავით კარუგდელაძეს. იგი მოთხრობაში მოჩანს უსაქმოდ, მსუბუქი ზნეობისა და ფუქსავატი ხასიათის ადამიანად, რომელიც მაცდუნებლად ადევნებია მარინეს, გამხდარა ამ საბრალო ადამიანის აუწერელი ტანჯვა-მწუხარების ერთ-ერთ მიზეზად და ნაცვლად რაიმე სიბრალულისა ან თანაგრძნობისა მარინესადმი, იგი, თავისი საქციელის გამჟღავნებით შეშინებული, აზნაურული ამპარტავნობით გაიძახის: „რა ჩემფეხებად მინდა მწვირიანი ყაზახის გომბიო“.

ამ სიტყვებში, დავით კარუგდელაძის ამ ხორცშეუსხმელ, ძუნწად, ესკიზურად მოხაზულ სახეში უკვე მოჩანს ჩანასახი დავით კლდიაშვილის შემოქმედების მთავარი გმირისა, პირველი კონტურები დაკნინებული აზნაურობის იმ სამყაროსი, რომელიც ისე ცხოველმყოფელად და ქვემარტი მხატვრული სისრულით გადაიშალა მის მომდევნო მოთხრობებში.

“სოლომან მორბელაძე“ დავით კლდიაშვილის პირველი ნაწარმოებია, რომელშიც მწერალმა თითქოს ერთბაშად მიაგნო თავისი შემოქმედების ძირითად თემას, მისთვის დამახასიათებელ სპეციფიურ მასალას, იდეებისა და სახეების თავისებურ სამყაროს. აქ პირველად მთელი თავისი ძალით და სისრულით თავი იჩინა დავით კლდიაშვილის, როგორც ხელოვანის ნიჭიერებამ და ოსტატობამ, მისმა მხატვრულმა ინდივიდუალობამ. სოლომან მორბელაძის ტიპის დახატვით დავით კლდიაშვილმა უკვე თქვა ის განსაკუთრებული სიტყვა, რომლისთვისაც იგი ისტორიულად მოწოდებული იყო ქართული ლიტერატურის განვითარებაში.

ფეოდალური საზოგადოების რღვევისა და თავადაზნაურული კლასის დაქვეითების პროცესის ასახვის საქმეში დავით კლდიაშვილს ჰყავდნენ წინამორბედნი და მასწავლებელნი ქართულ ლიტერატურაში. ჯერ კიდევ ქართული კლასიკური რეალიზმის დამწყების — გიორგი ერისთავის კომედიებში გამოჩნდა ისტორიის მიერ დასაღუპავად განწირული ამ წოდების ადამიანთა სახეების — დაუზოგავი სატირის ფორმებში დახატული სახეების მთელი გალერეა. შემდეგ ლავრენტი არდაზიანმა გადაშალა ქართველი მკითხველი საზოგადოების თვალწინ ჩვენს ქვეყანაში უკვე აღმოცენებული და ცხოვრების ზედაპირისაკენ დაძრული სავაქრო კაპიტალის წარმომადგენლებთან პირისპირ შეჯახებული რაინდაძეების სამყაროს უნუგეშო და უპერსპექტივო ვითარება. ამგვარად შემზადდა ნიადაგი იმ ლიტერატურული ტრადიციისა, რომელმაც თავისი კლასიკური გამოხატულება ჰპოვა ილია ჭავჭავაძის შემოქმედებაში და, აკრძოდ, მის მიერ დახატული ლუარსაბ თათქარიძის სახეში, რომელმაც დაუნდობლად გამოამხეურა ამ ოდესღაც დიდებული წოდების სრული დრომოქმელობა, მისი გონებრივი და ზნეობრივი დაცემა, მისი ცოცხალ ლეშად ქცევა, მისი პარაზიტობაში...

დავით კლდიაშვილს უშუალოდ წინ უსწრებდა ილია ჭავჭავაძის სკოლის დიდი ბელეტრისტი გიორგი წერეთელი, რომლის ქმნილებებმაც („მგზავრის წერილები“, „რუხი მგელი“, „მამიდა ასმათი“, „პირველი ნაბიჯი“, „ჩვენი ცხოვრების ყვა-

ვილი“) კიდევ მეტი სიცხადე და კონკრეტულობა მისცა ფეოდალური წყობილების ნგრევა-განწირულების სურათს.

ეს გზა დააგვირგვინა დავით კლდიაშვილმა თავისი შესანიშნავი მოთხრობებით. მან ასახა აზნაურული წოდების ვითარება უკვე ჩვენი ქვეყნის ისტორიული ცხოვრების ახალ საფეხურზე — კაპიტალისტური მეურნეობის სწრაფი აღმავლობა-განვითარების პირობებში, როცა თავადაზნაურობას უკვე სავსებით რეალურად ფეხქვეშ ეცლებოდა ეკონომიური საფუძველი და ხელში რჩებოდა ნივთიერ შინაარსს მოკლებული, ცარიელი გვაროვნული უპირატესობა.

რამდენადაც უფრო მეტის თავგამოდებით ებლაუქებოდა ისტორიული ხვედრით დამფრთხალი ეს წოდება თავის ერთადერთაა და უკანასკნელ დასაყრდენს, თავის წოდებრივ პრივილეგიას, მით უფრო აშკარად და ცხადად იჩენდა თავს წინააღმდეგობა კლასის რეალურ ვითარებასა და მის კონსერვატულ შეგნება-სულისკვეთებას შორის. ერთის მხრივ უკიდურესი სილატაკე და მეორე მხრივ აზნაურული ამპარტავნობა, ყოვლად უნიადაგო „კუდაბზიკობა“ — წოდებრივი ტრადიცია, რომელიც ახალ ვითარებაში სავალალო და სასაცილო მდგომარეობას უქმნიდა დაკნინება-გადაგვარების გზაზე თავქვე დაქანებულ ამ ადამიანებს.

აზნაურული წოდების უკანასკნელი მოდგმის ეს დრამა გამოსატა დავით კლდიაშვილმა თავის საუკეთესო მოთხრობებში. მართალია, მის მიერ დახატული სურათი ლმობიერი ჰუმორით არის გამსჭვალული, მაგრამ იგი სრული სიცხადით აშიშვლებს და ამზეურებს აზნაურული სულისკვეთების სრულ უმწეობას, მის საბოლოო დაწვრილმანებას და დაუზოგავად არღვევს წოდებრივი უპირატესობის ტრადიციებზე დამყარებულ ყოველგვარ ილუზიებსა და იმედებს ამ განწირული ადამიანებისა.

სწორედ ამ თვალსაზრისით უნდა გაიზომოს სოლომან მორბელაძის, როგორც დიდი განზოგადებითი ძალის მხატვრული სახის, მთელი ისტორიული პროცესის, მთელი წოდების ვითარების გადმომცემი ტიპის მნიშვნელობა და ღირებულება.

ოდესღაც მდიდარი და მძვინვარე წოდების ღვიძლი შეილისათვის — სოლომან მორბელაძისათვის ახალ ვითარებას

ხელიდან გამოუტაცნია არა მარტო ყოველგვარი ნივთიერი პრივილეგიებისა და უზრუნველი, ხელგაშლილი ცხოვრების საფუძველი, არამედ საარსებოდ აუცილებელი საშუალებანიც. სარაზიტული აღზრდა და აზნაურული ტრადიცია ნებას არ აძლევს სოლომანს რაიმე სასარგებლო შრომას მიჰყოს ხელი და საკუთარი ოფლით აცხოვროს თავისი გადატაკებული ოჯახი. იგი ცდილობს იოლი, უშრომელი გზით გაიტანოს თავი და მას მართლაც მოუძებნია ასეთი ხელობა — მაშვლობა, მაქანკლობა. დადის სოლომანი კარიდან კარზე თავისი „მოჩაქჩაქე ჯორით“, დაეძებს გასათხოვარ ქალს და ცოლსათხოვ ვაჟს, „იღწვის“, რომ საქმე მოაგვაროს მათ შორის, შეაუღლოს ისინი და სამაშვლოდ აღებული „ორიოდე გროშით“ შეინახოს ოჯახი. მოუსვენრად წანწალებს სოლომანი. „მაგ წანწალით ვმოულობ, შე დალოცვილო, ორიოდე გროშს“, — ამბობს იგი თავის მეუღლესთან საუბარში და მართლაც ეს „წანწალი“ გაუხდია თავის ერთადერთ პროფესიად, საარსებო საშუალების ერთადერთ წყაროდ. ✓

რამდენი დამცირება, შეურაცხყოფა, იმედის გაცრუება და გულისხეთქვაა დაკავშირებული ამ ერთის შეხედვით იოლსა და უშრომელ ხელობასთან! გაღარიბებულ აზნაურობას სამუდამოდ დაუვიწყნია თავისი ძველი რაინდული ტრადიციები და ახლა მისთვის სიყვარულისა, ოჯახისა და ცოლქმრული ურთიერთობის საკითხი გაშიშვლებული, გაათრეებული ვაჭრობის საქმედ ქცეულა. მზითევი გამხდარა მთავარ საზომად ქალ-ვაჟის ურთიერთ დაკავშირებისათვის და ამ მზითევის რაოდენობის გარშემო ნამდვილი ბრძოლა და ქიშპობა გაჩაღებულა.

თავის ამ შესანიშნავ ნაწარმოებში დავით კლდიაშვილმა განზრახ გადაგვიშალა თვალწინ აზნაურული ყოფა-ცხოვრების ეს ყველაზე ინტიმური მხარე — ცოლქმრული ურთიერთობის, ოჯახური ცხოვრების სფერო, რათა უფრო მკაფიოდ ეჩვენებინა, თუ რამდენად დასცა და დააქვეითა ზნეობრივადაც ეს წოდება ნივთიერმა გადატაკებამ, როგორ საბოლოოდ დააქინა და დააწვრილმანა იგი, როგორ შეიქრა „ორიოდე გროშისადმი“ ცხოველური სწრაფვა ამ კლასის ადამიანთა ცხოვრების თვით უაღრესად ინტიმურ სფეროებშიც.

აზნაურული წოდების ამგვარი ვითარების მეტად მკვეთრი დახასიათება მოგვცა მწერალმა „სოლომან მორბელაძის“ ერთ-ერთი გმირის — აზნაურ ბესარიონ საქარაძის სიტყვებში. სოლომანთან საუბარში საქარაძე ამბობს: „შე კურთხეულის შვილო, არ იცი, რა დრო მოგვესწრო, რა საცოდაობაში ვართ ერთიანად ჩავარდნილი? ყველას, მთელ აზნაურობას რა გასაჭირის დღე გვადგა, რა შავი დღე შემოგვესწრო? სამზითვო ფული კი არა, ლუკმა პურს ძლივსდა ვმოულობთ, წლიური სარჩო სანახევროდ აღარა გვაქვს.. ამასთან იმისთანა უღმერთობაც შემოვიდა, რომ სანამ ფულით ჯიბეს არ გაუტენი, ქალს აღარავინ თხოულობს. სად იშოვოს ჩემისთანა აზნაურ-შვილმა ხუთასი და ექვსასი მანეთი... კაი, გავყიდე მიწა, შევივიწროვე საქმე, ერთი მოვიშორე, როგორც იქნა, მეორეს და მესამეს რაღა უყოს კაცმა? ფიქრობ, ფიქრობ, მარა არაფერი გამოდის... ქალი კი ხანში შედის და თუ დროზე ვერ უჩვენე გზა, შემოგაბერდება ხელში და მერე ხელსაც არავინ მოჰკიდებს, დაგედვა შვილის ცოდვა. ღმერთს ვფიცავარ იმისთანა გარემოებაში ვართ, რომ ისევ ის სჯობია, კაცი ოჯახს რომ არ მოეკიდო!.. ღმერთს ვფიცავარ... აბა, რანაირია ახლა ჩემი მდგომარეობა? კაციც ხომ უარესი შეიქნა, რომ ერთმანეთის შებრალება აღარ იციან... ბიჭო, თუ კაი კაცი ვარ, სამოყვროთ გინდებვარ, რაღაზე მცარცვავ და მგლეჯავ, ამაზე მეტი უკულმართობა იქნება? ღმერთმანი, ცოდვაც არაა, რომ ამისთანობაში კაციც მოატყუო, თუკი რამე გავეწყობა“.

აი, ამ „შავი დღის“ მომსწრე ადამიანთა ურთიერთ ძარცვა-გლეჯის, ურთიერთ მოტყუების, ქიშპობა-ვაჭრობის ორომტრიალში არის ჩაბმული სოლომან მორბელაძე და იგი თავისი ყოველი სიტყვით, ყოველი ნაბიჯით უაღრესი სიცხადით განასახიერებს ამგვარ ვითარებაში ჩამდგარი მთელი წოდებისათვის დამახასიათებელ თვისებებს.

თავისი „მოქარგული ენით“ სოლომან მორბელაძე დაუსრულებლივ ქსოვს სიცრუის, პირმოთნეობის და თვალთმაქცობის ხლართს და ბოლოს თვითონ გაებმება ამ ხლართში, თვითონ რჩება ყველაზე მეტად მოტყუებული, იმედგაცრუებული. ასეთია ბედი დასაღუპავად განწირული ადამიანისა, რომელსაც

სხვა გამოსავალი რომ ვერ უპოვნია, ხავეისათვის ჩაუვლია ხელი.

უკიდურესი ნიეთიერი სილატაკისა და ამით გამოწვეულ ზნეობრივ დაკნინების ფონზე მოქმედებენ „სოლომან მორბელაძის“ გმირები. მოთხრობაში დახატული მთელი სურათი თითქოს ცოცხალი ილუსტრაციაა ბესარიონ საქარაძის მიერ თქმული ზემოთმოყვანილი სიტყვებისა.

მოთხრობის დასაწყისში ჩვენ ვხედავთ ერთ-ერთ გალატაკებულ აზნაურს — პლატონს, რომელსაც ოცი მანეთი უსესხებია სოლომან მორბელაძისათვის, ველარაფრით ველარ ამოუგია. იგი და ახლა კიდევ ერთხელ მიდგომია კარზე სოლომანს, რათა ხვეწნით და ვედრებით მაინც დაიბრუნოს თავისი „ორიოდე გროში“.

პლატონს შვილი შეუყვანია სასწავლებელში, ნანობს კიდევ, რადგან სწავლას „ნამეტანი ხარჯი უნდება“, მაგრამ ბავშვის დაჟინებას ველარ გაქცევია და ახლა მისი უკანასკნელი იმედი სოლომანისაგან ვალის ამოგებაზეა დამყარებული. „სოლომან, მომკლავ, თუ ამ ერთ თვეში არ მომეცი“, — ევედრება იგი მორბელაძეს.

პლატონის მოსვლისას სოლომანი შინ არ იყო. იგი თავისი ახლადწამოწყებული „სამაშვალო საქმის“ მოსაგვარებლად იყო წასული და შინ დაბრუნებულმა ეზოში მოუხწრო მევალეს. რა თქმა უნდა, სოლომანს არაფრად ესია მოგნებოდა პლატონის დანახვა, მაგრამ იგი მოხერხებულად მალავს ამ უსიამოვნო სტუმრის დახვედრით გამოწვეულ თავის შეშფოთებას.

„შენ არ დამენახე, პლატონ, და სხვა არაფერი მინდოდა! — შეესძახა სოლომანმა მოხუცებულს“.

„— რა კაი გუნებაზე ვიყავი მერე... უღვთო კაცი ყოფილხარ, პლატონ ჩემო, ღმერთმანი! — და სოლომანმა გულით გადიხარხარა და ხელი ჩამოართვა პლატონს“.

ვითომ ხუმრობს სოლომანი, ნამდვილად კი მართლაც მომაკვდინებლად არ ესია მოგნა პლატონის დანახვა. ამრიგად, პორველივე გამოჩენა სოლომან მორბელაძისა, მისი პირველივე სიტყვები გვიჩვენებს იმ შინაგან სიყალბეს, იმ წინააღმდეგობას სიტყვასა და სინამდვილეს შორის, იმ თვალთმაქცობას,

გაიძვერობას, რაც დამახასიათებელია სოლომანის პიროვნებისათვის. ასე ერთბაშად ამხელს მწერალი თავისი გმირის ხასიათის ძირითად თვისებას და შემდეგ, მთელი მოქმედების მანძილზე, უფრო და უფრო მეტი სისრულით იხატება ჩვენს თვალწინ ეს უაღრესად კოლორიტული და ტიპური სახე.

სოლომანმა აღუთქვა პლატონს, რომ მალე გადაუხდის ვალს.

„— მალე, მალე გაგისტუმრებ, მალე მოვიშორებ თავიდან შენს ვალს... ცოტა ფეხის გადადგმა შექმნა, თვარა ფულს ვერ ვიშოვიდი მე? მართლა ისე დაგლახაკავებული კი არა ვარ, ზოგიერთი აზნაუშვილი რომ გინახავს... უფულობას რომ შეუშინებია, ცხვირები ჩამოუშვიათ და არ იციან, რა ქნან. ცოტა კიდევ მომითმინე და მთლად დაგიბრუნებ იმ შენს ფულს“...

სოლომანის მიერ ამ დიალოგის მთელს მანძილზე წარმოთქმული ყოველი სიტყვა, აღსავსე ტრაბახით, პირმოთნეობით და უსაფუძვლო იმედებით, დამახასიათებელია არა მარტო თვით სოლომანისათვის, არამედ მთელი აზნაურული წრისათვის, მთელი გარემოცვისათვის.

დაიმედებული პლატონი შინ გაბრუნებას აპირებს. სოლომანი ეპატიჟება მას დარჩეს, ივანშმოს, ღამე გაათიოს, პლატონი უარზე დგას, დიდხანს გრძელდება პატიყობის ეს ცერემონიალი, რომელიც აზნაურულ „კუდაბზიკობის“, დრომოქმული და შინაარსგამოცლილი წოდებრივი ტრადიციის მკაფიო გამოხატულებას წარმოადგენს.

პლატონმა კარგად იცის, რომ მას ზრდილობისათვის ეპატიჟებიან, თორემ მართლა რომ დარჩეს, მასპინძლებს არაფერი მოეპოვებათ სტუმრის მისაღებად. სოლომანმაც კარგად იცის, რომ პლატონი უნდა მიხვდეს, თუ რამდენად „გულწრფელია“ მისი ეპატიჟება და სწორედ ამ იმედით უმეორებს იგი სტუმარს თავის დაყინებულ თხოვნას.

პლატონის წასვლისთანავე ცოლი უსაყვედურებს სოლომანს: „რატომ ხარ ასე წინდაუხედავი, შე უბედურო?“

— რა იყო, ქალო, ცუდი რა ვქენი? — ეკითხება სოლომანი.

— აბა, რომ ეპატიებოდლი იმ კაცს, რა გეგულებოდა სახლში მისატანად? ნეტავი შენ კულაბზიკობა არ გკირდეს და სსეა არა მინდა რა!.. რომ დარჩენილიყო, რას აპირებდი?!

— ერთი-ორი შეპატიებით რავე დარჩებოდა, შე ქალო, გადამთიელი ხომ არ არის, ჩვენებური ჩვევა არ იცოდეს. შევპატიე, ვალი მოვიხადე, ისე ხომ ვერ გაუშვებდი, ასე არ მეთქვა“.

ასე უფრო და უფრო მეტის სიციხადით გადაგვიშლის თვალწინ მწერალი თავისი გმირის ხასიათს, მის თავისებურ ბუნებას და შემდეგ გვიჩვენებს მას უკვე მისი „ხელობის“, მისი მთავარი „საქმიანობის“ ნიადაგზე წარმოშობილ ურთიერთობათა პირობებში.

აი, სოლომანი კარზე მისდგომია ბესარიონ საქარაძეს, რომლის ქალიშვილი ელპიტე ცოლად უნდა შერთოს ქაიხოსრო ქათამაძის ვაჟს, სამღვდლოდ გამზადებულ ახალგაზრდა—ნიკოს.

აივანზე სხედან სოლომანი, ბესარიონი, მისი მეუღლე და ელპიტეც. ყველას ეჩქარება გაიგოს, თუ როგორ მიმდინარეობს „ვაჭრობა“ მზითევის გარშემო, რამდენს დაჯერდება ქაიხოსრო, როგორ აგვარებს საქმეს სოლომანი, მაგრამ „ზრდილობა“, „ჩვეულება“ ნებას არ აძლევს მათ პირდაპირ საქმეზე დაიწყონ ლაპარაკი და ისიც საპატარძლოს თანდასწრებით.

იწყება გაუთავებელი და ყოვლად უმნიშვნელო საუბარი იმის შესახებ, თუ როგორი სიციხეები დაიჭირა ამ ზაფხულს, როგორ გრილი და წვიმიანი დღეები იყო შარშან ამ დროს და ა. შ. ბოლოს ისევ ბესარიონი ველარ ითმენს ამ უაზრო და მომბეზრებელ ლაპარაკს, იგი სადილის დასაჩქარებლად გზავნის ელპიტეს და მხოლოდ ახლა მოჰყვება სოლომანი თავისი „მოქარგული ვნით“, თუ როგორ მოხერხებულად დაითანხმა მან ქაიხოსრო შედარებით მცირე მზითევეზე, რომლის საგრძნობი ნაწილიც ვექსილის სახით უნდა გასცეს ბესარიონმა, ხოლო შემდეგ, შესაძლებელია ეს ვექსილი არასოდეს აღარ განაღდდეს. „ერთ დღეს შეიძლება კიდევ ამ ვექსილს ჩაიღულის წყალი დააღვეინოთ... რავე დავიჯერო შეილმა გიჩივლოთ!.. მძახალმა ამასობაში ეგებ ფეხებიც ქე გაჭიმოს!“ — შემპარავად ეუბნება გაიძვერა სოლომანი საქარაძეებს.

პელაგიამ და ბესარიონმა თითქოს იწყინეს სოლომანის ამგვარი აზრები, როგორ იკადრებენ ისინი არ გაამართლონ თავიანთი დაპირება, არ გაანაღდონ ვექსილი.

„— სიტყვას მოჰყვა, თვარა მეც კარგად ვიცი, რომ თქვენ ამგვარ რამეს არ იკადრებთ, — სიცილით სთქვა სოლომანმა, თუმცა გუნებაში კი დარწმუნებული იყო, რომ ბესარიონი ყოველ ღონისძიებას იხმარდა ვექსილის ტყუილა შერჩენისათვის“.

ასე მიმდინარეობს ურთიერთმოტყუების, ერთმანეთიაგან თავიანთი ნამდვილი აზრების მოხერხებულად დაფარვის ეს თავისებური შეჯიბრი, რომელსაც წარმოადგენს სოლომანის და მასთან დაკავშირებულ ადამიანთა მთელი ურთიერთობა.

ზედმიწვევით ნათლად ხედავს და უაღრესად გულზოდგინებით ამზეურებს მწერალი ამ ადამიანთა სულისკვეთებას.

სოლომანმა თითქოს დაარწმუნა ბესარიონი, რომ საქმე ისე რიგდება, როგორც საქარაძეებს უნდოდათ, თითქოს ყველაფერი შეთანხმებულია და მოგვარებული. მაშვალი გამარჯვებას ზეიმობს, მაგრამ სწორედ ამ დროს ბესარიონს აღმოხდა ერთი სიტყვა, რამაც გულის სიღრმემდე შეჰზარა საბრალო მაჰანკალი:

„— კი, რასაკვირველია, ყველაფერი ისე სასიამოვნოა, სოლომან ჩემო, მარა... — და ბესარიონმა სიტყვა გააგრძელა“.

სწორედ ამ „მარამ“ დასცა თავზარი სოლომანს. მაშ ჯერ კიდევ არ ყოფილა საქმე გათავებული, სამაშვლოს აღების საკითხი ჯერ კიდევ სანეგებიოდ ყოფილა. სჩანს, ბესარიონი რაღაც ახალი პირობის წამოყენებას აპირებს, რამაც შეიძლება სავსებით ჩაშალოს დაწყებული საქმე და მაშასადამე, ხელიდან გამოაცალოს სოლომანს ის „ტკიცინა წითელ-წითელი თუმნიანები“, რომლებსაც ასეთი რწმენით პირდებოდა იგი თავის მეუღლეს — ეფროსინეს და ჰირვეულ მევალეს პლატონს.

სოლომანს ეჩქარება გაიგოს ამ „მარას“ ნამდვილი შინაარსი — „რა მარა, ჰა? რა მარა, რა“, — ჩასციებია იგი ბესარიონს, მაგრამ პასუხი გვიანდება. სწორედ ამ დროს დიახბლისები სადილზე მიიპატიჟებენ მოსაუბრეებს. წყეული „მარას“ აზრის გამორკვევა — ნასადილევისათვის გადაიდო. სოლომანი შფოთავს, იგი უგუნებოდაა, მაღაც დაეკარგა, „სა-

დიღმა მეტად უგემურად ჩაიარა, სამაშვლოს დაკარგვის შიშმა მოუსვენრობაში ჩააგდო სოლომანი“.

მწერალი აქ თითქოს განზრახ ანელებს მოქმედების ტემპს და ახანგრძლივებს ამბავთა მიმდინარეობას, რათა მეტად გაამწვავოს თავისი გმირის მღელვარება და უფრო მკვეთრად გვიჩვენოს, თუ რამდენად დამოკიდებულია სოლომანი მორბელაძის ბედი და იმედები იმ „ორიოდე გროშისაგან“, რომელიც შეიძლება საბედისწერო „მარას“ გადაჰყვეს თან.

ნასადილევს სოლომანს დაძინება და მოსვენება შესთავაზებს. ეს კი უკვე აუტანელია სოლომანისათვის, მისი მოთმინების ყოველგვარი საზღვარი გადალახულია.

„— სწორედ არ დამეძინება, უნდა გითხრა, ბესარიონ ჩემო!“

— რატომ, შეე კაცო, არ იცი ნასადილევს ძილი თუ?

— ძილი კი არა... შენ იმისთანა მითხარი ერთი სიტყვა, რომ გამომამტერე და ის არი“.

სოლომანმა ვეღარ შეძლო ბოლომდე დაემალა თავისი შეშფოთება „მარას“ გამო. და მართლაც თურმე ჰქონია მას საფუძველი ღელვისა და მოუსვენრობისა. ბესარიონმა დაჟინებით მოითხოვა, რომ მზითევად დათქმულ სამოც თუმნიდან ქათამაძემ ასი მანეთი უნდა დაუკლოს, თუ არადა, იგი იძულებული იქნება უარი თქვას ამ საქმეზე. როგორღა გაუშხილოს სოლომანმა ეს ამბავი ქაიხოსრო ქათამაძეს, რომელიც უამისოდაც უკმაყოფილოა, რომ თავისი ნასწავლი და სამღვდლოდ გამზადებული შვილისათვის უფრო მეტი მზითვეის პატრონი საცოლე ვერ იშოვნა.

შესაძლებელია საქმე ჩაიშალოს. ალბათ ბესარიონს სხვაგან ეგულება უფრო „იაფი“ სასიძო, — ფიქრობს სოლომანი და მისი ეს მოსაზრება იმ გარემოებამაც განამტკიცა, რომ სწორედ ამ დროს ბესარიონის სახლს მიადგა „გლახა სიკოია“, რომელიც მორბელაძესავით კარიდან კარზე დაეხეტება სამაშვლო „ორიოდე გროშის“ საძებნელად.

გაბრაზებული და შეურაცხყოფილი სოლომანი გარბის საქარაძეების სახლიდან. ბესარიონი დამშვიდებულია. მას სჯერა, რომ სოლომანი შორს ვერ წავა, სამაშვლოზე ხელს ვერ

აიღებს. გმირის სულისკვეთების გადმოცემის იშვიათი ოსტატობით აგვიწერს დავით კლდიაშვილი შინისაკენ მიმავალ, სამაშვლოს დაკარგვის შიშით შეპყრობილ მორბელადის მდგომარეობას.

„ამასობაში სოლომანი გულ-ამღვრეული მიაჩქჩაქებდა აღმართ-დაღმართებში თავის ჯორს და წამდაუწუმ დეზებს სცემდა და საწყალ პირუტყვს, რომელსაც სრულიად ვერ გაეგო, რა დაუშავებია ასეთი თავის პატრონისათვის. სოლომანი დღემდე კარგად ეპყრობოდა ჯორს და დღეს კი ტყუილ-უბრალოდ ამდენი ცემა-ტყეპა მიაყენა. გაკვირვებული, თან შეშინებული და დამფრთხალი ჯორი მირბოდა და მისდა უნებურად, ხან კოლბოხებს წაჰკრავდა ფეხს, ხან ქვებს, წაიფორხილებდა ამდს გამო, რასაკვირველია. ახლა ამიტომ აგინებდა და ლანძღავდა პატრონი. არც გასამტყუნარი იყო სოლომანი, რომ ასე უდიერად ეპყრობოდა ჯორს. განა სოლომანს შექეძლო გულგრილად მიეღო ამდენის ხნის ნახლათორთები საქმის გაფუჭება?.. განა შეიძლება გულგრილად აიტანოს ამისთანა ამბავი ადამიანმა?.. განა შეიძლება, რომ ამ ყოფაში იმისთანა ცეცხლი არ მოეკიდოს, რომ ჯორი კი არა, თავისი თავი დააეიწყებინოს?“

„უიღბლო მაშვალი“ გულის ჯავრს იყრის საბრალო ჯორზე, იგი სწყევლის და აგინებს საქარაძეებსაც, მთელ „კუდაბზიკა“ აზნაურობასაც, მთელ იმ ცხოვრებას, რომელსაც ადამიანი ასეთ ყოფაში ჩაუყენებია.

ახლა სოლომანი იმის ფიქრშია, თუ როგორ გადაუხადოს სამაგიერო საქარაძეს, თუ როგორ ჩაუშალოს მას სხვაგან გამოწყებული საქმე, რათა „სიკოია გლახაკს“ მაინც არ ხვდეს სოლომანის მიერ დაკარგული სამაშვლო „ორიოდე გროში“.

მაგრამ სოლომანის მაშვლობით მოგვარებული საქმის ჩაშლის შიში თურმე არა ნაკლებ აღელვებს ბესარიონ საქარაძესაც, რომელიც დაინტერესებულია, რაც შეიძლება მალე მოიშოროს თავიდან და „პატრონს ჩააბაროს“ თავისი მოწიფული ქალიშვილი. მოულოდნელად, გვიან ღამით ბესარიონი კარზე მოადგება სოლომანს და ევედრება მოუხერხოს მზითველს დაკლება. გადაწყდა მოატყუონ ქაიხოსრო ქათამაძე, სასიძოს შეუთანხმდნენ წინასწარ, ხოლო ქაიხოსროს ჯვრისწერის დროს

გაუმხილონ, რომ ბესარიონს დათქმული ნაღდი ორმოცი თუმნის ნაცვლად შეუძლია მხოლოდ სამასი მანეთი გაიღოს. ასეც მოხდა. ქორწინების ღამეს, ჯვრისსაწერად ეკლესიაში წასვლის წინ აცნობეს ქაიხოსროს ეს ამბავი. კინაღამ არ ჩაიშალა ჯვრისწერა. თვით სასიძოს ხევწნა-მუდარამ, დამსწრეთა შუამდგომლობამ ძლივს გასტეხა ქაიხოსროს ჯიუტობა, მან ნება მისცა შვილს ჯვარის დაწერისა მხოლოდ იმ პირობით, რომ ჯვარსაწერი სამი თუმანი მაინც საქარაძეს გადაეხადა.

ბოლოს და ბოლოს, დიდის ვაი-ვაგლახით მოგვარდა საქმე, გაჩაღდა ლხინიც, ყველა მხიარულობს, ხოლო სოლომანი იყო უგუნებოდ. ბესარიონმა ცივი უარი უთხრა მას სამაშვლოს მიცემაზე, რადგან „უხეირო ქაიხოსრომ“ უკანასკნელი სამი თუმანიც წაართვა საქარაძეს და როგორც თვითონ ირწმუნებოდა, ბესარიონს „გროში-კაპიკიც“ აღარ დარჩენია.

კიდევ უფრო ცივად და მწყრალად დაუხვდა სოლომანს ქაიხოსრო ქათამაძე. მან მაქანკალს შესთავაზა, სამაშვლო ფული იმ შვიდი თუმნიდან აეღო, რომელიც ბესარიონმა დააკლო მზითვის წინათგანსაზღვრულ რაოდენობას. ისევ სიძემ შეიბრალა „უიღბლო მაშვალი“, მაგრამ ნიკოს საფუღეში მხოლოდ ექვსი მანეთი და ორი აბაზი აღმოაჩნდა. „მოიტანე, ბატონო, მაგ მაინც მოიტანე, თვარა მაგეც დაკარგული შეიქმნება ჩემთვის“, — გაიძახის გამწარებული სოლომანი.

ნიკო პირდება სოლომანს, რომ სამაშვლოს არ დაუკარგავს, ოდესმე გადაუხდის. „მედვას ვალად ეგ შენი სამსახური“, — ზიზარათავს იგი მაშვალს.

„ — ვალად გედვას? კუჭი მიხმება, ყმაწვილო, კუჭი მიხმება, ახლა მინდა საქმელი... ვალად გედვას? მაგის იმედი რას მომეშვევლება, როცა ეს არი ვკვდები კაცი? “ — მიუგებს სოლომანი.

მწარე ფიქრებში გართული ბრუნდება შინისაკენ იმედგაცრუებულნი მორბელაძე. იგი წყევლის თავის გაჩენას, თავის ხელშობას, ცხოვრებას, მთელ ქვეყანას, რომელმაც უკუღმართად წარმართა მისი ბედი. როგორღა მივიდეს შინ? რა უთხრას ეფროსინეს, რომელიც ასეთი იმედით მოელის ქმრის დაბრუნებას „ტყიციანა წითელ-წითელი თუმნიანებით“? როგორღა შე-

ხედოს პლატონს, რომელიც ხვალ თუ ზეგ კარზე მოადგება თავისი ვალის მისაღებად?

„— ღმერთმა დასწყევლოს, ღმერთმა! — თავისთვის ლაპარაკობდა სასოწარკვეთილებებაში მყოფი უიღბლო მაშვალი. — ღმერთმა დასწყევლოს ამნაირი გაძაღლებული ცხოვრებაც!.. დასწყევლა ღმერთმა ხელმოკლე აზნაურის უსაშველო, გაძაღლებული ცხოვრება! რითი გამოაქვთ თავი, მეტი გზა რომ აღარ აქვთ? ტყუილი, ტყუილი, ყოველ ნაბიჯზედ ტყუილი და უპირულობა! რა გამოვიდა ორი თვის ჩემი წანწალიდან? მოვატყუეთ, მომატყუეს და ერთი მოტყუებული ხვალ ან ზეგ კარზე მომიდგება კიდევ. საშველი თუ მაინც მოგვეცემა როდისმე, რომ კაცური ცხოვრება გვეღირსოს... ღმერთო, ღმერთო!..“

ასეთი უკიდურესი სასოწარკვეთილებით აღბეჭდილი სიტყვებით მთავრდება „სოლომან მორბელაძეში“ მოთხრობილი ამბავი. თუ შევადარებთ სოლომანის ამ სიტყვებს იმ იმედთან, ხალისიან განწყობილებასთან, რომლითაც მოცული იყო სოლომანი მოთხრობის დასაწყისში, ჩვენ ნათლად დავინახავთ. თუ როგორ იღუპება და ნადგურდება მისი, როგორც გარკვეული სოციალური ფორმაციის ტიპური წარმომადგენლის ყველა იმედი და ოცნება, როგორ უსაფუძვლოა და უნიადაგო მისი ყოველი ცდა თავისი მწარე ხვედრის შემსუბუქებისა, ცხოვრების ოდნავ მაინც გაუმჯობესებისა.

ასე გამოხატა დავით კლდიაშვილმა სოლომან მორბელაძის თან სასაცილო და თან საბრალო პიროვნებაში მთელი კლასის ისტორიული განწირულება, ასე დაასაბუთა მან თავისი ამ შესანიშნავი ქმნილებით გარდაუვალი კანონზომიერება ფეოდალური სამყაროს დასასრულისა.

თავისი შემდგომი ქმნილებებით მწერალმა კიდევ მეტად ვაამდიდრა და გაამრავალფეროვნა ამ მოთხრობაში დახატული სურათი, კიდევ მეტი მხატვრული ხორცშესხმულობა და დამაჯერებლობა მისცა „სოლომან მორბელაძეში“ ასახულსა და დასაბუთებულ ქვეშარტებას. ამ მხრივ დავით კლდიაშვილის ერთ-ერთ საუკეთესო ნაწარმოებად ითვლება მისი „სამანიშვილის დედინაცვალი“.

„სამანიშვილის დედინაცვალში“ დავით კლდიაშვილმა განასახიერა და მხატვრულად დაასაბუთა ის აზრი, რომ ცხოვრების სინამდვილე დაუნდობლად არღვევს დასალუბავად განწირული წოდების. შვილთა „სუსტ საფუძველზე დამყარებულ კმაყოფილებას“, აქარწყლებს მათ ყოველ იმედს და მოლოდინს, თავივე მიაქანებს მათ უფრო და უფრო დუხჭირი და გამწარებული ყოფნისაკენ.

თუ „სოლომან მორბელაძეში“ აზნაურული წოდების ამგვარი დაკნინება მწერალმა ასახა ოჯახის, სიყვარულის, ცოლქმრული ურთიერთობის სფეროში გაჩაღებული ვაჭრობის ფონზე დახატული „ორიოდე გროშის“ მაძებარი, იმედგაცრუებული მაქანკლის სავალალო თავგადასავლის მეშვეობით, „სამანიშვილის დედინაცვალში“ ავტორმა გვიჩვენა, თუ როგორ უბედურებად, როგორ საშიშ და საბედისწერო მოვლენად გადაქცეულა ამ ხალხისათვის ისეთი ბუნებრივი და კანონზომიერი რამ, როგორიცაა ადამიანის დაბადება, ხალხის ბუნებრივი მომრავლება.

გადარბეხული, ცხოვრებაგამწარებული აზნაური შიშით შეპყურებს ყოველი ახალი ადამიანის დაბადებას, რადგან ყოველ ახალგაჩენილში იგი თავის მოქიშპესა და შემცილებელს ხედავს — ისედაც უკიდურესად შევიწროებული ქონებისა და ლუკმის მოზიარეს.

ამ ცხოველურ შიშში მთელი წოდების უპერსპექტივობა, მისი განვითარების საბოლოო ამოწურულობაა გამოხატული. მასში მთელი სიცხადით მოჩანს, თუ როგორ ამხედრებულა ამ მომაკვდავი კლასის წინააღმდეგ ბუნებისა და ცხოვრების ყველა კანონი.

„— ცუდი დრო მოვიდა, ბატონო, ერთობ ცუდი დრო!.. ხალხიც მომრავლდა... — ჩხუბით თუ გაიწმინდება ცოტაზე ქვეყანა“, — შესჩივის „სამანიშვილის დედინაცვალის“ მთავარი გმირი პლატონ სამანიშვილი თავის თანამოსაუბრეს — აზნაურ ივანე გვერდევანიძეს, ხოლო ეს უკანასკნელი თავის მხრივ უპასუხებს:

„— ასეთია, ჩემო ბიძია, ეს ჩვენი მდგომარეობა და რას იზამ? გაკირვების დრო შემოგვესწრო და მეცადინეობა გვკი-

რია. ძალიან გაფრთხილება გემართებს ამ გაჭირვებასთან. ი დალოცვილი ღმერთიც თავის მოწყალებას ჩვენზე ძველებური წესით გვიცხადებს: ხალხს ამრავლებს, ყოველ ოჯახს შვილებით ავსებს... მადლიანს თითო-ოროლა შვილი დაეყო, ამათ მაგიერად სარჩო მიემატებია, ის არ აჯობებდა, შენი ჭირიშე?"

ამ მცირე დიალოგში მთელის სიცხადით არის გამოთქმული ის გულსტკივილი და უკმაყოფილება, რომელსაც განიცდის სარჩოს შემოკლებით გამწარებული აზნაური ადამიანთა საზოგადოების არსებობა-განვითარების იმ ძირითადი და გარდაუვალი საფუძვლის მიმართ, როგორცაა თაობათა წარმოშობა, ხალხის მომრავლება.

„ერთობ გადაპრანქული“, მაგრამ არსებითად ღარიბი აზნაურის, ბეკინა სამანიშვილის ერთადერთ ვაჟს — პლატონს არაფერი საფუძველი ჰქონდა იმისათვის, რომ თავისი ბედით კმაყოფილი ყოფილიყო, და თუ მაინც იგი გულდამშვიდებით ეწეოდა ცხოვრების ჰაპანს, არ უჩიოდა თავის ხვედრს, ეს მხოლოდ იმიტომ, რომ იგი ერთადერთი ვაჟი იყო თავისი მამისა — მაშასადამე, არავინ ჰყავდა შემცილებელი და თავისი მცირე მიწა-წყლის გამყოფი.

„ამაზედაც გმადლობ, უფალო! ამაზედაც გმადლობ, უფალო!“ — პირჯვრის წერით გაიძახოდა პლატონ სამანიშვილი და ამ წამოძახილით პლატონი თავის გულითად მადლობას უცხადებდა ზეციერ მამას, რომ შემცილებელი არავინ გაუჩინა მის ღარიბულ ლუკმაში“.

ამ უცნაურად „სუსტ საფუძველზე“ იყო დამყარებული სამანიშვილის ოჯახის კმაყოფილება, მაგრამ როგორ შეიძლება მყარი და ხანგრძლივი ვამომდგარიყო იგი? „რა საფიქრებელი იყო, რომ ასე ცოტათი შემოტყუებული ბედნიერება ისევე ცოტა მიზეზითვე ხელიდან არ გამოეცლებოდათ“.

ასეც მოხდა. სამანიშვილების თავზე დატრიალებული უბედურების სათავედ ბეკინას მეუღლის მარიკას გარდაცვალება გახდა, არა იმდენად იმიტომ, რომ პლატონისათვის თავისთავად სამწუხარო უნდა ყოფილიყო დედის დაკარგვა, არამედ უმთავრესად იმიტომ, რომ ჯერ კიდევ ჰარმაგ ბეკინას ეგებ ახალი ცოლის მოყვანაზე ეფიქრა და ამ გარემოებას კი შეეძ-

ლო წაერთმია პლატონისათვის მისი კმაყოფილებისა და ბედ-
ნიერების ერთადერთი საფუძველი.

პირველ ხანებში პლატონსა და მის მეუღლეს მელანოს ეჩ-
ვენებოდათ, რომ ბეკინა თავს კარგად გრძნობდა უმეუღლო-
დაც, მეტად კმაყოფილი იყო შვილითა და რძლით. ეს უკანას-
კნელნიც თავგამოდებით ცდილობდნენ რაც შეიძლება მეტად
ესიამოვნებინათ ბეკინა, მეტად მოეგოთ მისი გული, რათა მო-
ხუცს მეორე ცოლის შერთვაზე არ ეფიქრა.

მაგრამ აქედანვე დაიწყო პლატონის იმედების ჩაშლა და
გაუმართლებლობა, მისი ყველა ანგარიშისა და მოლოდინის
უსაფუძვლობა.

შვილისა და რძლის ტკბილი მოპყრობით კმაყოფილ ბეკინას
„სხვადასხვანაირი ნატვრაც გულში ეპარებოდა და დროთა გან-
მავლობაში ეჯინებოდა“. მოხუცს სურვილი აღეძრა „თავისი
შესაფერისი ამხანაგი“ ჰყოლოდა და მას ვერც კი წარმოედვი-
ნა, თუ რატომ უნდა ყოფილიყო მისი ეს განზრახვა საწყენი
პლატონისა და მელანოსათვის.

მამის ამგვარი გადაწყვეტილების გაგებამ თავზარი დასცა
პლატონს.

„— მღუპავ, მამა? — მივიდა იგი ბეკინასთან, — მღუპავ?
დანას მიყრი ყელში?.. რატომ მიმეტებ, შენი ჰირიმე?! —
ქლივს წარმოსთქვა პლატონმა და ხმაჩაწყვეტილმა უნუგეშოთ
ხელები გაშალა“.

ბეკრი იღავეს მამა-შვილმა, მაგრამ ყველაფერი ამაო იყო,—
გაცხარებული სიტყვა-პასუხიც, მოციქულებისა და შუაქაცების
მიგზავნ-მოგზავნაც... ბეკინას გადაწყვეტილება მტკიცე და
ურყევი აღმოჩნდა. ეს იყო პლატონის თავისებურად მშვიდი
ცხოვრების რღვევის დასაწყისი, მისი პირველი უშედეგო შებ-
რძობლება კარზე მომდგარ უბედურებასთან. მაგრამ პლატონი
მანც არ კარგავს იმედს, იგი აგრძელებს ბრძოლას თავისი
კმაყოფილების „სუსტი საფუძველის“ შენარჩუნებისათვის. და
მოთხრობის მთელი განვითარება გვიჩვენებს, როგორ მარცხ-
დება პლატონი თავისი ამ ბრძოლის ყოველ ნაბიჯზე, როგორ
ცრუვდება მისი ყველა იმედი და ანგარიში. სინამდვილე ყვე-
ლაფერში და ყოველთვის ეწინააღმდეგება პლატონის განზრახ-

ვებსა და მოლოდინს. ასეთია განწირული ადამიანის, განწირული წოდების უიღბლო შვილის ბედი.

რაკი გაჯიუტებულ ბეკინას თავისი გადაწყვეტილება ვერ გადაათქმევინა, პლატონმა განიზრახა თვითონ დასდგომოდა მაშვლად მამას, რათა მისთვის ისეთი საცოლე გამოენახა, რომელიც ორნაქმარევი ყოფილიყო და არც ერთი ქმრისაგან შვილი არ ჰყოლოდა. პლატონი ფიქრობდა, რომ ასეთი დედინაცვლის მონახვით იგი დაზღვეული იქნებოდა იმ საშიშროებდაგან, როგორსაც წარმოადგენდა მისთვის ქონების ახალი მონაწილისა და გამყოფის დაბადება — ძმის გაჩენა.

შედარებით ადვილად დაითანხმა ბეკინა პლატონმა, რომ მისთვის მიენდო სადედინაცვლოს გამონახვა, მაგრამ ასევე ადვილი როდი იყო ორნაქმარევი უშვილო ქვრივის გამოძებნა. პლატონი და მელანო დღედაღამ ასეთი ქვრივის კვალის მიგნებაზე ფიქრში იყვნენ გართულნი და რაკი ასეთი ვინმე მათ ნაცნობებში ვერ გაიხსენეს, პლატონმა გადაწყვიტა, გზას გასდგომოდა და სოფელ-კუთხე შემოევლო, ეგებ სადმე წაწყდომოდა შესაფერ სადედინაცვლოს.

მაგრამ ფეხით ვერავის მიაღდება კარზე აზნაური პლატონსამანიშვილი. მან ინათხოვრა ერთი დაშავებული, უქმელობისაგან და მუღმივი ხედნისაგან ზურგგადატყავეებული, არაქათგამოლეული ცხენი.

„— ამაზე შეჯდომა რავა შეგიძლია!“ — ეუბნება ცოლი პლატონს.

„— აბა ფეხით ვის მივადგე, შე ქალო? — უპასუხებს პლატონი.— ფეხ-ფეხა მივყვები, ბატონო, ფეხ-ფეხა მივყვები... სირცხვილისათვის მიმყავს, თვარა რა!“

აზნაურული ამპარტავნობა, უაზრო ტრადიცია აიძულებს პლატონს თან წაიყვანოს ეს „გახრეკილი პირუტყვი“ მხოლოდ სხვის დასანახავად, მხოლოდ „სირცხვილისათვის“.

ასე შეუცვლია საგნების პრაქტიკული აზრი და დანიშნულება შინაარსგამოცლილ გეაროვნულ ტრადიციას. მწერალი აზნაურული ყოფის ყოველ წვრილმანში ამხელს ამ გარემოებას, რაც თავის მხრივ კლასის დრომოკმულობის ამკარა მომასწავებელია.

მწერალი თანდათანობით ამძაფრებს პლატონის გამგზავრების სურათს, სულ უფრო და უფრო სასაცილოს ხდის მას, რათა ამთავითვე შეგვიძინოს წარმოდგენა ამ უცნაური მოგზაურობის მთელ ისტორიაზე.

აი, პლატონი კაზმავს თავის „ბედაურს“ და უკანასკნელ წუთში აღმოჩნდა, რომ მოსართავის აბზინდს ენა არ ჰქონია:

„— აი, ამოგივარდა პატრონი! — მიძახა პლატონმა, მოსართავს რომ ხელი მოჰკიდა. — მეიტა, მელანო, ჩხინკი იქნება რამე, ენა არ ჰქონებია აბზინდს, მეიტა მალე, თუ ქალი ხარ!

დაამაგრა მოსართავი ჩხინკით პლატონმა, დაიხურა ქუდი, გადაიგდო ბეჭებზე ყაბალახი, მოხსნა თავისი თეძობამობუსკული რაში და თითქმის წაათრია უგულოდ მიმყოლი ცხენი კიშკრისაკენ“.

პლატონის გამგზავრების სცენა იმდენად სასაცილოა, თანაც იმდენად დამახასიათებელი აზნაურული ყოფისათვის, რომ მწერალი არ ზოგავს საღებავს, რათა უფრო მკაფიოდ აღბეჭდოს იგი მკითხველის მეხსიერებაში.

„— ეს ბედაური ვის გამოართვა, მელანო ჩემო?— მიმართა ბეკინამ კიშკრიდან უკან გამობრუნებულ რძალს.

— პავლია ღომიაშვილს, ბატონო!

— არ დაუვარდეს გზაში, შე ქალო! — გაიცინა მოხუცებულმა.

— სხვის შესახედავად წეიყვანა, ბატონო... სასირცხვილ-სანამუსოთ, თვარა სხეებრ რას არგია!“

ასე დაიწყო სადღეინაცვლოს მაჩებარი პლატონის მოგზაურობა თავისი „გახრეკილი ბედაური“ და სწორედ ამ მოგზაურობის აღწერილობა წარმოადგენს „სამანიშვილის დედინაცვილის“ ძირითად ნაწილს. იგი იშლება როგორც ერთიანი, გარკვეული კომპოზიციური გეგმით შესრულებული პანორამა, რომლის სივრცეზეც მკითხველის თვალწინ იხატება ახალი და ახალი ტიპები, ახალი და ახალი სურათები, ერთმანეთზე უფრო მეტყველად და მკაფიოდ დამახასიათებელნი იმერეთის სოფლის, აზნაურული წრის ყოფა-ცხოვრებისა.

აი, პლატონს წამოეწია ვიღაც ცხენოსანი. პლატონს არაფრად ესიამოვნა თანამგზავრის დანახვა. მას მარტოდ უნდა სია-

რული. ფეხდაფეხ უნდა მიჰყვეს თავის ცხენს, ხოლო სხვასთან ერთად მოგზაურობისას იგი იძულებულია ცხენზე შეჯდეს.

მგზავრი გაურბის და უფრო ხის თანამგზავრს. ადამიანს მარტობა უნდა, მას რცხვენია სხვისი, ეშინია, რომ სხვამ გაიგოს მისი ნამდვილი ვითარება. ასეთია ამ ადამიანთა მდგომარეობა.

თანამგზავრი გამოდგა სოფლის ადვოკატობით ცნობილი აზნაური ივანე გვერდევანიძე, „წვერებმოპარსული, კაზიროკ-ქუდიანი, ქოლგით ილღის ქვეშ, წითური სახის კაცი“.

ივანე გვერდევანიძის სახით მწერალმა აზნაურული წოდების ერთი წრის ტიპიური პორტრეტი მოგვცა, ისეთი ადამიანებისა, რომლებსაც გადაუწყვეტიათ რაიმე საშუალებით თავი დააღწიონ კარზე მომდგარ სილატაკეს და ამ მხრივ აუმუშავებიათ თავიანთი მოქნილი ენა და ცბიერებაში, სხვის მოტყუებაში და გამორჩენის მოპოებაში გაწაფული გონება.

ივანე გვერდევანიძესთან მუსაიფში პლატონმა შემთხვევით გაიგო მისთვის მეტად მნიშვნელოვანი და სასიამოვნო ამბავი. თურმე სოფელ ქვედურეთში, აზნაურ ბრგვაძეების ოჯახში ყოფილა ერთი ქვრივი, რომელსაც ორი ქმარი გარდაცვლია და არც ერთისაგან შვილი არ დარჩენია. ამ ამბავმა იმედით და სასოებით ალაფრთოვანა სადელინაცვლოს მაძიებელი და ისიც კმაყოფილი დარჩა გვერდევანიძესთან ამ მოულოდნელი შეხვედრის, თუმცა ადვოკატის თოხარიკი ცხენის აყოლებით ქენებამ არაქათი გამოაცალა მის „გახრეკილ“ ცხენს და სრულიად უვარგისი გახადა ის შემდგომი მგზავრობისათვის.

მალე პლატონისა და გვერდევანიძის გზები გაიყარნენ. თანამგზავრები დაშორდნენ ერთმანეთს და მკირე ხნის შემდეგ პლატონი მიაღგა თავისი დის — დარიკოს ეზოს. დარიკო ცოლად ჰყავდა აზნაურ კირილე მიმინოშვილს. ამ უკანასკნელის სახით მკითხველის თვალწინ წარმოსდგება კიდევ ერთი თავისებური და სავსებით დამახასიათებელი ტიპი აზნაურული წოდებისა. იგი ერთი უდარდელი, უზრუნველი ახალგაზრდა კაცია, რომელიც მუდამ ქეიფსა და დროსტარებაშია გართული და მხოლოდ ამაში ხედავს ცხოვრების ერთადერთ აზრსა და დანიშნულებას.

„— ჩვენ გახლავართ მიმინოშვილები!“ — თავმომწონედ

გაიძახის კირილე: „მიმინოს შვილები... მიმინოს!.. ჩვენთან რა უნდა მწუხარებას... ჩვენ თავს არავის არ დავატყვევებინებთ... გვაროვნობით ვართ ასე... სადაც სიამეა და მოლხენა, იქ ჩვენც ვართ. ასე მოგვდგამს გვაროვნობით! აბა, შენი ჭირიშე, ორიოდე დღე ვიცოცხლო, გული მწუხარებით ვევიგსო, მოლხენა დავიკლო და ისე წაეყარევიო ზედ მიწა? შენც არ მომიკვდე! მაგაზე მეტი სისულელე იქნება? კაცი მუდამ მხიარული უნდა იყვე და სხვასაც იამება შენი შეხედვა...“

ასეთია კირილეს „ცხოვრების ფილოსოფია“ და განა მართო კირილესი?! მიმინოშვილის ამ სიტყვებში გამოთქმულია სულისკვეთება აზნაურული ახალგაზრდობის მთელი იმ თაობისა, რომელსაც ამ წოდების დაცემა-დაკნინების უკანასკნელ საფეხურზე დაუკარგავს ყოველგვარი უნარი რაიმე სასარგებლო და შინაარსიანი ადგილის მოპოვებისა ცხოვრებაში და ამიტომაც მთლიანად მისცემია ლოთობა-გართობის უაზრო, ერთფეროვან სტიქიას.

კირილე გამუდმებულად ცხენზე ზის და გზაზეა დამდგარი ეძებს, თუ სადმე ქორწილს წააწყდა ან სატირალს, ან წვეულებას. ხან ერთ ნათესავს მიადგება კარს, ხან მეორეს და ასე წლიდან წლობამდე უნაყოფო ხეტიალში, სმაში, აყალ-მაყალში მიდის მისი დღე და წუთისოფელი.

პლატონის მოსვლისასაც კირილე უკვე გზაზე იყო დამდგარი და სადაც, ალბათ მორიგ წვეულებაზე მიეჩქარებოდა. გზიდან დააბრუნეს იგი დიდი ხნით უნახავი ცოლისძმის სტუმრობის გამო.

პლატონმა უამბო დასა და სიძეს თავისი მოსვლის, თავისი მოგზაურობის ნამდვილი მიზეზი. რამდენადაც დარიკო გააკვირვა და შეაშფოთა პლატონის ნაამბობმა, იმდენად გაამხიარულა მან კირილე. უკანასკნელმა მტკიცედ გადაწყვიტა, თან წაჰყოლოდა პლატონს, ვითომცდა „სიმაურისათვის უნდა გეისარჯოს“. ნამდვილად კი მან მოხერხებული შემთხვევა იშოვნა, რომ კარდაკარ იაროს და სადმე ქეიფ-წვეულებას გადაეყაროს.

დამ და სიძემ ვახშამი გაუმართეს პლატონს და იმ ვახშმობის აღწერისას მწერალმა კიდევ ახალი შტრიხებით შეავსო მიმინოშვილის პორტრეტი, კიდევ ერთხელ გამოათქმევინა მას

თავისი აზრი ცხოვრებაზე, ადამიანისა და ოჯახის დანიშნულებაზე: „აბა, რათ მინდა ოჯახი, თუ ჩემთან მოსული კაცი, მერე კიდევ რა კაცი, ცოლისძმა, ქორწილში რომ მპატიუობს, არ დავათვრე, არ დავალევიე რჯულზე... რომ ასე არ ვუქნა, მასთან რომ მივალ, აღარც მე დამალევიენებს და წყალნასვამს გამომისტუმრებს... რაზე ვუმტრო ჩემ თავს? რატომ ვქნა ეგ?.. ხა, ხა, ხა... სულელი ვარ? თუ გიყვარდე, ერთბაშად გამოცალე ეგ ყანწი... სადედინაცვლოს სადდეგრძელო!.. მაგრე, მაგრე!.. შენი ქირიმე, ბეზ კაპლი, ბეზ! — ხრიალბოდა კირილე კიდევ დიდხანს“.

ბევრი ვაი-ვაგლასი დაატეხა თავს პლატონს ასეთი სიძის თანამგზავრობამ. თითქმის ძალდატანებით წაიყოლია პლატონი კირილემ ქორწილში შაფათაძისას, სადაც ქირვეულმა მიმინოშვილმა სრულიად უმიზეზოდ ჩხუბი და დავიდარაბა ასტეხა და პლატონიც იძულებული გახდა ამ ჩხუბში ჩარეულიყო.

მთელი ეს სურათი შაფათაძის ოჯახში გაჩაღებული ქორწილისა, მახარობლის „შემოფრენისა“, სიძისა და მისი მაყრიონის მობრძანებისა, „გახურებულ“ სმა-მოლხენისა და დასასრულს, ყოველივე ამის დამაგვირგვინებელი უმიზეზო აყალმაყალისა და ცემა-ტყეპისა მოთხრობაში აღწერილია ცხოვრების ისეთი ღრმა ცოლნით, საყოფაცხოვრებო მასალის ცხოველყოფელი ხატვის ისეთი ძალით, რომელიც ახასიათებს დაკითხულ დღიანშილს, როგორც ქემმარიტად დიდ რეალისტ მხატვარს.

ქორწილის მეორე დღეს, ჩოხებშემოხეული და ნაცემ-ნატყეპი სიძე-ცოლისძმა გზას გაუდგნენ და სამანიშვილის სადედინაცვლოს კვალის საძებნად კირილეს მამიდასთან — სალომესთან მივიდნენ. სალომე ცოლად ჰყავდა შეძლებულ აზნაურს ჯიმშერ სალობერიძეს, რომლის ოჯახის კარიც მუდამ ღია იყო მოლხენისა და დროსტარებისათვის მოსიარულე აზნაურებს და აზნაურებისათვის. კირილესა და პლატონის მისვლისას, როგორც ყოველთვის, აქ თავი მოეყარა ასეთ აზნაურდობას. კირილემ თავისი შესაფერავ სარბიელი ჰპოვა. აქაც გაჭირვეულდა, ერთი აღნაქოთი ასტეხა და სიმთვრალით გონებადაკარგულმა, უმიზეზოდ განაწყენებულმა დასტოვა ეს ოჯახი

... ჯიმშერ სალობერიძისას კირილეს მიერ დატრიალებული

შფოთის აღწერით ავტორმა თითქოს დაასრულა მიმანოშვილის სურათის, მისი, როგორც გარკვეული ტიპის ხატვა და რაკ. კიდე მეტის თქმა ამ პიროვნების შესახებ საჭირო აღარ იყო მოხერხებულად გაიყვანა იგი მოთხრობის სარბიელად.

მხატვრული ზომიერების გრძნობით ნაკარნახევი ასეთი ზერხი დამახასიათებელია დავით კლდიაშვილის სამწერლო სტილისათვის.

სალობერიძის შეძლებული ოჯახისა და თვით ჯიმშერის პიროვნების დახატვით მწერალმა კიდეც ერთი ახალი მოტივი შეიტანა მის მიერ მოცემულ აზნაურული ყოფა-ცხოვრების ამსახველ ვრცელ სურათში.

ჯიმშერი იშვიათ გამონაკლისს წარმოადგენს გალატაკებული აზნაურობის წრეში. იგი გონიერი მეურნეა და შეძლებული მოსახლეც. ასეთებიც იყვნენ აზნაურთა შორის, მაგრამ მათი არსებობა, რა თქმა უნდა, ვერ სცვლიდა იმ საერთო მდგომარეობას, რომელშიც მთელი წოდება, მთელი კლასი იყო ჩაყენებული. ჯიმშერ სალობერიძის შეძლებული ოჯახის ფონზე კიდეც უფრო მკაფიოდ და მწვავედ გამოჩნდა სახე აქ შეკრებილი გალატაკებული აზნაურობისა, რომლის უწყელაზე დამახასიათებელ ტიპს ამ შემთხვევაში არისტო ქვაშავაძე წარმოადგენს.

აზნაურ არისტო ქვაშავაძეს თურმე სახლიც კი არ ჰქონია. მის ეზოში თურმე მხოლოდ ფიცრები ჰყრია, რომლებიც მას მძებთან გაყოფისას რგებია. ერთი სვეტი დაუდგამს და „მას-სარობისათვის“ მარტო ერთი კარი აუკიდებია ამ სვეტზე. თვითონ კი ეს „უსახლკარო ფეოდალი“ იძულებულია დაუსრულებლივ ინეტიალოს, რომ სადმე სტუმრობა-მოლხენას წააწყდეს და ამრიგად თავი გაიტანოს. აზნაურული „კუდაბიჯობის“ გამო არისტოს დაუპატიჟნია ვიღაც მასავით უქმად მოზტიალე აზნაური და რაკი საკუთარი სახლი არ გააჩნდა. „ჯახასი“ ნათლიმამისას მიუყვანია სტუმარი და იქ დაუთვრია იგი, ამნაირად მოუხდია ვალი სტუმრის წინაშე.

აი, ამ არისტო ქვაშავაძეს გაეცნო პლატონი სალობერიძეებს ოჯახში. არისტო ახლო ნათესავი გამოდგა ქვედურეული ბრეგაძეების იმ ქვრივისა, რომლის შესახებაც პლა-

ტონს სოფლის ადვოკატი გვერდევანიძე ელაპარაკებოდა. არისტომ თვითონ შესთავაზა პლატონს სადედინაცვლოდ ეს ორნაქმარევი უშვილო ქვრივი და თვითონვე იკისრა მაქანკლად გახდომოდა საკუთარ მამიდას.

პლატონმა და არისტომ ქვედურეთისაკენ გასწიეს. აქ კიდევ ერთი აზნაურული ოჯახის აღწერით მწერალი ჩვენს თვალწინ გადაშლის კიდევ ერთ სურათს ამ წოდების ყოფაცხოვრებისა. ყველაფერი აქ ღრმად არის აღბეჭდილი გაღატაკებისა და ამასთანავე ზნეობრივი და გონებრივი დაკნინების დალით.

დაუფიწყარ შთაბეჭდილებას ახდენს აქ მოთხრობილი ამბავი იმის შესახებ, თუ როგორ მოხვდა არისტოს ფეხებში ვეებერთელა ქოლოკი, რომელსაც სტუმრებისათვის დასაკლავად განწირულ ქათამს ესროდნენ მასპინძლები.

ეს ეპიზოდი ზედმიწევნით დამახასიათებელია გაღარიბებული აზნაურობის სტუმარ-მასპინძლური ტრადიციისა.

პლატონმა გაიცნო და დიდადაც მოიწონა ბრეგაძის ქვრივი. საქმე მოგვარდა. ბეკინას შერთეს ელენე. მხიარული ქორწილიც გადაიხადეს და სამანიშვილის ოჯახში თითქოს ბოლო მოეღო დროებით შეშფოთებას. პლატონი საბოლოოდ დამშვიდდა და კვლავ ძველებური კმაყოფილებით განაგრძო შრომა და ცხოვრება.

მაგრამ განა დიდხანს გაგრძელდებოდა ეს „ცოტათი შემოტყუებული ბედნიერება“, ეს „სუსტ საფუძველზე დამყარებული კმაყოფილება“?

ერთ დღეს პლატონის მეუღლემ, მელანომ, რაღაც უცნაური შენიშნა ელენეს. მას ეჭვი აღეძრა, თითქოს ელენე ფემძიმედ იყო და ამ ეჭვის გაზიარებით თავზარი დასცა პლატონს.

ერთ ხანს პლატონი ცდილობდა გული დაემშვიდებინა თავი დაერწმუნებინა, რომ მელანოს ეჭვები უსაფუძვლოა. მაგრამ მისი მთელი არსება ამ ეჭვით აღძრულმა შიშმა შეიპყრო: მან სავსებით დაჰკარგა მოსვენება და ძილშიც კი სიზმრად იმ საშინელებას ხედავდა, რომელიც, პლატონის წარ-

ჰოდგენით, თავს დაატყდებოდა მის ოჯახს, თუ მართლა ელენესაგან ბეკინას შვილი შეეძინებოდა.

კოშმარული სიზმარი ნახა პლატონმა. მას ესიზმრა, თუ როგორ გამართლდა მელანოს ეკვი, თუ როგორ გაუჩნდა პლატონს ოჯახის გამყოფი და მონაწილე, თუ როგორ დაირღვა და შუა გაიყო სამანიშვილების სახლკარი, ავეჯი, მთელი მათი ქონება, ბატ-ქათამ-ინდაურით გათავებული.

პლატონ სამანიშვილის ამ სიზმრის მომთხრობი ეპიზოდამ ნაწარმოების უძლიერეს ადგილს, საერთოდ, დავით კლდისშვილის შემოქმედების ერთ-ერთ საუკეთესო ფურცელს წარმოადგენს. პლატონის შიში გამართლდა. ელენე მართლაც ეყვებოდა იყო და თავზარდაცემული პლატონი ხედავდა, თუ როგორ ახლოვდებოდა მისთვის საბედისწერო დღე ქონების მონაწილის დაბადებისა. ელენეს მუცლის მოშლის ყოველგვარი იმედი ამოა გამოდგა, თუმცა ერთხელ გამწარებულმა პლატონმა მუცელში წიხლის ჩაკვრაც კი მოუნდომა დედინაცვალს.

ამაო გამოდგა აგრეთვე სამანიშვილების უკანასკნელი იმედიც, რომ ელენეს ეგებ ქალი ჰყოლოდა და არა ვაჟი. სინამდვილე კვალდაკვალ აქარწყლებდა საბრალო აზნაურის ყველა იმედს. ელენეს სწორედ ვაჟი დაებადა.

პლატონი დაუყოვნებლივ გაეყარა მამას. მისი გული ვერ მოაღბო უსაზღვროდ შეწუხებული მოხუცის თხოვნა-მუდარამ. საყვარელი შვილის გაშორებით დაჯავრიანებული ბეკინა მალე გარდაიცვალა. სიკვდილის წინ მან დაიბარა პლატონი და ცხარე ცრემლით შეავერდა მას უდანაშაულო დედაბერა ელენე და მით უფრო უდანაშაულო უმწეო ყრმა.

მაგრამ ამანაც ვერ იმოქმედა პლატონზე. იგი სამუდამოდ მტრად გადაეკიდა დედინაცვალს და უმცროს ძმას.

ასე სამწუხაროდ დაბოლოვდა სამანიშვილების ოჯახის თავგადასავალი. ეს ამბავი ღრმა განზოგადებითი ძალით განასახიერებს ისტორიულ ბედს მთელი აზნაურული წოდებისა. რომლისთვისაც დამლუპველ უბედურებად ქცეულა ცხოვრების ნორმალური განვითარების ყოველი ბუნებრივი მოვლენა.

დავით კლდიაშვილის მოთხრობებს შორის „ქამუშაძის გაჭირვება“ ყველაზე ვრცელია მოცულობით, ყველაზე რთული სიუჟეტის კომპოზიციით და ყველაზე მრავალფეროვანი ტიპაჟის მხრივ. [ამ ნაწარმოებში მწერალმა კიდევ უფრო ფართოდ და უფრო მეტი მძაფრი საღებავებით ასახა ფეოდალური სამყაროს რღვევა-დაკნინების პროცესი, გვიჩვენა აზნაურთა უკიდურესი გაღატაკება, მათი ყველა იმედისა და ბოლოდინის გაცემტვერება, მათი „ბუდეების“ უღმობელი ნგრევა, მათი კარ-მიდამოების სრული გაპარტახება.] 5.

ამ მოთხრობაში დავით კლდიაშვილმა ერთმანეთს დაუპირისპირა სოფელი და ქალაქი, თავისებური გაშუქება მისცა „თავმომწონე, უფრო ღონიერი“ ქალაქის ძლევამოსილებას „მისუსტებულ სოფელთან“ ბრძოლაში და ასახა აზნაურული წოდების შვილთა ლტოლვა ქალაქისაკენ, სადაც მათ სოფლად საბოლოოდ ნიადაგამოკლილთ, რაღაც თავშესაფარი, გაჭირვებასა და სიღატაკისაგან თავდაღწევის საშუალება ეგულებოდა.

მოთხრობის მთავარი გმირი — გაღარიბებული აზნაური ოტია ქამუშაძე თითქოს შერიგებია ბედს, დაუვიწყნია წოდებრივი ამპარტავნობა, თონისა და სახნის-სახვნელისათვის მოუკიდნია ხელი და როგორც მისი მეზობელი ვლესები ისიც თავისი შრომით, წლიდან წლამდე დაუსრულებელი ჯაფითა და ოფლის ღვრით არჩენს ოჯახს.

[მაგრამ ოტიას შეგნებაში მაინც საბოლოოდ როდია ჩამქრალი და ჩაბნობილი აზნაურული სიამაყის, გვაროვნული უპირატესობის კვალი, „— მე ჩემს კეთილშობილებას ვერავინ წამართმევს და ვერც ვერავინ ჩამეს დამაკლებს“, — ამბობს იგი. თუმცა სინამდვილეში მის ყოველდღიურ ცხოვრებას აღარაფერი ეტყობა ამ „კეთილშობილობა-სა“ და არც რაიმე საფუძველი გააჩნია გაჭირვებულ ქამუშაძეს ამგვარი სიამაყისათვის.

უფრო მეტის თავგამოდებით ებრაუჟება თავის „კეთილშობილობას“ ოტიას დედა — ეკვირინე, რომელიც სხვის შესახებდავად გულს არ იტეხს, თითქოს ქედს არ იხრის და ყოველ მოხერხებულ შემთხვევაში მზადაა საზი გაუსვას თავის გვა-

როვნულ წარჩინებულებას, თავისი ოჯახის უპირატესობას სხვებთან შედარებით, იტრაბახოს წარსულით და თუმცა უსაფუძვლოდ, მაგრამ მაინც იმედოვნად უყუროს მომავალს.】

【ოტიასა და ეკვირინეს, განსაკუთრებით კი ეკვირინეს, ვერ აუტანიათ, რომ მეზობლად მცხოვრებმა, თითქმის მათსავით გალატაკებულმა აზნაურმა ქველიძემ სიძედ დაიწუნა ოტია ქამუშაძე, უარი თქვა მიეთხოვებინა მისთვის თავისი უფროსი ქალიშვილი ნინო.

ეკვირინეს აზრით. ეს ყოვლად მოუთმენელი შეურაცხყოფა და დაუმსახურებელი დაწიხლვა იყო ქამუშაძეების ოჯახისა. ამიტომ ეკვირინეს ჩვეულებად გადაექცა სარდიონ ქველიძის ოჯახის მუდმივი გაკილვა და კიცხვა-გინება.】 ამავე დროს მის ერთადერთ ოცნებად იქცა ოტიასათვის ნინოზე უკეთესი საცოლის გამოძებნა. ურომლის მეოხებითაც აღდგენილი იქნებოდა ქამუშაძეების შელახული თავმოყვარეობა.

【მასპინძლების ამგვარ განწყობილებას მოხერხებულად აუღო ალღო ქამუშაძეებთან სტუმრად მოსულმა, გაქწილმა და ვაიძვერა პორფირ ბიაშვილმა.】 ეს უკანასკნელი ქალაქად გახიზნული აზნაური იყო. ჯერ კიდევ მისი მამა — ლტაკი აზნაური გამოქცევა სოფელს და თავი შეუფარებია ქალაქისათვის, სადაც ეპისკოპოსთან მოწყობილა მგალობლად და ამ ხელობით ურჩენია ოჯახი, დაუზრდია შვილები.

პორფირს ცხოვრების სხვა გზა აურჩევია. იგი ერთხანს მთავრობის ბიუროკრატიულ აპარატში შემძვრალა, რათა სხვადასხვა ხრიკებისა და კომბინაციების საშუალებით იოლად მოეპოვებინა „კეთილი ცხოვრება“. ხოლო როცა მისი ამგვარი საქმიანობა გამომყდუნებულა, პორფირი გასცლია კანცელარიას, საკუთარი კანტორა გაუხსნია საჩივრებისა და სხვა საქმიანი ქაღალდების შედგენა-დაწერისათვის და თანაც სოფლებში ვეჭილობა დაუწყია. დადის პორფირი სოფლიდან სოფელში და, როდესაც ერთ სოფელში ამოწურავს გამოსარჩენს, ან რაიმე შემთხვევის გამო სახელს გაიტეხს, შორე სოფელს არჩევს „მოსაპმელად“ და იქ გადაინაცვლებს.

პორფირის სახით. მისი თავგადასავლის თხრობით მწე-

რალმა გაგვაცნო ტიპიური გზა ქალაქად გაბიზნული გადატაკებული აზნაურობის ცხოვრებისა. გვიჩვენა, რომ სოფლად პარაზიტულ ცხოვრებას შეჩვეული ადამიანები ქალაქშიც მოკლებული არიან რაიმე დადებითი და სასარგებლო შრომის უნარს.

აი, ამ პორტირს ახლა თამარნაშენი, ქამუშაძეების საცხოვრებელი სოფელი აურჩევია თავის მორიგ სამოღვაწეო ასპარეზად, გაუხსენებია რაღაც შორეული ნათესაობა ქამუშაძეებთან და კარზე მიდგომია მათ.

ქამუშაძეების მალლობზე წამომდგარი სახლის აივნიდან გადასცქერის პორტირი დატაკ სოფელს, ხედავს ისლით დახურულ ქოხებს აქ მცხოვრები გლეხებისა და ფიქრობს.

— მეც ამათსავით ვიქნებოდი უსათუოდ, დროზე რომ არ გავქცეულიყავი სოფლიდან, რასაკვირველია, რასაკვირველია!“ იგი ზომავს აქაურობას იმ თვალსაზრისით, თუ რამდენი გამოსარჩეხის შოვნა შეიძლება, რამდენი მოსატყუებელი და „გასაფცქველი“ კაცი შეიძლება აღმოჩნდეს ამ პატარა საწყალ სოფელში.

ქამუშაძეებთან სადილობისას პორტირმა გაიგო ამ ოჯახის მთავარი სატყვივარი და აღუთქვა ეკვირინეს, რომ ოტიასათვის ისეთ ქალაქელ საცოლეს გამოიხატავს, რომლის ჩრდილდაც კი არ ეღირება სარდიონ ქველიძის ქალიშვილი.

ამ დაპირებით აღფრთოვანებული ოტია ეახლა პორტირს, რომელიც სოფლის „კანცელარიისაკენ“ მიეშურებოდა, რათა იქ შეკრებილ სოფლელებს გასცნობოდა, საქმე ეშოვნა, მორიგი მსხვერპლი ჩაეგდო ხელში.

აქ, სოფლის „კანცელარიის“ ეზოში თავმოყრილ გლეხებისა და აზნაურთა საუბრის აღწერისას, მწერალმა დახატა არა ერთი მეტად ტიპიური ეპიზოდი სოფლის დუხჭირი ყოფაცხოვრების, კერძოდ, აზნაურთა დაკნინებული მდგომარეობის დასახასიათებლად. აი, სოფელელთა ერთი ჯგუფი გაცხარებულ დავასა და ჩხუბშია გართული და თურქმე ისინი ეკალას გულისათვის ჩხუბობენ, რადგანაც აქ ეკალაც სანატრელი გამხდარა, ეკალასაც „ოქროს ფასი დასდებია“.

აი, დიდი ხის ჩრდილში დამსხდარა სოფლის „დიდკაცო-

ბა“ — ადგილობრივი აზნაურობა და უცხო სტუმრის, პორფირის გამოჩენის გამო გაცხოველებულ საუბარში ბევრ რამეს საყურადღებოს და დამახასიათებელს ამბობენ.

რად ღირს, მაგალითად, ერთი აქ მყოფი აზნაურის სერაფიონ გორდელაძის ნაამბობი თავისი ძაღლის კუსიას შესახებ.

„ — დილას, ბატონო, რომ ადგება, კაი დაკვირვებული ადამიანივით შემოირბენს სახლის ყოველ კუთხეს... ერთი წაქცეული სამზარეულო მაქვს, იქაც მისუნავს-მოსუნავს და თუ შეხედა, რომ სახლში არაფერი არ კეთდება, ერთი გავარდება ეზოდან, შემოირბენს მეზობლებს, სად კეციდან ჭადს აგლეჯს, გამოიტანს და მოარბენინებს, სად ქათამს ფრთას წაგლეჯს და მოაწანწალებს, სად კვერცხს გამონახავს, ხანდახან ჩადებულსაც არ დამიწუნებენო, გადასწყვეტს და აგერ რომ გვგონია, დღეს უსადილოთ ვრჩებით, გადაწყვეტილი გვაქვს, ეს ღვთისნიერი სულდგმული ხელად ამივსებს ცარიელ სუფრას ათასნაირი საკმელებით... თითქო მეზობლებისაგან საჩუქრები მომსვლოდეს“.

ერთი ახალგაზრდა აზნაური სერაფიონს აფრთხილებს, რომ ვინმე მოუკლავს მას ამ მტაცებელ ძაღლს. ამაზე სერაფიონი უპასუხებს:

„ — მამაჩემი აზნაური ქაიხოსრო გორდელაძე რომ გაცოცხლდეს და რაიმე რომ აწყეინოს ჩემს კუსიას, იმას ჩავაბრუნებ საფლავეში, თვარა სხვა რით გადამიჩიება, რომ ჩემს მაცხოვრებელს რამე მოსწიოს! ბატონო, სხვა არაფერი შემრჩენია... ძაღლით ვრჩები. იმ ზომამდის მივალწიე პატიოსანმა აზნაურმა და ცოცხალი გადამიჩიება, ვინც მას ხელს მიხლებს? თქვენც არ მომიკვდით“.

ცხადია, რომ სერაფიონის ამ ნაამბობში არის ხუმრობის ელემენტარი, ერთგვარი გადაჭარბებაც, მწერლის მიერ განზრახ გამძაფრებული ირონიაც. მაგრამ საერთოდ, მთელი ეს ამბავი იმ თანაც სასაცილო და თანაც სავალალო ყოფას გვისურათებს, რომელშიც მოაქცია კაპიტალისტური განვითარების ხანამ-თავადაზნაურული წოდება და რომლის ასახვასაც მოანდომა დავით კლდიაშვილმა თავისი იშვიათი მხატვრული ნიჭი და უნარი.

ქალაქს დაბრუნებული პორტირი შეუდგა ოტიასა და ეკვირინესთვის მიცემული დაპირების შესრულებას. ოტიას საცოლედ მან შეარჩია თავისი ახლო მეგობრის — ბეგლარ ჯინქარაძის და სონია, რომელიც დიდი ხანია გასათხოვარ ასაკში იყო შესული და ამიტომაც პორტირს უნდა გაადვილებოდა სონიას ძმისა და დედის დათანხმება მის გათხოვებაზე, მიუხედავად იმისა, რომ გაუთხოვარი მოწითული ქალის შინ ყოფნა ერთგვარად აფერხებდა ბეგლარის დაცოლშვილების საქმესაც.

ჯინქარაძეების ოჯახის აღწერით მწერალმა თვალწინ დაგვიყენა ქალაქს შეფარებული კიდევ ერთი აზნაურის ოჯახის ცხოვრების ისტორია, რომელიც ბევრად არაფრად განსხვავდებოდა პორტირ ბიაშვილის ოჯახის თავგადასავლისაგან. და, მაშასადამე, ტიპიური, დამახასიათებელი იყო სოფლური ცხოვრების მიერ ქალაქს გადმოსროლილი მრავალი ასეთი ბიაშვილებისა და ჯინქარაძეებისათვის.

მართლაც ადვილად დაითანხმა პორტირმა ბეგლარი და მისი დედა პელაგია. დანიშნულ დროს ქალის სანახავად მოიყვანეს სოფლიდან ჩამოსული, საგანგებოდ მორთულ-მოკაზმული ოტია.

მრავალი კურიოზით, მრავალი სასაცილო წერილმანით არის აღსავესე ოტიასა და მისი საცოლის — სონიას პირველი შეხვედრის, მათი ურთიერთგაცნობის სცენა. სონია პირველად გაკვირდა და შეშფოთდა. შემდეგ დედამ და ძმამ გასტეხეს მისი წინააღმდეგობა და დაითანხმეს ცოლად გაჰყოლოდა ოტიას. საზღვარი არა აქვს ოტიას კმაყოფილებას. იგი ახლა მხოლოდ ერთ რამეს იზვეწება: „იყოს ისე, თქმულად, ცარიელ სიტყვად, რომ ვითომც ბეგლარს დისტვის ხუთასი მანეთი მიეცეს მზითვით... ცარიელი სიტყვა ქვეყნის გასაგონად, თორემ ფულის თხოვას როგორ გაუბედავ, ისიც კმარა ჩემს თავზე, ქვეყნის გასაგონად ითქვას ოღონდ!“

ამაზე ადვილად დაეთანხმენ ოტიას. საქმე მოგვარდა. მთელს სოფელს ელვის სისწრაფით მოედო ეს ამბავი. ეკვირინე ცას სწვდება სიხარულით. უმთავრესი მისთვის ის არის, რომ ქველიძეების სასაცილოდ არ გახდა ქამუშაძეების ოჯახი.

ხი. პირიქით, ახლა ეკვირანე დასცინის და აბიაბრუებს საკ-
დიონ ქველიძეს:

„გვერდში ამოუყენოს ჩემს რძალს მათი სოფლის ნაცარშ-
ამოქანქალი ქალბატონი!... თავისი ტყედ წასული შვილ-
გაუტოლოს ბეგლარ ჯინქარაძეს, მაგათმა სიცოცხლემ. დაეს-
ხათ მაგათ თავსლაფი!..“

ქორწილმა მხიარულად ჩაიარა. ქამუშაძეებმა თავი არ
დანოგეს, ხარჯს არ დაერიდნენ. ბეგლარიც კმაყოფილი დარ-
ჩა სიძის ოჯახით. თითქოს ბედნიერად დაიწყო ოტიასა და
სონიას ცხოვრება, მაგრამ ეს მხოლოდ ერასის შეხედვით.
მხოლოდ „სხვის დასანახად“.

ნამდვილად კი სოფლად დარჩენილი სონია თავიდანვე
ქორწილის მეორე დღიდანვე შიშმა აიტანა. მას ეუცხოვა ეს
საოცარი სიჩუმე, სიცარიელე და უძრობა, რომელიც ქალაქ-
ში აღზრდილ ქალს განსაკუთრებულად თვალში მოხვდა სოფ-
ლური ცხოვრების პირველ გაცნობისთანავე.

„— ღმერთო ჩემო, ამ მიყრუებულში უნდა დავლიო ჩემ-
სიცოცხლე? — გაიფიქრა მან და რაღაცამ თითქოს ყელში
წაუჭირაოქდა თანაც თვალეებში ჩამოებინდა. ესცადა თავს
შებრძოლებოდა, თავი შეემაგრებინა, მაგრამ ველარ მოახერ-
ხა და ცრემლები ნაკადულივით წამოსკდა თვალეებიდან“.

ასეთი შიშით და სასოწარკვეთილებით დაიწყო სონიამ
ახალი ცხოვრება სოფლად და რაც უფრო ახლოს ეცნობოდ-
იგი ქამუშაძეებს ოჯახს. მეზობლებს, მთელს სოფელს, მით
უფრო მწვალებოდა და მძაფრდებოდა ქალის ასეთი გან-
წყობილება.

ქალაქელი ქალის შეუჩვეველ თვალს სხვაგვარად, უფრო
მეტის სიციხადით ეჩვენება სოფლური ცხოვრების სიდუხჭი-
რის დამახასიათებელი ყოველი მოვლენა. რომელსაც ხანგრ-
ძლივად შეჩვილი ადგილობრივი მცხოვრებნი შეიძლება
ველარც კი გრძნობენ და ამჩნევენ.

თითქოს განზრახ შემოიყვანა მწერალმა ქალაქელი სონია
ამ გარემოებაში, თითქოს განზრახ გაატარა მან ამ უცხო
თვალის წინაშე სოფლური ყოფა-ცხოვრების ყოველდღი-
რობა, რათა ამ „გარედან მოსულს“ ადამიანის შთაბეჭდილე-

ბათა და განცდათა მეშვეობით უფრო მკვეთრად, უფრო მეტის შთაბეჭდილების მომხდენი სიცხოველით დაეხატა გალატაკებული აზნაურობის ყოფა, სადაც ყველაფერი უმწეოდ და უნუგეშოდ გამოიყურება, სადაც მხოლოდ სამუდამოდ დაკარგული წარსულის მოგონებით, ან კიდევ მომავლის სავესებით უნიადაგო იმედებით ცოცხლობენ.

აი, ეკვირინე ათვალეერებინებს და აცნობს სონიას ქამუშაძეების კარ-მიდამოს, ოჯახის ავლადიდებას: ქვევრები, ბოსტანი, ვენახი, სასიმიინდე — ყველაფერს სილატაკის და სიცარიელის ბეჭედი აზის. ყველაფერი თურმე შარშან იყო ბევრი და გაისადაც კიდევ მეტი და უკეთესი იქნება, იმედია!

„— იცოცხლე, შვილო, ამ ჭურებში შარშან ღვინოები ჩაიხახა. წრეულსაც, იმედია, ღმერთი კიდევ უკეთესს მოგცემს“. ბოსტანი მქონდა, შენ გენაცვალე, ისეთი ბოსტანი, რომ მარტო ერთი შეხედვით გული გაგეხსნებოდა. გაისადაც ძალიანი ბოსტანი გაკეთდება, შვილო, კიდევ უკეთესი, ცოცხალი ვიყვეთ და!... „ეს სასიმიინდეა, შვილო, ამ ცოტახნის შემდეგ თავამდის ავაკვებთ მაგას ვერცხლისფერი სასიმიინდით...“ „ეს ადგილიც. ამ ნაჭერს, რასაც ხედავ, შვილო, ესეც ჩვენი იყო, მარა ბიძამისმა ომანმა წაართვა. შენს ქმარს“.

და ასე გრძელდება ეს დაუსრულებელი „იყო“ და „იქნება“. ახლა კი სონია ხედავს ცარიელ სასიმიინდეს, ცარიელ ქვევრებს, გადამწვარ ბოსტანს და ვერ გაუგია, თუ რისი-იმედით ცოცხლობს ეს ხალხი, რას ემყარება მათი ამპარტავნობა და სიამაყე! 3

„— რისი იმედითაა? რა აქვთ კიდევ საიმედო? — ეკითხებოდა სონია თავის თავს გუნებაში და მთლად მისი ფიქრები ეხლა იქით მიიმართა — გაეგო, თავისი თვალით დაენახა ყოველივე...“

თა სონია ზოტრო და უოტრო ახლოს ეცნობა ყოველივეს: ესწრება მეზობლის ჯვრისწერას, მიდის ეკლესიაზე უქმედოის, სიარულოს იწყებს მეზობლობაში და სულ ზოტრო უნუგეშოდ და შემზარაჟი სურათები იშლიბა მის თვალწინ.

ღუმშიმისი შთაბეჭდილება მოახდინა სონიაზე ოკიას ბიძის ლევანისა და ბიცოლა ეფროსინეს ოჯახის ნახვამ. 34 სო-

ნია მოწმე გახდა აუწერელი სიღატაკისა და გაჭირვების. მასპინძელმა სახლშიც ვერ შეიყვანა სონია, კიდევ მეტი, ეზოში სონიას შესვლისთანავე ეფროსინემ სახლის კარები გამოხურა, რათა სტუმარს არ დაენახა ის ქუჩე, სიღარიბე და გაჭირვება, რაც მის სახლში სუფევდა.

თვით ლევან ქამუშაძე, მოხუცი აზნაური, რომელსაც წრეს გადასული სიღარიბისაგან „გული მოხარშვია“, ლაპარაკის უნარიც დაკარგვია, რაღაც უმოძრაო და უტყვე არსებად გადაქცეულა, გამოიყურება როგორც ერთგვარი სიმბოლური სახე, რომელშიც მთელი წოდების, მთელი კლასის განწირული მდგომარეობაა განსახიერებული.

ეს იყო „მაღალი ტანის, ცოტათი ბეჭებში მოხრილი მოაუცებელი. ახალუხზე ყვითელი თასმის ქამარი ერთყა და ზემოდან გაშლილი, რამდენსამე ადგილას დაკერებული ჩოხა ეცვა, ახალუხის შეხსნილ საყელოდან უჩანდა ქუჩისაგან ქალზე გაშავებული პერანგი“...

„მან შეშინებული კაცივით გადმოაბიჯა ზღურბლზე, გაუბედავად მივიდა წამომდგარ სტუმართან, უნახავ რძალთან და ხელი ჩამოართვა. მერე თვალებზე გადაისვა მარჯვენა ხელი, მიიხედ-მოიხედა და უცბად წამოიძახა, თითქო ახლა მოვიდა გონსაო: — „დაბრძანდით... დაბრძანდით, ბატონო! და ისევ მიჩუმდა“.

ღამ უბედური, გაჭირვებისაგან ცოცხალ ლეშად ქცეულა კაცის ნახვამ, ირგვლივ გამეფებულმა უკიდურესმა უმწეობამ. ბიცოლა ეფროსინეს ნაამბობმა ამ ოჯახის მწარე ხვედრის შესახებ — ყოველივე ამან გულის სიღრმემდე შესძრა სონია. რადგან ბიძია ლევანის ახლანდელ ყოფაში ქალმა თავისი ქმრის, თავისი ოჯახის მომავალი წარმოიდგინა. უ

„ — რა ვნახე, რას ვუყურე, შენ გენაცვალე, რა ამბავია! — იძახოდა გულდათუთქული სონია, — რა მდგომარეობაში ჩაუგდია გაჭირვებას საცოდავები! ვაი, ვაი გაჭირვებულ კაცის ბრალი, ღმერთო, რა მოგველის?“

როდესაც შინ დაბრუნებულმა სონიამ ეკვირინესაგან დაკეზობელი დედაკაცის, სალომესაგან მოისმინა ბიცოლა ეფროსინეს შესახებ გავრცელებული ჭორები. თითქოს იგი „კუ-

დიანი“ იყოს, თითქოს მას „ამოეკამოს გული“ ლევანისათვის და სხვა, სონიამ ნათლად დაინახა, თუ როგორი გონებრივი და ზნეობრივი დაკნინება ერთვის მის მიერ ნახულ ნივთიერ სილატაკეს, და ქალი სრულ სასოწარკვეთილებაში ჩავარდა..

„— ღმერთო, ღმერთო ჩემო! სად ჩამოვევარდი?.. სად ვარ?.. ღმერთო! — მოჩუღმა ცრემლებმა მეტი აღარ აცალეს“...

შემოდგომამ გამოაცოცხლა სოფელი და ოდნავ შეანელა თითქოს სონიას სასოწარკვეთილებაც, მაგრამ მხოლოდ წუთიერად, მხიარული შემოდგომა მალე შეცვალა ერთფეროვანმა და გაუხარებლმა ზამთრის დღეებმა.

ერთ-ერთ ასეთ ზამთრის საღამოს სონია მოწმე გახდა ისეთი სურათისა, რამაც კიდევ უფრო შეაშფოთა და შეზარა ქალი.

ოტიას ბიძას, ომანს, ვაჟი ჰყავდა ავად. ყნაწვილის მდგომარეობა უფრო და უფრო უარესდებოდა და ერთ დღეს აშკარა გახდა, რომ იგი სიცოცხლეს ეთხოვებოდა. ომანი თავის რძალს ეფროსინეს აბრალებდა კოწიას ამ დღეში ყოფას. თითქოს ეფროსინემ, „კუდიანმა“ და ჯადოქარმა ეფროსინემ დაასწეულა და სასიკვდილოდ გაწირა კოწია.

გამწარებელი ომანი კეტით მიუხტა ეფროსინეს. მთელი სოფელი შეიყარა ამ ჩხუბზე და აურზაურზე. ომანმა არ შეიბრალა თავისი უმწეო ძმა ლევანი, არ დაინდო თავისი რძალი ეფროსინე და კეტით სცემა მას. მეზობლებმა ძლივს იხსნეს დედაბერი სიკვდილისაგან. სწორედ ამ დროს გარდაიცვალა კოწიაც. ნაადრევად დაღუპული ყმაწვილის საცოდაობა ზედ დაერთო იმ საშინელებას, რაც სონიამ ლევანის ეზოში ნახა.

კიდევ უფრო მწვავედ იგრძნო სონიამ ის სიბნელე, უმეცრება, სიღუბე, რომელიც სუფევდა მის ირგვლივ. კიდევ უფრო შეაშინა ქალი ყოველივე ამან. „თავზარდაცემული, მიშმეპყრობილი სონია განძრევასაც ვეღარ ახერხებდა, გონება ეკარგებოდა, სიცივისაგან სხეული ულურჯდებოდა და გული უწყუნდა უნუგეშო მომავლის წარმოდგენით. ამგვარ ყოფაში მოუსვენრად იმეორებდა: „აბა რაღა ვქნა; რაღა

ექნა? რაღა ვქნათ, ღმერთო, ღმერთო! — მას სრულიად მოესპო განძრევის ღონე“.

გვაზაფხულზე, როცა მთელი სოფელი და სხვებთან ერთად ოტია ქამუშაძეც სახნავ-სათესად გავიდა ყანებში, სონიამ თავისი თვალთ ნახა და შეიგნო, რომ მისი მეუღლე, აზნაური, არსებითად არაფრით განსწავდებოდა ჩვეულებრივი მიწის მუშა გლეხებისაგან, რომ მისი ოჯახის ხვედრიც ის მუდმივი გაუხარელი ოფლის ღვრით მოპოვებული უმწეო ლუკმა უნდა ყოფილიყო, რომლითაც ეს ღარიბი სოფლის ხალხი ცხოვრობდა და სონიას გულში მძლავრად იჩინა თავი აქედან გაქცევის, სოფლიდან თავდაღწევის, ქალაქს გაბიზენის აზრმა.

კიდევ უფრო მეტად შეიპყრო შიშმა სონია, როდესაც მას ვაჟი გაუჩნდა. ქალს თვალწინ წარმოუდგა ის გაუხარელი. მუდმივ მძიმე შრომასა და სიღატაკეში გატარებული ცხოვრება, რომელიც წილად ხვდებოდა მის პირმშოს, მთუ ქამუშაძეების ოჯახი სოფლად დარჩებოდა, თუ იგი ქალაქს არ შეაფარებდა თავს და იქ არ გამონახავდა ადამიანური არსებობის სხვა რაიმე გზასა და საშუალებას.

ერთადერთი, რაც ამ მიყრუებულ და გულისმომკვლელ სოფლურ ცხოვრებაში ოდნავ მაინც ახარებდა და მწუხარებას უმსუბუქებდა სონიას, ეს იყო მეგობრობა სარდიონ ქველიძის ქალიშვილთან, ნინოსთან, სწორედ იმ ნინოსთან, რომელიც თავის დროზე ოტიას საცოლედ ჰყავდა შერჩეული ქამუშაძეების ოჯახს.

სონიას დიდად მოეწონა და გულწრფელად შეუყვარდა ეს ლამაზი, კეთილი და გულისხმიერი ახალგაზრდა ქალა. სონიას ოცნებად ექცა, რომ მის ძმას, ბეგლარს ცოლად შეერთო ნინო. მაგრამ სონიას ეს სურვილიც განუხორციელებელი აღმოჩნდა. ნინოსა და ბეგლარის სამწუხაროდ დაბოლოებული ურთიერთობაც ზედ დაერთო სონიას უბედურებას.

ბეგლარმა მოიწონა ნინო. დისშვილის ნათლობაზე შეჭიფებულმა ბეგლარმა საქვეყნოდ „დანიშნა“ ქველიძის ქალი. მაგრამ შემდეგ, გაქნილმა და გაიძვერა გაქალაქებულმა აზნაურმა შოინდომმა ბოროტად ესარგებლა ამ შემთხვევით და ასეთი დიდი მზითევი მოითხოვა, რომლის მიცემასაც ვერად-

რით ვერ შეიძლებდა ნივთიერად წელში გატეხილი სარდიონ ქველიძის ოჯახი.

არავითარმა ხვეწნა-მუდარამ არ გასჭრა ბეგლარზე. ნინო საქვეყნოდ შერცხვენილი და შეურაცხყოფილი დარჩა. სონია უსაიდვროდ წუხდა თავისი ძმის ამგვარი შეუფერებელი საქციელის გამო. მაგრამ ბეგლარი ყოველივე ამას არაფრად აგდებდა. ბეგლარს მხარს უჭერდა პორფირიც.

ერთხელ, როცა სოფლად ჩამოსულ პორფირს სონიამ შესჩივლა, რომ საბრალო ნინო შეიძლება შეიწიროს კიდეც ამ მწუხარებამ, რომელიც მას ბეგლარმა მიაყენაო, პორფირმა უდარდელი ხარხარით უპასუხა.

„პორფირი სიამოვნებით ხითხითებდა და ხარხარებდა... ამის პირით, თითქო თავმომწონე, უფრო ღონიერი ქალაქი დასცინოდა მისუსტებულ სოფელს. დასცინოდა, თავის გამარჯვებას აქადნიდა და ემუქრებოდა კიდეც მეტს დაჩაგვრას მასთან ბრძოლაში“.

„— ამათია ყორიფელი“, — გაუბრბინა თავში მტირალ სონიას.

„— ამათ უნდა გავსდიოთ, ჩემისთანებმა მაინც, თუ ქვეყანაზე სიცოცხლე გვინდა“. — თავისთავს ეუბნებოდა გულდაღონებული ოტია“.

ასე თანდათანობით იზრდებოდა და ღრმავდებოდა სონიასა და ოტიას შეგნებაში სოფლიდან გაქცევის, ქალაქს გადახიზვნის გადაწყვეტილება. ყველაფერი, ყოველი ახალი დღე-მათი ცხოვრების ყოველი ახალი მოვლენა უფრო და უფრო აუცილებელს ხდიდა, უფრო და უფრო განამტკიცებდა მათ ასეთს გადაწყვეტილებას.

წოდესაც სონიასა და ოტიას ვაჟი შეეძინათ, ეკვირინემ გადაწყვიტა ბავშვი შეიძლებული გლეხისათვის, სიმონ სამადაძისათვის მოენათვლინებინა. მართალია, ძნელი იყო ქამუშაძეებისათვის, ამგვარ „დათმობაზე“ წასვლა, გლეხთან თავის გატოლება, მაგრამ სამადაძესთან ამგვარი კავშირის დამყარებას გარკვეული აზრი ჰქონდა გაღარიბებული აზნაურის ოჯახისათვის.

ეს აზრი მთელი სიცხადით გამოთქვა პორფირმა, რომელ-

მაც, როგორც ქალაქელმა კაცმა, უფრო პრაქტიკულად შეხედა საკითხს. როდესაც მას ამ საკითხზე რჩევისათვის მიმართეს, პორფირმა ცინიკურად უპასუხა:

„— დიდის სიამოვნებით! — ნეტავი მეც მომნათლავდეს ის ოჯახდაქცეული, თუ კი მართლა მდიდარია: ცოტა რამეს მაინც გამორჩებოდა კაცი“.

ნათლობაზე გამართული ლხინის დროს მოხდა ისეთი რამ, რამაც კიდევ ერთხელ ნათელი გახადა აზნაურთა წოდების დაქვეითება და ყოველმხრივი დაუძლურება. ერთმა შეზარხოშებულმა აზნაურმა, ბესარიონ ქამუშაძემ „ყაზახობა“ დააყვედრა სამადაძეს და შეურაცხმყოფელად „წაკრა ბლიქვი“; სამადაძემ არ დაუთმო აზნაურს.

„— ყაზახი ვარ! — შეპყვირა მან წელში გამართულმა, — ყაზახი ვარ, მარა შენისთანა შემოდგომის აზნაუშვილს კიდევ ვჯობივარ!.. თუ ძალახედია მობრძანდი, ახლოს მობრძანდი, ისე დაგებუნო, რომ ღობემდისაც ვერ მიგყვეს შენი დამშეული სული. შენისთანა შემოდგომის აზნაუშვილების რა მცოდნია?“

სონიას თვალწინ დატრიალებულმა ამ ამბავმა ნათლად დაანახვა მას, თუ რამდენი სიმართლეა სამადაძის ამ სიტყვებში, რამდენად უძლური და უმწეოა ამ შეძლებულ გლეხთან შედარებით ეს „წარჩინებული“ აზნაურობა. სონიას შემზარავად ჩაწვდა გულის სიღრმეში ხამადაძის სიტყვები „შემოდგომის აზნაუშვილი“.

და მალე სონიამ თავისი თვალით ნახა, თუ რას ნიშნავს ეს „შემოდგომის აზნაუშვილი“. ზაფხულზე ქამუშაძეებს უკვე სიმინდი გამოელიათ და შიმშილით დაიხოცებოდნენ, რომ სამადაძეს არ მიეცა მათთვის ცოტაოდენი სიმინდი. ამით გამოიტანეს სიმინდი სამადაძისაგან, რათა მეზობლებს არ დაენახათ აზნაურის ამგვარი გაჭირვება. მთითქოს დროებით სული მოიბრუნა ქამუშაძეების ოჯახმა, მაგრამ ამ განწირულ ადამიანებს კვალდაკვალ სდევს ახალი მწუხარება და უბედურება. ისოფელს ბოქაული მოადგა. სახელმწიფო გადასახადის დავალიანებას ჰკრეფენ და ვინც დაუყოვნებლივ ფულს ვერ წარადგენს, მათ სასიმინდეებს და ბელლებს უბეჭდავენ. რაკი

ოტიას ფული არ აღმოაჩნდა, მისი ბეღელიც დალუქეს და, ამრიგად, ულუქმაპუროდ დატოვეს მთელი ოჯახი.

ამ ამბით თავზარდაცემული სონია პირველი შეხვედრის-თანავე შესძახის გულმოკლულ ოტიას: „— ოტია, ჩვენი აქ დარჩენა სიკვდილია, ოტია, სიკვდილია, ოტია!.. ჩვენ უნდა წავიდეთ, უნდა გავშორდეთ აქაურობას, ოტია, უთუოდ, უსათუოდ, ოტია!“

ასე თანდათანობით მწვავედება და ერთგვარ ტრადიკულ სიმძაფრეს აღწევს სონიას განცდა, მისი დარწმუნება სრულად აზნაურობის ხვედრის განწირულობაში, აქედან გაქცევის, თავდაღწევის აუცილებლობაში.

მწერალი კიდევ და კიდევ კუმშავს და ამუქებს საღებავებს. კიდევ ახალ გულისშომკვლელ სურათებს გადაშლის სონიას თვალწინ, კიდევ ახალ უბედურებას დაატრიალებს მის თავზე.

სონია მოწმე გახდა ლევან ქამუშაძის გარდაცვალებისა. აუწერელ გაჭირვებაში, სიღატაკესა და მწუხარებაში ამოხდა სული ამ უბედურ მოხუცს. თავზარდამცემად განიცადეს სონიამ და ოტიამ ლევანის სიკვდილი. ამ საბრალო მოხუცის გამწარებულ სულის ამოხდომაში მათ თავისი ოჯახის მომავალი ხვედრი წარმოიდგინეს.

„ოტია მწარე ცრემლით დასტიროდა ბიძას... ამ მიცვალებულში იგი რაღაც თავის მომავალს წედავდა“. ლევანის სიკვდილმა უკიდურეს საზღვრამდე მიიყვანა სონიას შემოფოთება, მისი შიში და სასოწარკვეთილება.

„— მშიერი... მშიერი მოკვდა... შიმშილმა მოჰკლა! — ეუბნებოდა თავის თავს გზაში მიმავალი სონია, — შიმშილმა მოჰკლა, უსადსრობამ. მშველელი კი არსაით, არსადაა! ყველა გაჭირვებულია, ყველა გაწვალებული... ყველა უბედურებაშია ჩავარდნილი... ოხ, ღმერთო, ყველა ამას უნდა მოველოდეთ, ყველას ეს დღე უნდა დაგვადგეს! არა, შვილებო, არა, გვრიტებო! არა, არა თქვენი ჭირიშეთ... არა, არა!..“

ასე საბოლოოდ შეიპყრო სონიას მთელი არსება ქალაქისაკენ გაქცევის აზრმა და ქალის ამგვარმა დაყინებამ, მისმა ამგვარმა მძლავრმა და მტკიცე გადაწყვეტილებამ სოფელზე გული ააყრევინა ოტიასაც.

„— არა, მეტი საშველი არაა... მეც უნდა ავიბარგო!... მეც უნდა შევიხიზნო იქ, სადაც ყოველი კაცი საშველს პოულობს, სადაც იმოდენი საშოვარი და საშუალებაა... მეტი გზა აღარ არის!“

უფრო ამ დღილი როდი იყო ოტიასათვის, შერიგებოდა—ამ აზრს, დადგომოდა ამ უკანასკნელ გზას, მოშორებოდა თავის მშობლიურ კუთხეს, მამაპაპეულ სახლ-კარს, სიყრმით შეზღწილ კარ-მიდამოს.

მწერალი გულის სიღრმეში ჩამწვდომი ძალით აგვიწერს ოტიას მწუხარებას, მის სევდას, როდესაც სოფლიდან გახიზვნის გადაწყვეტილების მიღების შემდეგ, ბნელ ღამეში უკანასკნელად დაიარება თავის ეზოში და ათვლიერებს თავის კარ-მიდამოს.

„რაც უცნაური სევდით შეჰყურებდა ამ ღამეში ყოველ საგანს, რაც წინ შეხვდებოდა, რაც სრეყვარულით აჩერდებოდა სათითაოდ ყოველისფერს, რასაც მისი საკუთრება შეადგენდა, აქაურს ქონებას. მისი გული საკვირველად დულდა, კმინავდა“

ამ ღამეში, ამ ბნელაში გაჭირვებული ოტია ემშვიდობებოდა აქაურობას, ესალმებოდა ამ მიდამოს, რომელიც დევნიდა და იძულებულს ხდიდა თავისი კეთილდღეობა სხვაგან ეძებნა“.

ასე უღმობლად უნგრევს მამა-პაპეულ „ბუდეებს“, ასე სდევნის მშობლიური კუთხიდან და უკანმოუბრუნებლად მიერეკება სადღაც, გაურკვეველი გზით აზნაურული წოდების ამ უკანასკნელ მოდგმას ახალი დროება, სოფლად დატრიალებული ახალი ცხოვრება.

მარტო ნივთიერი გაღატაკება როდი მოასწავებს ამ კლასის დაკნინებას. ქონებრივ სიღარიბეს თან მოჰყოლია ზნებრივი და გონებრივი დაცემა, გაბოროტება, გაცოფება. მწერალმა კიდევ ერთხელ ხაზი ვაუსვა ამ გარემოებას „ქამუშაძის გაჭირვების“ უკანასკნელ თავში.

უკანასკნელი და მართლაც გადამწყვეტი დარტყმა, რომელიც სოფელმა აგემა ქამუშაძეების ოჯახს, ეს იყო მარუშა-

ძის სიდედრის მიერ სონიასათვის მიყენებული ყოვლად დაუმსახურებელი და აუტანელი შეურაცხყოფაჲ

ამ გესლიანმა დედაკაცმა, მანანამ, ეკვირინესთან წალაპარაკებისას ტალახში ამოსეარა სონიას ღირსება და პატიოსნება, ცილი დასწამა მას უკიდურეს გარყვნილებასა და ზნედაცემულობაში.

ეს ერთგვარი დაგვირგვინება იყო ყველა იმ ტანჯვისა და მწუხარების, რაც ამ მოკლე ხნის განმავლობაში სონიას განადიდებინა სოფლურმა ცხოვრებამ, ამიტომ იმოქმედა ასე შემზარავად სონიაზე მანანას ბოროტმა ცილისწამებამ.

„სონია კი გულწასული ოთახში ეგდო ტახტზე, უგრძობლად. ეგ მეტად შეუბრალებლობა იყო, ეს ადამიანის გამეტება, მიწაში ჩამარხვა იყო, რაც მან თავის თავზე გაიგონა“. ამის შემდეგ სონიას ერთი წუთითაც აღარ დაედგომება სოფლად. იგი ევედრება ოტიას: „შემიბრალე, შე კაცო! მოვშორდეთ აქაურობას, მოვშორდეთ!.. დროზე!.. თუ მეტი გინდა კიდევ!..“

წმით დასრულდა ქამუშაძეების ოჯახის ბრძოლა სოფლურ ცხოვრებასთან. ოტია გაჰყვა სონიას მიერ აჩემებულ გზას. გაჰყვა იძულებით, დიდი გულხსტივილით, თავგანწირულებით: „ეგებ იქ მაინც ეშველოს კაცს! ბევრი იქით იწევა... ქე შოულობენ რაღაცას, თავს ირჩენენ... იქ მაინც ვცდი თავს. ჭრუ დავიღუპები, სულ ერთია, აქაც ხომ მეტი ხეირი არ მომელის. ეს გადაწყვეტილია, დედა, გადაწყვეტილი“, — ეუბნება ოტია ეკვირინეს.

ქამუშაძეების ოჯახის ქალაქს გადასახლებით მთავრდება ეს ნაწარმოები. ჩვენთვის გაურკვეველი რჩება ოტიას ბედი ქალაქში. არ ვიცით, რა მოუვიდა მას, როგორ შეეწყო და შეეგუა იგი ახალ გარემოცვას, მხოლოდ რამდენიმე სტრიქონით გვამცნობს ავტორი, რომ ოტია დასახლდა ქალაქის განაპირას, რომ იგი დიდ იმედებს ამყარებდა ბეგლარსა და პორფირზე, ხოლო ეს უკანასკნელნი ან დუმილით პასუხობდნენ ოტიას, ან კიდევ ამხნეუბდნენ მას, მაგრამ მხოლოდ სიტყვიერად, ცარიელი სიტყვით.

მწერალი არ გაჰყოლია თავის გმირს ქალაქში, არ აუსახავს ოტია ქამუშაძის ცხოვრების ეს ახალი ხანა. ეს ბუნებრივიცაა.

დავით კლდიაშვილის შემოქმედების საგანს არ წარმოადგენდა ქალაქური ცხოვრების ასახვა. მისი ისტორიული როლი ქართულ ლიტერატურაში განისაზღვრებოდა აზნაურული წოდების უკიდურესი დაცემა-დაკნინების პროცესის მხატვრული განსახიერებით და ამ მხრივ „ქამუშაძის გაჭირვება“ ჩვენი კლასიკური მწერლობის ერთ-ერთ საუკეთესო ქმნილებად უნდა ჩაითვალოს.

მოთხრობის დასასრულს მწერალი გვიამბობს, რომ ქამუშაძეების გაპარტახებულ კარმიდამოზე, ოტიასა და ლევანის ნასახლარებზე ახალი მოსახლენი გაჩნდნენ, ახლად გაყოფილმა გლეხებმა დაიკავეს ეს ადგილები და იქ თავისებური მოსახლეობა და ცხოვრება გააჩაღეს.

მოთხრობის ამ დასკვნით სტრიქონებში მთელი ნაწარმოების ერთგვარი ჯამია მოცემული, აქ ეპოქის ერთი ძირითადი სოციალური პროცესია განზოგადებული, მთელი კლასის თავგადასავალია გამოხატული.]



გარდა მოთხრობებისა დავით კლდიაშვილის ლიტერატურულ მემკვიდრეობაში შედის სამი პიესა, რომლებიც ქართული კლასიკური დრამატიული მწერლობის შესანიშნავ ნიმუშებს წარმოადგენენ. ეს პიესები, როგორც მსოფლმხედველობრივი და თემატიკური თვალსაზრისით, ისე მხატვრული სტილის მხრივ განუყოფლად დაკავშირებულია დავით კლდიაშვილის ბელეტრისტულ შემოქმედებასთან. მათში ისევე, როგორც თავის საუკეთესო მოთხრობებში, მწერალმა ღრმად სიმართლით დახატა იმდროინდელი სოფლის, კერძოდ, აზნაურული ყოფა-ცხოვრების მეტყველი სურათები და შექმნა მთელი რიგი ტიპური სახეებისა, რომელთაც დიდი განზოგადებითი მნიშვნელობა აქვთ ეპოქის სოციალური ვითარების, გარკვეული სოციალური პროცესების ასახვის თვალსაზრისით.

თავის დრამატიულ თხზულებებში დავით კლდიაშვილი ყოფითი მასალის იშვიათ მხატვრად გვევლინება. აქაც მის მიერ დახატული ყოველი ყოფითი სურათი ტიპურ სიმალღემდეა აყვანილი და ღრმა მამხილებელი ძალით აშუქებს მწერლის

თანამედროვე ცხოვრების სოციალურ შინაარსს; თავისი დრო-
ის საზოგადოებრივი ცხოვრების ამა თუ იმ მხარეს.

დავით კლდიაშვილის პიესები არ ემყარება გარეგნულად
ეფექტურ სიუჟეტებს. სიმძიმის ცენტრი აქ გადატანილია ალ-
მინათა ხასიათების ცოცხალ და კოლორიტულ გადმოცემაზე.
ყოფა-ცხოვრებითი სურათის ცხოველმყოფელობაზე. ღრპა
აზრით გამსჭვალულ დიალოგზე.

ამ პიესების სიტყვიერი მასალა იმგვარად არის დამუშავე-
ბული, რომ მოქმედ პირთა ყოველი ახალი ფრაზა უფრო და
უფრო მეტის სიცხადით თვალწინ გადაგვიშლის მოცემული
ტიპის სულიერ სამყაროს, მეტის სისრულით და სიღრმით გად-
მოგვცემს პიესის საფუძვლად აღებული სიტუაციის აზრს.
დიალოგს, გმირთა მეტყველებას, სიტყვის ხელოვნებას ცენტ-
რალური ადგილი უჭირავს დავით კლდიაშვილის დრამატურ-
გიაში.

პიესა „ირინეს ბედნიერება“ იმერეთის აზნაურობის ყოფა-
ცხოვრების ფონზეა აგებული. მასში, როგორც დავით კლდია-
შვილის მთელ შემოქმედებაში, მხილებულია გვაროვნულ-
წოდებრივი ტრადიციის მთელი დრომოკმულობა და კონსერ-
ვატიულობა, ნაჩვენებია, თუ როგორ ამახინჯებს ეს ტრადი-
ცია ადამიანთა ოჯახურ ურთიერთობას, რამდენ მწუხარებასა
და უბედურებას ბადებს იგი, რამდენად საბედისწეროა და
დამღუპველი მისი ზეგავლენა.

პიესა იწყება აზნაურული ყოფისათვის დამახასიათებელი
ტიპიური სურათით. ხელმოკლე აზნაურის — ფილიპე ბარბა-
ქაძის ეზოში სუფრაა გაშლილი. უსაქმური, გართობა-მოლხე-
ნის მაძებარი ახალგაზრდობა რაღაც დღეობის საბაბით შეკრე-
ბილა ბარბაქაძისას. მოისმის სიმღერის, დაირისა, სალამური-
წა და დუდუკის ხმები. ცეკვა-თამაშია გახურებული, სავსე
ჟანწი გადადის ხელიდან ხელში. გულუხვი მასპინძელი — ფი-
ლიპე თავს არ იზოგავს, თუმცა მისი კარ-მიდამოს მთელი
სურათი აშკარად მოწმობს, რომ ამგვარი ხელგაშლილი ცხოვ-
რება არაფრით შეესაბამება მისი ოჯახის ნივთიერ ძალ-ლო-
ნეს. მაგრამ ასეთია ტრადიციის კარნახი და ამას ვერსად წაუვა
აზნაური ფილიპე ბარბაქაძე.

სტუმართა შორის განსაკუთრებით გამოირჩევა შეძლებული მემამულის ვაჟი — აბესალო სალამთაძე. იგი თავისი შეძლებულებითა და გვაროვნული წარჩინებით განებივრებული ახალგაზრდაა, მუდმივ მოღვნა-სიამოვნებას გადაყოლილი; რომელსაც ცხოვრებაში არაფერი აინტერესებს, გარდა პირადი კმაყოფილებისა, თავისი უნის მოკვლისა, თავისი გაზვიადებული თავმოყვარეობის დაკმაყოფილებისა.

აბესალოს მოეწონა ფილიპეს ქალიშვილი ირინე, ლამაზი, მოკრძალებული, გულწრფელი და პატიოსანი ქალი. სალამთაძემ ერთბაშად გადაწყვიტა, რომ ირინე მას უნდა ეკუთვნოდეს. მან ანგარიში არ გაუწია იმას, რომ ირინეს გული სხვისკენ მიუწევდა, მას უკვე ჰყავდა არჩეული საქმრო, არავითარი დაბრკოლება არ შეიძლება არსებობდეს შეძლებული მემამულის — სალამთაძის ნება-სურვილის შესრულების გზაზე! როდესაც აბესალოს თავისივე ახლო მეგობარი ვიქტორი ურჩევს, რომ თავი დაანებოს ამგვარ ახირებას, რადგან ქალს უკვე ჰყავს საქმრო, რომ ირინეს როდამაშვილი უყვარს, აბესალო აგდებით და უდარდელად უპასუხებს: „ხა, ხა, ხა, ხა, ხა! ძალიანია, შენ ნუ მომიკვდები, ძალიანია! ვილაც ჩანჩურა როდამაშვილის გულისთვის ყოველივე სიამოვნება უნდა მოვიკლო! აბა კაცო ის ყოფილა, ჩვენ — არაფერი!“

აბესალოსათვის წუთიერი სიამოვნებისა და ყალბად გავებული თავმოყვარეობის საკითხად ქცეულა ოჯახისა და სიყვარულის საკითხი. ვერც მეგობრის რჩევა-შეგონებამ, ვერც ირინეს კატეგორიულმა უარმა ვერ შეარყია აბესალოს გადაწყვეტილება. ირინეც და როდამაშვილიც უძლურნი აღმოჩნდნენ წინააღმდეგობა გაეწიათ ამ მდგომარეობით გათავხედებული აზნაურის ჭირვეულობისათვის. გადამწყვეტი აღმოჩნდა ფილიპეს აზრი. ფილიპემ აბესალოს დაუჭირა მხარი. ხელმოკლე აზნაური საკითხს მხოლოდ იმის მიხედვით წყვეტს, თუ ვინ უფრო შეძლებული და წარჩინებული გვარის შვილია, მან ვერც კი წარმოუდგენია რაიმე სხვა საზომის არსებობა ასეთ შემთხვევაში. როდესაც იგივე ვიქტორი ფილიპეს ურჩევს, რომ უარი უთხრას სალამთაძეს, რადგან ირინე არ შეიძლე-

ბა ბედნიერი იყოს აბესალოსთან, ფილიპე განცვიფრებულია ამგვარი რჩევით:

ფილიპე — აბესალო უარით გავისტუმრო და როდამაშვილს ქალი მივცე?

ვიქტორი — დიახ... თუ თქვენი შვილის ბედნიერება გსურთ, ასე უნდა ქნათ.

ფილიპე — უკაცრავად ვარ.. სწორედ უკაცრავად. და თქვენს რჩევას მე ვერაფრის გზით ვერ მივიღებ. აჰ. სალამთაძეს უარი ვსტკიცო ვილაც როდამაშვილის გულისათვის... კაი ამბავი თუ გინდათ, ეგ იქნება... არა. ჩემო ბიძია... ღმერთს მაგდენად ჩემთვის კიდევ ჭკუა არ წაურთმევია, რომ საქმეს და მდგომარეობას ვერ მივხვდეთ... ვილაცა ბარბაქაძეს სალამთაძე ხელს გიწვდიდეს. შენთან დამოყვრებას ნატურლობდეს და უარს ეუბნებოდეთ!? სულელად არ მიგიღებენ კაცს? "

ასეთია ფილიპეს თვალსაზრისი. მისთვის გაუგებარი და მიუწვდომელია ირინეს ხვეწნა-მუდარა, ირინეს სიტყვები იმის შესახებ, რომ მას სხვა უყვარს. როგორ შეიძლება ახალგაზრდა ქალს გათხოვებამდე უყვარდეს ვინმე! რა მნიშვნელობა აქვს ან იმ გარემოებას, რომ ირინეს არ უყვარს აბესალო: — „არ მიყვარსო? არ გიყვარს, მერე შეგიყვარდება! — მანამდე რომელი თავმოყვარე ქალიშვილი დაიწყებს შენსავით ასე მოურიდებლად სიყვარულზე ტარტალს!“ — წყრომით ეუბნება ფილიპე თავის გაურჩებულ ქალიშვილს.

ფილიპეს ამგვარმა ტრადიციულმა რწმენამ თავისი გაიტანა. ტრადიციამ ჩაჰკლა ახალგაზრდა ქალის ცოცხალი, ადამიანური მისწრაფება. აბესალომ ერთბაშად გაიმარჯვა როდამაშვილზე. ირინე ცოლად მისცეს სალამთაძეს, მაგრამ ზა... გამოვიდა ამგვარი ნაძალადევი ცოლქმრობისაგან? რა ბედნიერება მოუტანა ამან ირინეს?

ირინე დაემორჩილა თავის ხვედრს და სალამთაძის ერთგული ცოლი გახდა, ბეჯითი მეოჯახე, მზრუნველი დიასახლისი. მაგრამ აბესალო თავისი ბუნებით ვერ შეეგუებოდა წყნარსა და დამშვიდებულ ოჯახურ ცხოვრებას. როგორც კი თავისი გაიტანა, ირინეს დაეპატრონა, ეინი მოიკლა, მან მალე გული

აიყარა ირინეზე, დაჰქარგა ცოლისადმი სიყვარული და პატივისცემა, შეიძულა იგი და ეჭვი შეიტანა ირინეს პატიოსნებაში, ცილი დასწამა მას, თითქოს ირინე როდამაშვილთან ლალატობდეს ქმარს, არცხვენდეს და შეურაცხყოფდეს ოჯახს.

რამდენადაც შეუძლებელი იყო ერთ დროს აბესალოს დარწმუნება იმაში, რომ ხელი აეღო ირინეზე, არ გადალობებოდა ირინესა და როდამაშვილის ბედნიერებას, აელაგმა თავისი წუთიერი ვნებათა ღელვა, იმდენადვე შეუძლებელი აღმოჩნდა ახლა მისი დარწმუნება ირინეს პატიოსნებაში, თავისი ახირებული ეჭვების უსაფუძვლობაში.

ასეთია თავგასული, ფუქსაგატი, გონებაშეზღუდული ახალგაზრდა აზნაურის ბუნება. აბესალო უხეშად ეპყრობა ირინეს, სასტიკად შეურაცხყოფს მას და იმასაც არ დაერიდება, რომ ახლობელთა და გარეშეთა თანდასწრებით ტლანქად შელახოს ირინეს თავმოყვარეობა, სასიკვდილოდაც არ დაინდოს იგი, მოსაკლავად მიიწიოს მასზე.

პიესის ფინალურ სურათში ირინე შესტირის მამას: „აი, ჩვენი ბედნიერება, მამა!.. ხომ ხედავ?.. ხომ ბედნიერი ვარ?.. ხომ ბედნიერი ვარ, ჩემო მამა, კა?“

როგორც ვხედავთ, სადაა და მარტივი „ირინეს ბედნიერების“ სიუჟეტი. მაგრამ როგორი გულის სიღრმემდე ჩამწვდომი სიმართლით არის მოცემული მასში ტანჯვა და მწუხარება ახალგაზრდა ქალისა, რომელიც დრომოჭმულ ტრადიციის მსხვერპლი გამხდარა, რომელიც ამ ტრადიციის მეოხებით მოკლებული ყოფილა ადამიანური ცხოვრების უფლებას, სიყვარულის უფლებას, ბედნიერი ცოლქმრული ურთიერთობის უფლებას.

დავით კლდიაშვილის დრამატურგიული შემოქმედების ნამდვილ მწვენებას კომედია „დარისპანის გასაჭირი“ წარმოადგენს...

ამ კომედიაში მწერალმა კიდევ ერთხელ მთელი სიცხადით დაგვანახა აზნაურული წოდების დაკნინება და დაქვეითება, მისი ქონებრივი გადატაკება და გონებრივ-ზნეობრივი დაწვრილმანება.

საქმე იქამდე მისულა, რომ ამ „ბრწყინვალე“ წოდების

ოჯახებისათვის თავსატეხ და საბედისწერო საქმედ ქცეულა ქალიშვილის გათხოვება. ქალ-ვაჟთა შორის სიყვარულისა და ბუნებრივი ურთიერთ მისწრაფების გრძნობის ნაცვლად გაბატონებული მდგომარეობა მზითევს დაუკავებია. მზითვისაგან არის დამოკიდებული გასათხოვარი ქალის ბედი; ცოლქმრული ურთიერთობა ვაჭრობისა და მორიგების საქმედ ქცეულა. და რაკი გაღატაკებულ აზნაურს საშუალება არ გააჩნია ქალიშვილისათვის მზითევის მიცემისა, ამიტომ უკიდურესად გაძნელებულა ქალიშვილების გათხოვება, ხოლო შინ დარჩენილ და გაუთხოვრად დაბერებულ ქალის რჩენა-შენახვა კიდევ უფრო მძიმე ტვირთად დასწოლია ამ ოჯახებს.

ამგვარი გარემოებით გამწარებულ ადამიანთა სასაცილო და საბრალო ყოფის დამახასიათებელ სურათს ხატავს ავტორი „დარისპანის გასაჭირში“.

მართა ქვითირიძე სტუმრად მოელის თავის შორეულ ნათესავს, ცოლსათხოვ ვაჟს ოსიკო ხარებაძეს და გადაუწყვეტია, როგორმე მოაწონოს და ცოლად შერთოს მას თავისი ნათლული, გაუთხოვრად დარჩენილი ქალიშვილი ნატალია საბელაშვილი.

ნატალიას დედა, პელაგია, უკიდურესად გამწარებული იმით, რომ სამი გაუთხოვარი ქალი უზის შინ, ხვეწნა-მუდარით მიმართავს მართას.

„პელაგია — მიშველე, ჩემო ბატონო, ჩემო მწყალობელო!.. იცხონე სული! მოისხი ჩემი შვილების მადლი... ერთი, ერთი ვინმე... რას დავეძებ ვინ იქნება, სახლში სიძეთ შემომაყვანიე და გაჭირვებისაგან მიხსენი... ერთი ვინმე პირველი მაშოვნინე და მერე მე ვაცო... საშველს არ ვადირსებ, სანამ თითო სიძე თითო ცოლის დას არ გამათხოვებინებს... შენ არ მომიკვდე!..“

პელაგიას ამ სიტყვებში უკვე მთელის ძალით გამოთქმულია ის მწუხარება, ის თავისებური გასაჭირი, რომელიც თავს დასტეხია ამ კომედიის გმირებს — გაღატაკებულ აზნაურობას. მარტო პელაგია როდია ამ დღეში. აი, სწორედ იმ დროს. როცა მართას ოჯახში გაცხოველებული სამზადისია იმისათვის, რომ ოსიკო და ნატალია ერთმანეთს შეახვედრონ, მართას

კარს მიადგება აზნაური დარისპან ქარსაძე, თავის ქალიშვილ-
კაროენასთან ერთად.

დარისპანსაც იგივე გასაქირი აწუხებს, რაც პელაგიას.
მართასთან საუბარში იგი ამგვარად უჩივის თავის ბედს:

„მართა — ჩემი რძალი ხომ კარგადაა?

დარისპანი — მადლობელი ვარ... ვართ ისე, მართა ჩემო,
როგორც მოგეხსენებათ ჩვენისთანების ამბავი... შენ
რალა დაგიმალო, მართა ჩემო, ჩემი სისხლ-ხორცი ხარ —
აგერა წელში გავწყდებით, მართა ჩემო... ნამეტანი გა-
ქირვებაში ვიძყოფებით, მარა ამ ქალიშვილებისაგან
უფრო გვემატება გასაქირი, შენ გენაცვალე... ოჯახს
ვერ ნახავ, რომ სამი და ოთხი ქალიშვილი არ ყავდეს
ვასათხოვარი და მთხოვნელი კი არსადაა, შენი ქირი
შემეყაროს!.. არსად არის რალაც უბედურებამ გული
შეუცვალა ახლანდელ ყმაწვილებს, აღარ ეკიდებიან
ოჯახობას... ე გოგოები კი გვიყრიან სახლში და გვი-
ბერდებიან საცოდავად სახლში...“

მხოლოდ თავის „სისხლ-ხორცს“ — მართას უმხელს და-
რისპანი ასე გულანდილად თავის გასაქირს. მაგრამ საკმარისია
გამოჩნდეს ვინმე გარეშე და უცხო, რომ დარისპანში ერთბა-
შად გაიღვიძოს „კუდაბზიკა“ აზნაურმა, რომ იგი ერთბაშად
მოჰყვეს გაუთავებელ ტრაბახს თავისი ვითომცდა შეძლებუ-
ლი, ყოველი სიკეთით აღესილი ოჯახის კმაყოფილი და უზ-
რუნველი ცხოვრების შესახებ.

აზნაურული სულისკვეთებისათვის დამახასიათებელი ასე-
თი სიყალბე, ასეთი წინააღმდეგობა ამ ადამიანთა ნამდვილ
მდგომარეობასა და გვაროვნულ ტრადიციით ნაკარნახევ ყოვ-
ლად უსაფუძვლო ამპარტავნობას შორის მკაფიოდ არის გად-
მოცემული დარისპანისა და პელაგიას დიალოგში. დარისპანი
უზომოდ ტრაბახობს, აქებს თავის ოჯახს, სახლ-კარსა და
განსაკუთრებით თავის ქალიშვილებს.

„დარისპანი — ისე არიან გადამკვდარი საქმიანობაზე, რომ
გარეშე მოსამსახურე, არც ბიჭი და არც გოგო ახლოს არ
გეიკარეს, სახლში არ შემომაყვანიეს... თავის ხელით
უნდათ აკეთონ ყველაფერი... ღვთის წყალობაა ქალი-

შვილი ოჯახში!.. თქვენ რამდენი გყავთ, ბატონო პე-
ლაგია, ქალიშვილი?

პე ლ ა გ ი ა — სამი, ბატონო, თქვენ?

დ ა რ ი ს პ ა ნ ი — მე... ამიანათ ოთხი! დიახ, ოთხი! მარა გა-
თხოვება მეძნელება.

პე ლ ა გ ი ა — ჭირს, ბატონო, ერთობ ჭირს.

დ ა რ ი ს პ ა ნ ი — არა... მენანება მოშორება!.. კაი ოჯახში
ნამყოფი, კარგი შენახულა... თუ ისევ ხეირიან ოჯახში
არ ჩააგდე, ცოდვია... ამიტომ უფრო არ ვეჩქარი მაგათ
გათხოვებას... თვარა მთხოვნელი ბევრი დამიდიან!..

პე ლ ა გ ი ა — ვისაც შეუძლია ქალიშვილის შენახვა, რა შე-
აწუხებს...

დ ა რ ი ს პ ა ნ ი — ვწუხვარ კი არა... ჰმ, ჩემისთანა მოლბენი-
ლი კაცი არ მეგულება! არაფერი არ მაწუხებს! მივდი-
მოვდივარ ამ ჩემს ნათესავეებში, კეთილებში, ნაცნობებ-
ში... ყველგან კარი ღია მხვდება. ყველგან მიუხარიათ
ჩემი ნახვა...

პე ლ ა გ ი ა — ღმერთმა კეთილად გარონიოთ, ჩემო ბატონო!
(ამოიხვნეშებს) ღმერთმა სიკეთე გმატოსთ! მოგახსენე-
ბენ, ბედნიერი ადამიანის დანახვით გაჭირვებულს გუ-
ლი გვეხსნებაო“.

ამ დიალოგის ცხოველყოფელი ძალა სწორედ იმაში
მდგომარეობს, რომ ჩვენთვის. საესებით ნათელია დარისპანის
შიერ აქ წარმოთქმული ყოველი სიტყვის სიყალბე. უკვე კარ-
გად ვიცით, თუ რამდენად მოლბენილი და კმაყოფილი ცხოვ-
რება აქვს აზნაურ ქარსაძეს, ვიცით, თუ როგორ ენანება მას
თავისი ოთხი ქალიშვილის გათხოვება, თუ რამდენი მთხოვნე-
ლი ამ ქალიშვილებისა დაუდის მას. ისიც კარგად ვიცით, თუ
რისთვის დაიარება დარისპანი ასე გამუდმებულად თავის ნათე-
საე-ნაცნობებში და რამდენად უხარიათ ამ ნათესავეებს დარის-
პანის სტუმრობა. აკი ახლანდელმა მისმა დიასახლისმაც — მარ-
თამ დაინახა რა მის ოჯახში სტუმრად მომავალი დარისპანი
და კაროჟნა, გაბრაზებით წამოიძახა: „უიმე! დარისპანი თავის
ქალიშვილით! დასწყევლა ღმერთმა, საიდან გაჩნდა? საიდან
მოეთრევა?“ და იმავე წუთში, შინ შემოსულ დარისპანს იგი-

ვე მართა აღტაცებული მისალმებით ეგებება: „მობრძანდით. მობრძანდით, დარისპან ჩემო!“, ხოლო კაროენას თითქოს დიდი სიყვარულით ეალურსება: „უი, შენ დაგენაცლა მამი-დაშენი!.. რამხელა გაზრდილა... რავე დაშვეწენებულა...“ მართას ეს უკანასკნელი სიტყვები მით უფრო სასაცილოა, რომ კაროენას არაფერი სცხია მშვეწენებისა და სილამაჯისა.

ასე სტყუიან, პირფერობენ და ტრაბახობენ ეს ადამიანები და მწერალი კვალდაკვალ ამხელს მათი მდგომარეობის სიყალბეს, განსხვავებას და წინააღმდეგობას მათ სიტყვასა და საქმის ნამდვილ ვითარებას შორის.

მაღე მოვიდა მართას და პელაგიას სასურველი სტუმარი ოსიკო ხარებაძე თავის ბიძასთან ონისიმესთან ერთად. მართა და პელაგია თავს არ იზოგავენ, რომ ოსიკოს ნატალია მოაწონონ, მაგრამ აქ საქმეში ჩაერია დარისპანი. მას იმედი აღეძრა, რომ იქნებ კაროენა მოეწონოს ოსიკოს, ეგებ აქ გადაწყდეს დარისპანის საჭირბოროტო საკითხი, ეგებ ამ ახალ შემხედურს შეაჩეჩოს ხელში კაროენა.

ჩაღდება ფარული ქიშპი და შეჯიბრი. იქმნება დაძაბული მდგომარეობა. დარისპანი ველარ მალავს უკმაყოფილებას იმით, რომ მართა ნატალიას უფრო ეხმარება, ვიდრე კაროენას. ბოლოს დარისპანი და პელაგია აშკარად შეეჯახებიან ერთმანეთს. ხოლო თვით ოსიკო, რომლის გარშემოც გაჩაღებულია ეს ცილობა და აყალმაყალი, გულგრილად შესცქერის ორივე ქალიშვილს და დაუინებით ერთსა და იმავე კოთხვას იმეორებს: „აქვს რამე?“. მისთვის უმთავრესი მზითვეია და არა საცოლე. და რაკი გაიგო, რომ არც ნატალიას და არც კაროენას სახარბიელო მზითვეი არ ვააჩნიათ, ოსიკომ ყველას გასაგონად განაცხადა, რომ მას უკვე დანიშნული ჰყავს საცოლე და მაშასადამე, ახლა ზედმეტია ყოველგვარი ლაპარაკი ნატალიას ან კაროენას ცოლად შერთვაზე.

აშკარად სტყუის ოსიკოც. ვერ გასჭრა მართას ცბიერმა და შემპარავმა ქადაგებამ იმის შესახებ, რომ თავმოყვარე ახალგაზრდა კაცი ქალის ღირსებას უნდა ეძებდეს და არა მზითვეს.

ოსიკოს განცხადებამ ერთის დაკვრით ბოლო მოუღო პე-

ლაგისა და დარისპანის იმედებს. იმედგაცრუებული დარისპანი კვლავ თავის გზას გაუდგა. წასვლისას კაროენა მოუძებნის და მიაწოდებს დარისპანს მის ყაბალახს:

კაროენა — (ყაბალახს გამოიტანს და ბეჭებზე მოახვევს) მიაგდებ ყოველთვის სადმე...

დარისპანი — შენც მიგაგდებდე სადმე. შეილო, რამე რიგათ და ამისთანა ყაბალახს, თუ გინდ ათასს, ქირი მოუქამაა“.

პიესა მთავრდება სასიძოს საძებრად ისევ გზაზე დამდგარი საბრალო დარისპანის სიტყვებით: „ღმერთო, კეთილად დააბოლოვე ჩემი მგზავრობა!“

დარისპანი და კაროენა დავით კლდიაშვილის მიერ შექმნილ საუკეთესო მხატვრულ სახეთა წყებას მიეკუთვნებიან.

პიესას „უბედურება“ განსაკუთრებული ადგილი უქირავს დავით კლდიაშვილის შემოქმედებით მემკვიდრეობაში. თუ მის საუკეთესო მოთხრობებში და ზემოთ გარჩეულ პიესებში მოცემულ საზოგადოებრივი ვითარების მამხილებელი სურათები ყოველთვის გამსჭვალულია ცხოველი ჰუმორით, რაც ერთგვარად ანელებს განწყობილების დრამატიულობას და საღებავთა სიმუქეს, „უბედურებაში“ მწერალმა ღრმა დრამატიზმით, ერთგვარ ტრაგიკულ დაძაბულობამდე აყვანილი მოტივებით აღბეჭდილი სურათი მოგვცა, რომელიც უადრესად დაბინდული ფერადებით გვიხატავს სინამდვილეს, ხალხის, იმდროინდელი სოფლის ცხოვრებას.

ამ პიესაში მოცემული ყოფაცხოვრებითი სცენა ღრმა განზოგადებითი მნიშვნელობის, სიმბოლურა ძალის სურათია, რომელშიც უკიდურესი სიმძაფრით გამოთქმულია მწერლის უარყოფითი თვალსაზრისი იმდროინდელი სინამდვილისადმი. მემამულურ-კაპიტალისტური წყობილებისადმი.

უბედურება სუფევს ქვეყნად, ადამიანი უბედურაა, განწირულია უსაზღვრო ტანჯვისა და წამებისათვის, — მწუხარებით არის აღსავსე მისი ცხოვრება — ასეთია ამ პიესის ძირითადი აზრი, რომელიც ხან მოქმედ პირთა დიალოგში პოულობს მაღალ პოეტურ გამოხატულებას, ხან თვით მოქმედებაში,

მოთხრობილ ამბავში სახიერდება ცხადად და ხელშესახებად პიესა იწყება მოხუცი გლეხი ქალი მაიასა და მასთან სტუმრად მისული ხეიბრის — ილიას საუბრით, ფეხებგადამტვრეული, გაუბედურებული ილია თავისი პიროვნებით, თავისი მდგომარეობით და განწყობილებით გამოხატავს იმდროინდელი უკულმართი სოციალური წყობილების მსხვერპლთა, ცხოვრების მიერ წელში გატეხილ და გაუბედურებულ ადამიანთა საერთო ხვედრს. ილიას ყოველი სიტყვა უსაზღვრო სევდითა და მწუხარებით არის გამსჭვალული:

„ილია — გული მიწუხს, მაია... გული მიწუხს!..

მაია — გული შენს მტერს შეუწუხდა, ჩემო ბატონო!.. რატომ, რატომ, ჩემო სინათლევ?..

ილია — მა რა იქნება, როცა ყოველი მხრიდან მარტო მწუხარება გვესმის! ყველასაგან მარტო ჩივილს თუ გაიგონებ თავის უსაშველობაზე, თავას გაჭირვებაზე... თავის გამწარებულ ცხოვრების ამბავს თუ მოგიყვება, თორემ მხიარულ სიტყვას იშვიათად თუ ვისმესაგან გაიგონებ... ყველა სწუხს, ყველა დაღონებულია, ბედის მომჩივანია... ასე მეჩვენება, თითქოს ქვეყანაზე მწუხარების მეტი არა იყოს რა... ყველაფერა უხალისო. უფერული, ჩამობნელებული მეხატება“.

ილიას ეს სიტყვები ღრმად მამხილებელი ძალით ეღერენ, ისინი გულის სიღრმემდე ჩამწვდომი სიმართლით გვიჩვენებენ, თუ როგორ მწუხარებაში და ტანჯვაში ცხოვრობდა ჩვენი ხალხი მემამულურ-კაპიტალისტური წყობილების, თვითმპყრობელური რეჟიმის ბატონობის დროს.

მწერალი გვიჩვენებს, რომ ასე უზომოდ დაჩაგრული და ცხოვრებაგამწარებელი ხალხის გულში მაინც ერთო იმედის ნაპერწკალი, ხალხი მხოლოდ მომავლის რწმენით ცოცხლობდა და სულდგმულობდა:

„მაია — სწორეთ! რაც გაგვეწყოს მოვითმინოთ... ვინ იცის. საწინათ რა მოგველის!.. დღეს ვწუხვართ, ხვალ ეგებ მხიარული დღე გვითენდება... ვინ იცის, ყველაფერი მოსალოდნელია... გულს ნუ გევიტეხავთ, იმედს ნუ დაგკარგავთ“.

თავისი პიესის ერთ-ერთი მოქმედი პირის ამ სიტყვებით ავტორმა მთელი ხალხის რწმენა და სასოება გამოთქვა — ხალხის მისწრაფება ცხოვრების გარდაქმნისაკენ, უკეთესი მომავლისაკენ.

„ილია — მოვესწრებით კი კაი გაზაფხულს?

მაია — კი მოვესწრებით... ღმერთი ყველაფერს მოგვასწრებს — ავსაც და კარგსაც, ჩემო ბატონო“.

ასეთია ხალხის გულში აღმოუფხვრელი ოპტიმიზმის ძალა. ხალხს ჯიუტად და გაუტეხლად სჯერა და სწამს მომავალი, თუმცა სინამდვილე, მთელი გარემოცვა მხოლოდ მწუხარებით და უბედურებით არის აღსავსე. ამას მოწმობს პიესის ყოველი მოქმედი პირის განწყობილება, პიესაში მოთხრობილი ამბავი.

პიესის ერთ-ერთი გმირი ქალი — ტუფია ისევე უჩივის თავის ბედს, როგორც ილია. გამოჩნდება თუ არა პიესის სარბიელზე, იგი ასე მიმართავს ილიას:

„ტუფია — თავს ველარ ვერევი, ჩემო ბატონო... სულ მწუხარებაში, სულ უბედურებაში ყოფნამ გულიც დაასუსტა. ჩემო ბატონო, და ჭკუაც!..“

პიესის შემდგომ მსვლელობაში ჩვენ ვეცნობით ოთხმოცი წლის მოხუც გლეხს, ამირანას. იგი გარეგნულად ყოჩაღად გამოიყურება. ილიას ამირანა ბედნიერ კაცად მიაჩნია, მაგრამ ამირანა კიდევ უფრო უკმაყოფილოა თავისი ბედისა, ისიც თავის უკიდურეს გაჭირვებაზე, გამოუვალ მწუხარებაზე ლაპარაკობს.

„ამირანა — აბა რა ვქნა? ვინაა შემხედვარი? ვინაა გამკითხავი, შენი ჭირი შემეყაროს!..“

მართო დარჩენილა. ღრმა მოხუცებულობით დაუძლურებული ამირანა. მის შეილებს ველარ აუტანიათ სოფლური ცხოვრების სიდუხჭირე და ქალაქს შეპფარებიან. ამირანას ჰგონია, თითქოს მისი შვილები ქალაქად ბედნიერად და ლაღად ცხოვრობენ. ილია აქარწყლებს ამირანას ამგვარ წარმოდგენას. ილიამ იცის, რომ ამჟამად ბედნიერი ცხოვრება არსად არის. ილიას პირადად უგემნია ქალაქად გახიზნული ადამიანის იმედების გაცრუების სიმწვავე. სწორედ ქალაქში გაუბედუ-

რებულა ილია, იქ დაუქარგავს მას ჯანი და ღონე, იგი უპასუხებს ამირანს:

ილია — ეჰ, ამირანა, დამიჯერე, თეთრ პურზე უსათუოდ არ არიან შენი შვილები ქალაქში. ვაი თუ ისინი შენზე უფრო მეტს გაჭირვებაში იყენენ? დარწმუნებულიც ვარ, უსათუოდ ასე იქნება... აი, ჩემიანებსაც შენსავით ეგონათ, მეც ბევრი საყვედურები გამიგონია მათგან იმ დროს, როცა მე გაჭირვებულ ცხოვრებას ვებრძოდი... მინდოდა ჩემთვისაც და სხვებისთვისაც უკეთესები შემეძინა, მაგრამ, ა, ხომ ხედავ, რა შევიძინე: დამტვრეული; გულსაკლავად, ყველას შესაწუხებლად ვაგდივარ ყმაწვილი კაცი და ვინ იცის, რა ხანს ვეგდები ასე! — გაჭირვება თან სდევს, ჩემო ამირანა, ყველას...”

ასე გოდებენ მოთხრობის გმირები, როგორც სოფლად. ისე ქალაქად გაბატონებული უბედურებისა და გაჭირვების შესახებ და ადამიანის ამგვარ გამწარებულ ყოფას, ბნელსა და დუხჭირ ცხოვრებას ხატავს აგრეთვე პიესაში დატრიალებული ამბავი.

ღარიბი გლეხი ანტონი — ტუფიას ქმარი. მიუხედავად მძიმე ავადმყოფობისა, ყანაში წასულა სამუშაოდ. ავადმყოფობას და მძიმე შრომას გაუტეხია კაცი. იგი სულთმობრძავი მოიყვანეს შინ. მთელი ოჯახი თავზაოდაცემული და შეძრწუნებულია. იკრიბებიან მეზობლები. ყველას ებრალება მომაკვდავი ანტონი და მისი ოჯახი. ყველანი დახმარებას და შემწეობას ჰპირდებიან ანტონის ოჯახს. მაგრამ ეს მხოლოდ სიტყვით, რადგან ბნელით მოცულსა და დუხჭირი ცხოვრებით გამწარებულ სოფელში ადამიანებს დაკარგვიათ ურთიერთდახმარებისა და სოლიდარობის გრძნობა.

ანტონს ვერაფერი უშველეს. უკანასკნელად გადაწყვიტეს „გადაულოცონ“ უბედურება. მაგრამ საით, რომელ მხარეს გადაულოცონ? ქვევითკენ თუ ზევითკენ? ამ ნიადაგზე ბრძოლა გაჩაღდა ქვემო უბნისა და ზემო უბნის მცხოვრებთა შორის. ცრუმორწმუნე ხალხის აზრით, გადაულოცვა უბედურებას მოუტანს იმ უბანს, საითაც გადაულოცავენ. ამიტომ ყველა ცდილობს თავიდან აიცილოს ეს მოსალოდნელი ზიფათი და

სხვისკენ წარმართოს იგი. ყველამ გადაივიწყა მომაკვდავი ანტონი. მეზობლები ერთმანეთს დაერივნენ კეტებით, სასიკვდილოდ აღარ დაზოგეს ერთმანეთი.

ვერაფერი გააწყო ნიკომ, დაწინაურებულმა და შეგნებულმა ახალგაზრდამ, რომელიც ცდილობდა დაემშვიდებინა მოჩხუბარი გლეხები. პიესა მთავრდება ნიკოს შემწარავი შეძახილით:

ნიკო — ღმერთო ჩემო, რა ამბავია ეს, რა ამბავია? რა ამბავია, რა საშინელებაა!!!

ნიკოს ამ განწირულ წამოძახილში მოისმის თვით მწერლის ხმა. თავისი ხალხის, თავისი ქვეყნის ჩაგვრითა და უბედურებით აღშფოთებული მწერლის გულისტკივილი და პროტესტია ჩაქსოვილი ამ სიტყვებში.

ამ პიესას დავით კლდიაშვილი წერდა 1914 წელს, პირველი იმპერიალისტური ომის სისხლიან დღეებში და. უეჭველია, რომ ამ ყაჩადური ომის მსხვერპლად გამხდარი მილიონების განწირული სულისკვეთებაა გამოთქმული პიესის გმირი ქალის ტუფიას გულისმკვლელ ძახილში: „მიშველეთ! მიშველეთ! მიშველეთ!“.

ასე წრფელად და ცხოვლად გამოეხმაურა დავით კლდიაშვილი თავისი ხალხის თავზე დატრიალებულ ახალ უბედურებას. ასეთი გულშემატკივრობით ხატავდა იგი თავისი თანამედროვე ცხოვრების სიდუხჭირის მამხილებელ სურათებს.

•

დავით კლდიაშვილის დანარჩენ ნაწარმოებთაგან საღებავთა სიმძაფრით, ღრმა ცხოვრებისეული სიმართლით და შთამბეჭდავი ძალით გამოირჩევა მოთხრობები „მიქელა“ და „მრევლში“, რომლებშიც რევოლუციამდელი ქართველი ღარიბი გლეხკაცობის გაუხარელი ცხოვრების შემადრწუნებელი სურათებია დახატული და აგრეთვე „როსტომ მანველიძე“ და „ბაკულას დორები“, რომლებიც ამდიდრებენ და ამრავალფეროვანებენ მწერლის მიერ დახატულ ფართო პანორამას.

მოთხრობა „წრფელი გული“ ნაკლებად დამახასიათებელია

დავით კლდიაშვილის შემოქმედებითი ბუნებისათვის. ამ მოთხრობაში მწერალმა თავისებურად გააშუქა ოჯახის სიყვარულის, ცოლქმრული ურთიერთობის, მორალის პრობლემები. მოქმედება ქალაქად წარმოებს. ნაწარმოების გმირებს ინტელიგენციის წრის ადამიანები წარმოადგენენ. როგორც პერსონაჟების ხასიათით, ისე თემატიკის მხრივაც ეს მოთხრობა ერთადერთ გამონაკლისს წარმოადგენს დავით კლდიაშვილის შემოქმედებითს მემკვიდრეობაში. ვერც თავისი მხატვრული ძალით, ვერც იდეური ჩანაფიქრის საზოგადოებრივი მნიშვნელობით ეს მოთხრობა ვერ შეედრება დავით კლდიაშვილის სხვა ნაწარმოებებს, რომელთა უმრავლესობა ნამდვილ შედევრებს წარმოადგენს.

განსაკუთრებული ადგილი უჭირავს დავით კლდიაშვილის შემოქმედებაში ვრცელ ავტობიოგრაფიულ თხზულებას „ჩემი ცხოვრების გზაზე“. მაუხედავად იმისა, რომ ამ ნაწარმოებს მწერალი თავისი შემოქმედებითი ცხოვრების მიწურულში ქმნიდა, იგი დაწერილია დიდი მხატვრული ენერგიით და აღბეჭდილია ცხოველი ტემპერამენტით. ამ ნაწარმოებში მკაფიოდ გამოვლინდა მწერლის მხატვრული ნიჭიერების ყველა უძვირფასესი თვისება, მისი მოქალაქეობრივი იდეალების მთელი კეთილშობილება. ამ თხზულებას დავით კლდიაშვილსაბჭოთა წყობილების წლებში წერდა. ჩვენი თანამედროვეობის სიმალლიდან მწერალმა, ცხადია, ახლებურად დაინახა და გაიაზრა თავისი ცხოვრების ვრცელი გზა, აღსავსე მრავალი უმნიშვნელოვანესი მოვლენით. თხრობის მთელ მანძილზე ჩვენს თვალწინ წარმოდგება ავტორის ნათელი პიროვნება — ეპოქის მოწინავე მოქალაქე. მხურვალე გულის, სპეტაკი ზნეობის, ამადლებული რწმენისა და საზოგადოებრივი იდეალების ადამიანი, მიუხედავად იმისა, რომ მწერალი ცდილობს რაც შეიძლება ცოტა ილაპარაკოს საკუთარ პიროვნებაზე, ნაწარმოების წინა პლანზე ეპოქის უმნიშვნელოვანესი მოვლენები და ჩვენი ეროვნული კულტურის სხვა მოღვაწეთა სახეები წამოწიოს.

ამ შესანიშნავ მემუარულ თხზულებას მწერალმა ასეთი მოკრძალებული სტრიქონები წაუძღვარა: „ეს მოგონება იწე-

რება იმ მოსაზრებით, რომ რომელიმე მკვლევარმა ჩვენი წარსული ცხოვრების სურათის დასახატავად შეიძლება ამ სტრიქონებშიც იპოვოს გამოსადეგი რამ მასალა. თუ ეს ასე იქნება, მაშინ ამის დაწერაც გამართლებული იქნება და დამწერიც დიდად დაკმაყოფილებული“. „ჩემი ცხოვრების გზაზე“ თავისი შემეცნებითი და მხატვრული ღირებულებით შორს სცილდება ავტორის ასეთ მოკრძალებულ განზრახვას და პრეტენზიას. ეს ნაწარმოები მასალა კი არ არის ჩვენი წარსული ცხოვრების სურათის დასახატავად, არამედ თვით სურათი, დიდი რეალისტი მწერლის კალმით დახატული სურათი, რომელიც თვალწინ გადაგვიშლის ჩვენი ხალხის ისტორიული ცხოვრების რთულ ვითარებას გასული საუკუნის სამოციანი წლებიდან, თებერვლის რევოლუციის გამარჯვების პირველ დღეებამდე.

თავისი ადრეული ბავშვობის წლების მოგონებებისას მწერალი წარმოსახავს გასული საუკუნის სამოციანი-სამოცდაათიანი წლებას ქართული სოფლის ვითარებას, კერძოდ, აზნაურული ოჯახის ყოფა-ცხოვრებას, იმ სპეციფიკურ სამყაროს, რომელიც შემდეგ ასე ცხოვლად და მრავალფეროვნად აისახა დაეით კლდიაშვილის საუკეთესო მხატვრულ ქმნილებებში. მოგონებათა მომდევნო თავებში ჩვენ ვეცნობით, კი არ ვეცნობით,— განვიცდით და ვგრძნობთ მეფისდროინდელი სკოლის, კერძოდ სამხედრო სწავლა-აღზრდის ბიუროკრატიულ ხასიათს, ახალგაზრდობის დამმახინჯებელ და გადამაგვარებელ რეჟიმს, რომელიც სასწავლო დაწესებულებებში სუფევდა.

განსაკუთრებით ვრცლად და მრავალმხრივად არის ასახული ამ ნაწარმოებში დედა სამშობლოსთან ახლად შემოერთებული აჭარის — კერძოდ ბათუმის აღორძინებისა და მასში ახალი, მრავალმხრივად გართულებული ცხოვრების გაჩაღებისა გასული საუკუნის უკანასკნელ ათწლეულებში და ჩვენი საუკუნის დამდეგს. ქართველი პროგრესიული ინტელიგენციის მიერ ამ პერიოდში ბათუმში გაშლილი ფართო-საზოგადოებრივი მოღვაწეობა, საქართველოსა და ამიერ-კავკასიის ამ ერთ-ერთ უმნიშვნელოვანეს სამრეწველო ცენტრში კაპიტალისტური მეურნეობის მძლავრი აღმავლობა და მუშათა

რევოლუციური მოძრაობის სწრაფი გაფართოება, — ყოველივე ეს ამ თხზულებაში აღბეჭდილია ფართო განზოგადებითი ძალით. ჩვენ თვალწინ ცოცხლდება არა მარტო ერთი ქალაქის, არამედ მთელი ჩვენი სამშობლოს ისტორიული ცხოვრების ერთ-ერთი უმნიშვნელოვანესი პერიოდი.

დიდი სიყვარულით, შთაგონებულად ხატავს მწერალი ქართველი პროლეტარიატის გმირულ სახეს რუსეთის პირველი რევოლუციის მოსამზადებელ პერიოდში და ამ რევოლუციის აღმავლობის დღეებში. ამ დიდ ისტორიულ მოვლენათა მომთხრობელი თავები დავით კლდიაშვილის მემუარებისა, ამ დიდ თემანზე დაწერილ საუკეთესო მხატვრულ ნაწარმოებთა რიცხვს უნდა მიეკუთვნოს. მღელვარე გულისწყრომით იგონებს მწერალი 1905 წლის რევოლუციის დამარცხებით დროებით მოზეიმე შავი რეაქციის სისხლიან თარეშს საქართველოში და იმ დიდ უბედურებას, რომელიც თავს დაატეხეს ხალხებს პირველი იმპერიალისტური ომის ვერაგმა ორგანიზატორებმა.

ამ უმნიშვნელოვანეს ისტორიულ მოვლენათა ფონზე ანვითარებს თხრობას ამ შესანიშნავი მხატვრული მათიანეს ავტორი, რომელიც მთელ ხალხთან ერთად განუზომელი აღფრთოვანებით შეეგება საძულველი თვითმპყრობელური წყობილების დამხობას ჩვენს ქვეყანაში, ახალი ერის ამობრწყინებას ჩვენი სამშობლოსა და მთელი კაცობრიობის ისტორიაში.

დავით კლდიაშვილის ამ მემუარული თხზულების ერთ-ერთი დიდი ღირსება ისიცაა, რომ მასში ცოცხლად არის დახატული გასული საუკუნის მეორე ნახევრისა და ჩვენი საუკუნის დამდეგის უდიდესი ქართველი მწერლების, ხელოვანთა და საზოგადო მოღვაწეთა სახეები. მათი მეშვეობით ჩვენს ცნობიერებაში ცოცხლდება ის დიდი სააზროვნო და შემოქმედებითი ცხოვრება, რომელიც გაიშალა ჩვენს ქვეყანაში იმ დიდ ისტორიულ ეპოქაში, როცა ქართველი ხალხის ეროვნულ-განმათავისუფლებელი მოძრაობა ორგანიზულად გადაიზარდა სოციალისტური პროლეტარიატის მეთაურობით გაჩაღებულ ძღვევამოსილ კლასობრივ ბრძოლაში.

მწერლის სახელოვანი შემოქმედებითი ბიოგრაფიის ღირ-

სეულად დამაგვირგვინებელი ეს თხზულება მთლიანად გამს-
ჭვალულია იმ მაღალი იდეური პათოსით, ზნეობრივი კეთილ-
შობილებით და ცხოვრებისეული სიმართლით, რაც დავით
კლდიაშვილის მთელი სამწერლო მოღვაწეობის უმაღლეს
კოდექსს შეადგენდა.

ეს თხზულება და დავით კლდიაშვილის სხვა მხატვრული
შედეგები ნათლად გვიჩვენებენ და გვაგრძნობინებენ თუ
როგორი მძიმე და სუსხიანი ცხოვრების გზა განვლო ჩვენმა
სამშობლომ, თუ როგორი ჩაგვრისა და უსამართლობის
წყვედიადს დააღწია თავი ჩვენმა ხალხმა თავისი გმირული რე-
ვოლუციური ბრძოლების მეოხებით, თუ როგორი თავგამო-
დებით და ერთგულებით უნდა ვიბრძოდეთ და ვშრომობდეთ
ჩვენ ამ რევოლუციურ მონაპოვართა შედეგად აგებული ახალი
სამყაროს დასაცავად და განსამტკიცებლად.

რედაქტორი ს. ქილაია
გამომც. რედაქტორი ვ. ძიძიგური
მხატვარი ო. ჯიშკარიანი
მხატვ. რედაქტორი ჯ. ყავლაშვილი
კორექტორი ე. ჯიქია

ხელმოწერილია დასაბეჭდად 21/IX-62
ანაწყობის ზომა 5 $\frac{1}{2}$ ×9
ქალაქის ზომა 84×108
ნაბეჭდი თაბახი 6,5
საალრიცხო-საგამომცემლო თაბახი 2,6
უე 03890 ტირაჟი 3.000 შეკვ. № 1026
ფახი 25 კაპ.

საქართველოს სსრ კულტურის სამინისტროს
ინტეგრაციული გამომცემლობის ბეჭდვითი სიტყვის
კომბინატი. თბილისი, მარჯანიშვილის ქ. 5.

Комбинат печати Главполиграфиздата
Министерства культуры Грузинской ССР,
Тбилиси, ул. Марджанишвили, 5.